


586235

Mag St. Dr.

Duplicate



CONSTITUTIONES  
ET  
EXERCITIA  
SPIRITALIA  
CLERICORUM SÆCULARI-  
UM IN COMMUNE VIVEN-  
TIUM.

*Joseph* APPROBATA  
à Sanctissimo Domino Nostro  
INNOCENTIO  
PAPA XI.

Juxta Exemplar excusum  
ROMÆ,  
In Typographia Reverendæ Camerae  
Apostolicæ.

Cum Facultate Superiorum

VARSAVIE

Typis S. R. Maiestatis Anno 1785.

X.J.PRIZYBYLKO

~~EDICIO ROMANA~~  
JMPRIMATUR

Si videbitur Reverendiss. P.  
Sacri Palatii Apost: Mag: *A. de*  
*Ang.* Archiep: Vrb. Vicesg.

JMPRIMATUR,  
5862351 St. Dr.

Fr. Raymdus Capifuccus Ordini  
nis Præd: Sac. Pal: Apost: Magist.

REIMPRIMATUR

Antonius Okecki Episcopus Po-  
snanienfis, & Varsaviensis, Supre-  
mus Regni Cancell:

1966 K 43 St. Dr.

BNB Jag.



*AD S.D. INNOCENTIUM*

*PAPAM XI.*

**B E A T I S S I M E  
P A T E R.**

**P**astoralis solicitude, & animarum pretioso Sangvine Salvatoris Nostri Redemptarum cura plurimis ex capitibus inter tam varia Christianæ pietatis opera, tanquam ex sine præstantissima, ex occupatione Sanctissima, ex necessitate cuiusvis Christiano gratissima eluet; eò quod fide-

**A i**

les per eam à putredine peccatorum virtute divinâ liberati, & ad Episcopum ac Pastorem animarum nostrarum Jesum Christum conversi, securè ad beatam illam ac cælestem vitam deducantur: quam S. Chrysostomus loquens ait: *si quis voluerit Deo commendatus esse, curam habeat ovium illius, publicamque querat utilitatem, fratribus suorum saluti prospiciat; nullum enim officium hoc Deo charius est; est verò & aliud admirabile curæ hujus encomium, quod per eam, & curæ hujus amatores id præstetur Christo in terris, quod ab ipso in cælis qui vis se consecuturum sperat Christianus; nempe æternō immortalitatis gaudio perfundi; curam enim gerere pastoralem, est in eodem, quo Christus perfunctus est, officio versari, eidem collaborare; gaudium Christi in se excitare, & Christo*

gaudium dare; ipsomet attestante,  
dum ait: *hæc locutus sum vobis, ut gau-*  
*dium meum in vobis sit;* & *gaudium*  
*vestrum impleatur;* rectè hinc infert  
S. Dionysius Areopagita, dum in-  
quit: *Divinarum omnium perfectio-*  
*num divinissima est, Dei cooperato-*  
*rèm esse in reductione animarum ad*  
*Creatorem.* Ex quorum omnium  
consideratione, Beatiissime Pater,  
ad Sanctitatis Tuæ pedes nos hu-  
millimi Sacerdotes & Clerici ad  
collaborandum adjuvante divinâ  
gratiâ in hac Pastorali curâ ex to-  
to corde provoluti nos sistimus,  
quia majus gaudium Sanctitati Tuæ  
in tot curis, in tantis occupationi-  
bus & tam ardentibus desideriis  
afferri non posse vel ideo credi-  
mus, quia ipse Tuæ primæ Apo-  
stolicæ literæ in uuiversali Ju-  
bileo per communes Christiani-  
tatis preces Sacerdotes & bonos  
animatorum curatores à Deo mitti

ardentissimè depositunt. Et jure  
meritò de Tua pastorali sollicitudi-  
ne pro universâ Christianitate tan-  
quam à te dictum affirmatur; quod  
Eminentissimus quondam Joannes  
Philippus Archiepiscopus Mogun-  
tinus (cujus pia & exemplaris con-  
versatio, uti & singularis pruden-  
tia in regendo, in toto Romano Im-  
perio notissima sunt, uti & ab ipsa-  
met Sanctitate Tua etiamnum com-  
mendantur) de semetipso fatebatur,  
inquiens: salus æterna gregis à Deo  
Nobis commissi sollicitudinem no-  
stram jugiter exstimalat, ut eidem  
præfici curemus pastores, à quibus  
& verbo & exemplo ritè pascatur,  
atq; sic ad omnem honestatem mor-  
rum, & pietatem Christianam sua-  
viter inducatur &c. quatenus per  
hoc non tam ipse tibi gaudere, quam  
efficere posses, ut Christiani veri  
Apostolorum & Christi Domini

imitatores effecti, verbum veritatis  
cum gaudio Spiritus Sancti exci-  
perent, & hoc pacto illi gaudium in  
terris dare studerent, à quo in cœ-  
lis gaudium expectare credunt æ-  
ternum. Sicut proinde Salvator  
Noster verba quæ acceperat; San-  
ctis Apostolis dans, leges & consti-  
tutiones de Regno Dei præscribens  
tradidit, & sic in salutem mundi illos  
misit: Ita nos cum lege illa Evan-  
gelica à Salvatore Nostro præscri-  
ptâ, Constitutiones à Ven: Dei Ser-  
vo Bartholomæo Holzhausero &c.  
Dei, uti confidimus, impulsu con-  
scriptas, à memorato Archipræsu-  
le Moguntino summô studio ac ar-  
dentî zelo primis typis mundo pro-  
positas, & in animarum salutem o-  
mnibus in suo Archiepiscopatu pro-  
singulari tanti principis in bonos  
pastores affectu commendatas ac-  
cepimus, & à Tua nunc Sanctitate

cum totius Instituti nostri singulari  
gaudio confirmatas cognovimus,  
ita easdem Romanis typis excusas  
ad pedes Sanctitatis Tuæ humili-  
mè præsentando ideo deponimus,  
quia ex earum observatione Tibi  
totiq; S.R. Ecclesiæ, ex eo capite  
gaudium afferendum speramus,  
quod gaudium sit Christo, si fructus  
Apostolicus, si verborum ab ipso  
datorum canon, à generatione, in  
generationem transmittatur; pro  
quibus omnibus cum gratia Dei fi-  
deliter præstandis, uti nos liberè  
consecravimus, pactō obligavimus,  
juramentō univimus, sic à Tua San-  
ctitate Apostolicam Benedictionem  
submississimè flagitantes, omnem fi-  
delitatem Tibi, & S.R. Ecclesiæ, uti  
& Rev: D.D. locorum Ordinariis  
promittimus, in fidelitate diligen-  
tiam, in diligentia curam, in cura  
veritatem, in veritate unitatem, in

unitate pacem , in pace gaudium  
Christi h̄ic in terris sectaturi , alte-  
rius verò vitæ communia omnibus  
Sanctis gaudia sperantes , qui sumus  
& manemus Sanctitatis Tuæ.

Humillimi Sacellani

Sacerdotes & Clerici Saculares

*in communi viventes.*

A v

J N N O C E N T I U S

P A P A XI.

*Ad perpetuam rei memoriam.*

Creditæ Nobis divinitus Apostolicæ servitutis ratio postulat, ut salubria Christi fidelium in sortem Domini vocatorum Instituta, ex quibus uberes in Ecclesia Dei honorum operum fructus affiduè provenire noscuntur, ac Constitutiones pro felici, prosperoq; illorum regimine, & progressu piè prudenterq; factas Apostolici muninoris præsidio roboremus, piaque illorum studia favoribus, & gratiis decoremus, sicut ad Omnipotentis Dei gloriam, & animarum salutem expedire in Domino arbitramur. Exponi siquidem nobis nuper fecerunt dilecti filii Clerici Sæculares

in communi viventes , quod Annô  
MDC.XL. operâ tunc in humanis  
agentis Bartholomæi Holzhauser  
Vicarii tunc existentis Episcopi:  
Chiemensis in Bavariâ ac ad Sân-  
ctum Joannem in Leoggenthal De-  
cani inchoatum fuit eorum Jnstitu-  
tum, quod Deo opitulante in aliis  
Diæcesibus , & Provinciis in dies  
usq; in præfens adeo excrevit , ut  
non tantùm à bon: memor: Joan-  
ne Philippo dum vixit Archiepi-  
scopo Moguntino , Sacri Romani  
Jmpérii Principe Electore; sed e-  
tiam ab aliis pluribus Archiepisco-  
pis , & Episcopis fuerit in eorum  
Diæceses receptum , & expressè ap-  
probatum , ac ab iisdem per pro-  
prias literas, prout etiam à Charis-  
fimo in Christo filio Nostro Leo-  
poldo Romanorum Rege in Jmpe-  
ratorem electo , & à bonæ pariter  
memoriæ Maximiliano Primo , &  
Ferdinando Maria dum vixerunt

utriusq; Bavariæ Ducibus, ejusdem  
Sac: Rom. I. Principibus Electori-  
bus, huic S. Sedi Apostolicæ instan-  
tissimè commendatum extiterit. Cùm  
autem sicut eadem expositio sub-  
jungebat, Institutum prædictum  
sub immediata jurisdictione Ordi-  
nariorum, ac directione unius Su-  
premi Præsidis, prout modo dicti  
Exponentes eisdem subfunt, omni  
prorsus exemptione seclusâ, salu-  
briter ordinatum, ac profelici ipso-  
rum Exponentium, & Instituti hu-  
jusmodi directione, rectaq; juven-  
tutis institutione, nonnullæ Con-  
stitutiones factæ fuerint, quæ per  
Congregationem nonnullorum ex  
Venerabilibus Fratribus nostris S.  
Romanæ Ecclesiæ Cardinalibus  
super hoc negotio à Nobis specia-  
liter deputatam, revisæ, & in non-  
nullis correctæ fuerunt, ac in unum  
volumen redactæ, tenoris, qui se-  
quitur videlicet:

## CONSTITUTIONES

*Clericorum Sæcularium in Commune  
Viventium.*

## PROOEMIUM.

**F**inis hujus Vitæ Clericalis non est novum institutum, aut Religionem introducere; sed ipsummet Statum Clericalem & Ecclesiasticum à Christo fundatum, & ab Apostolis observatum, sub imme- diata RR. Ordinariorum potestate, omni prorsus exemptione seclusâ, pure amplecti. Ut verò primæva ac genuina prædicti Status honestas tutius & sanctius conservetur, Sacerdotes hujus vitæ juxta antiquos Ecclesiæ Canones, secluso fæminarum consortio, bini, terni, vel etiam plures, simul sub privatâ, & æconomica quadam unius Superioris directione, ac inspectione vi-

vent, & bona sua Ecclesiastica in communes pios usus conseruent; atq; sic & privatam suam, & animalium sibi commissarum æternam salutem gnaviter promovere studebunt, prout sequentes Constitutiones in certa capita digestæ, uberiùs explicant.

Illud porrò sibi perſuadeant, se jurisdictioni Ordinariorum, in quorum Diæcesibus pro tempore beneficia, vel domicilia obtinuerint (seclusâ omni exemptione) semper manere subjectos: Quorum proinde, uti & præcipue ipsius Sanctæ Romanæ Catholicæ Ecclesiæ Matris nostræ Dogmata, Jura, Decreta, & consuetudines; pro viribus observabunt, atq; defendant, quemadmodum à Clericis ea obſervari, & defendi par est,

Cæterum Constitutiones hujus vitæ Clericalis in sex partes præci-

puè dividuntur. Prima est de cura propriæ salutis, & profectus in spiritu. 2. De communitate bonorum. 3. De fraterna cohabitatione. 4. De separatione mulierum. 5. De obedientia. 6. Deniq; de cura animarum.

## DE CURA PROPRIÆ SALUTIS, ET PROFECTUS IN SPIRITU.

### I.

**C**um fides sit fundamentum, & initium salutis æternæ, sublatō omnī proprio judicio, captivantes intellectum suum in obsequium fidei Jesu Christi, teneant promptam, ac paratam voluntatem omnibus iis fidem, ac obedientiam præstandi, quæ vera Christi Sponsa, ac S. Mater nostra, Romana Orthodoxa, Catholica Ecclesia credenda, aut facienda declaravit, vel imposterum declarabit.

## II.

Per rectam intentionem in omnibus suis actionibus sincere gloriam Creatoris sui spectent, carentque quantum in se erit, non solum se ipsos, verum etiam omnes alios, ad serviendum Divinæ majestati excitare propter Ipsammet, & propter nimiam charitatem, quâ prior dilexit nos, neq; in ulla re se ipsos quærant, sed in omnibus creaturis, quemadmodum & in semet ipso, Creatorem suum, & omnes in illo diligant.

## III.

Unusquisq; perspectas habeat animi sui propensiones, & antevertere noverit tentationes, opponendo ipsis remedia, quæ quivis sibi cum divina gratia comparare, & in promptu habere laborabit, inflectendo se ad ea, quæ sunt contraria peccatis, & profectui spiri-

tūs conducunt; ut si quis animadverterit, se ad superbiam, aut iram, aliamve passionem esse propensum, is exerceat se in rebus abjectioribus, & quærat ea, quibūs patientiam exercere, aut alii vitiosæ propensioni resistere possit.

IV.

Ad virtutes solidas hominis sui interioris pro viribus erit tantur; præcipue verò studeant in sui ipsius cognitione veraque abnegatione, & Christiana simplicitate, in humilitate, patientia, & charitate, timore Dei, cum prudentia & discrezione plurimum excellere.

V.

Propter amorem Christi Salvatoris sui libenter debent ferre iniurias, persecuciones, contumelias & quævis opprobria, imò ex animo gaudere, si gratis odiò habuerit eos mundus, & contempserit: quæ o-

mnia, eò ardentius complectentur,  
quòd sciant iisdem insignibus Do-  
minus & Magistrum suum fuisse  
spectabilem.

## VI.

Cùm ex sola voluntatis affectio-  
ne ( quantumvis etiam spirituali )  
vel subita boni, verive apprehensio-  
ne ad agendum , vel omittendum  
præcipitanter , & quâ datâ portâ,  
ruere , maximè semper sit pericu-  
losum, ideo affectus suos etiam spi-  
rituales , ita refrenent , ut neq; in  
agendo , neq; in loquendo sint in-  
considerati , aut præcipites , sed re-  
priùs in oculis Dei discusâ , pensent ,  
quæ honestas , utilitas , necessitas ,  
& veritas rebus agendis , vel omit-  
tendis subsit , quæve commoda aut  
incommoda ex iis sint nascitura.

## VII.

Temperantiam in cibo , & potu ,  
ad majus DEI obsequium , & per-

fectiorem carnis subjugationem, unicé cordi habeant, & sanctè semper conentur observare. Hinc convivia, quantum fieri potest, domi forisq; evitent: si verò humanitas, vel Christiana charitas subinde aliud prudenter suaserit, ex Superioris arbitrio stabit, quid hac in re cum ædificatione permittendum sit; nemo proinde hisce citra jussiō nem se ingerat, aut propriō motu aliquod convivium accedere præsumat.

VIII.

Quando itinerantur, apud hujus vitæ Sacerdotes divertant, quòd si in eorum defectu diversorium aliud eos capere necesse fuerit, memores sobrietatis, & frugalitatis, diligenter caveant, ne cibi, & potūs abusū, animæ puritati, & proximorum ædificationi aliquid officiant.

IX.

Quia otium pulvinar diaboli, & iwtiorum carnis, aliorumq; pluri-

morum malorum mater esse nosci-  
tur; omni modō sibi prospiciant, ut  
semper etiam extra statutas exer-  
citationes ordinarias, honestâ ali-  
qua actione sint occupati, quam  
singuli pro capacitate sui ingenii,  
& superiorum directione suscipiant.

## X.

Statutis Exercitiis diligenter  
suum tempus tribuant, uniformita-  
tem omnes servent, & semetipsos  
utiliter de die in diem in sincerum  
servitium Divinæ Majestatis im-  
pendant: hinc quantumvis aridi  
sint, & desolati, fortiter nihilomi-  
nus iisdem insistant, scientes, etiam  
absq; stipendio cælestium consola-  
tionum, voluntati Divinæ obsequi-  
um rationabile præstare, ejusq; pro-  
videntiæ, & nutui, perfectâ qua-  
dam voluntatis suæ cum divinâ  
conformatione, in omnibus fese  
subiicere; quare constanter pergent,

& ad devotionem in quibusvis difficultatibus se jugiter excitent.

XI.

In suis spiritualibus exercitatiōnibus viæ ordinariæ, secundūm communes prudentiæ, & discretiōnis regulas, insistant omnes; & ut se contra dæmonis illusiones tueantur, Superiorum, & Confessariorum ductum sequantur; norintq; modos, tentationes, & insidias maligni spiritūs vitandi & superandi.

XII.

Ad majorem in spiritu profectum, aut saltem ad necessariam illius conservationem, omnes quotidie in meditationem, secundūm exercitiū trium animæ potentiarum, vel asceticā lectiōnem, ad minimum per medium horam post matutinas preces incumbant, ad quam se pridie vesperi per horæ quadrāntem præparaverint, eam potissimum ex vi-

ta Christi, & Sanctorum materiam  
feligentes, quam sibi singuli magis  
profuturam existimabunt.

**XIII.**

Aveant omnes quotidie cele-  
brare , & ita vivere , ut dignè cele-  
brare possint, idcirco summô studiô  
conentur conscientiam suam, ab o-  
mni, etiam minima labecula mun-  
dam servare ; mortalem culpam  
plus, quām faciem colubri formi-  
dantes. In hunc finem adminimum  
semel in septimana sua peccata in-  
tegrè confitebuntur, idq; aliàs to-  
ties facient , quoties necesse fue-  
rit, & quotidiana tantorum myste-  
riorum tractatio requisiverit.

**XIV.**

Ubi non est Chorus, Breviarium  
Romanum aliasq; preces consue-  
tas unà cum conscientiæ examini-  
bus simul eodem locô & tempore,  
cum debita attentione, & devotio-

ne, in Creatoris sui laudem persol-  
vere allaborent.

XV.

Lectioni, studio, ac meditationi  
Sacrarum Scripturarum eâ seduli-  
ate, ac frequentiâ invigilabunt, ut  
huic tam sancto exercitio, ultra  
tempus matutinæ meditationis, vel  
lectionis supra nominatum, saltem  
unam adhuc horam quotidie im-  
pendant, & ad majorem fructum  
inde percipiendum Sanctorum Pa-  
trum, probatorumq; Interpretum  
explanationem desuper adhibeant.

XVI.

Præter statuta Exercitia quoti-  
diana, omnes, & singuli cujuscunq;  
Districtus Sacerdotes, in loco à Su-  
perioribus assignando, quot annis  
recollectedi spiritus sui per certos  
dies vacabunt: ad quam etiam ex-  
tra hoc præscriptum parati esse de-  
bent, quando eam Superiores illis,

aut utilem, aut necessariam esse  
judicaverint. XVII.

Non solum æquo animo accipient,  
si ad majorem in virtutibus progres-  
sum, proprii defectus ipsis à Supe-  
rioribus fuerint intimati; verum e-  
tiam ad aliorum correctionem viam  
sternant: quare si quis grave deli-  
ctum, aut temptationem, vel ejus  
periculum in altero notaverit, de  
hoc Superiorem vel fideliter mo-  
neat, vel saltem desuper interro-  
gatus veritatem aperiat, ut ipse  
pro paterna in suos cura pericli-  
tantibus convenienti remedio possit  
succurrere. XVIII.

Caveant Sacerdotes sese nego-  
tiis sæcularibus, aliisq; rebus ad se  
non pertinentibus immiscere, & si  
quam causam civilem habuerint,  
sublimioris statûs sui intuitu in ju-  
dicio personaliter non compareant,  
sed utantur Procuratore; quod si ve-  
rò

rò urgente necessitate , causam vi-  
duarum, pupilorum , aliorumq; mi-  
serabilium personarum suscipere  
charitas fvaferit , non faciant id  
absq; licentia Superiorum ; in iis  
autem suo duntaxat consilio adju-  
vandis , memores fint modestiæ , &  
erga partes litigantes reconcilian-  
dæ charitatis.

*De Communitate Bonorum.*

XIX.

Communitas bonorum hujus vi-  
tæ Clericos & Sacerdotes obligat,  
ut redditus suos Ecclesiasticos, quo-  
cunque titulo obvenientes, quorum  
tamen libera dispositio de jure ad  
ipsos pertinet , in communes pios  
usus conferant , collatione stabili-  
ter in vita, & post mortem duratu-  
ra: (salvís juribus Sacræ Sedis A-  
postolicæ & RR. DD. Ordinario-  
rum) quam eò ipso facere censem-  
tur, dum vitæ huic communi se ag-

gregant. Hanc porrò communia-  
tem bonorum, eò ardentiùs coli de-  
cet, quòd Christus Dominus cum  
Apostolis suis eam tenuerit, in Ec-  
clesia Dei diu viguerit, & sacri Ca-  
nones tam sanctè ad eam horten-  
tur. Igitur in Authorem vitæ Je-  
sum Christum iugiter respiciant; &  
memores, se ad vindicandam ve-  
ram libertatem filiorum Dei, & adi-  
piscendas divitias gloriæ ejus, to-  
tum thesaurum suum in Cruce Do-  
mini suspendisse, laborent omnem  
affectionem & inordinatam animi so-  
licitudinem erga res temporales sic  
extirpare, ut solus Christus Crucis-  
fixus, velut summum bonum unius  
eiusq; præcordia abundanter im-  
pleat.

## XX.

Quapropter, ut in majore pace  
domestica, & quiete animi, Deo,  
sibi, proximo vacare, & vivere pos-  
sint, ubi plures simul habitant, u-

nus eligatur, qui beneficiorum, & functionum Ecclesiasticarum redditus è manibus Sacerdotum sibi cohabitantium recipiat, & singulorum necessitatibus ex æquo prospiciat, atq; de receptis ; & expensis suò tempore Superiori ordinatam rationem reddat.

## XXI.

Habitatio, victus, vestitus, lecti, pro diversitate locorum uniformiter sic accommodentur, quemadmodum servos & Ministros Dei, & Ecclesiæ decet; infirmorum tamen semper habitâ ratione. Sine expresso consensu Superioris nihil de uno in aliud domicilium transferatur: hinc caveant hospites, itinerantes, aut qui aliò commigrant, ne quid , sive ex Biblioteca libros, sive ex domo alias quascunq; res, clanculum, & pro libitu suo, secum accipient, ob confusiones , & in-

commoda, quæ ex opposito conse-  
quuntur.

## XXII.

Qui Parentes , fratres , & soro-  
res in necessitate constitutos ha-  
bent, æconomiam suam ita institu-  
ant , & vivant , ut eos charitativè  
iuvare possint , ubi verò beneficio-  
rum tenuitas id non patitur, ex di-  
spositione Superioris defectus ali-  
unde supplebitur. Illi autem, qui  
ab ejusmodi onere iuvandorum pa-  
rentum , fratrū , sororū liberī  
sunt , ne arbitrentur rapinam id,  
quod ad obsequium pietatis, & ne-  
cessitatis,in suorum confratrum pa-  
rentes , fratres , & sorores , ab eo-  
dem Superiorē commendatos ex-  
penditur , verūm sibi persvadeant,  
(cūm charitati fraternalē omnia sint  
communia) in suos impendi, unde,  
qui non habent parentes , fratres ,  
vel sorores in necessitate constitu-

tos, sint tanquam habentes, gratiasq; Deo agant, quòd hâc libertate eos donârit.

## XXIII.

Cæterum Communitas bonorum hujus vitæ Clericalis , prout supra insinuatum , procedit solummodo de bonis intuitu munium , functionum ac reddituum Ecclesiasticorum quomodolibet quæsitis: bona autem patrimonialia sub libera cuiusque dispositione relinquntur ; cum hoc tamen moderamine, ut in iis dispensandis prima, ac potissima pauperum consangvineorum ratio habeatur: bonô nihilominus communitatis nostræ Clericalis non præteritô. Adevitandam verò omnem in hac disciplina Clericali , & pace domestica confusionem , & alia incommoda, hujusmodi dispositio- nes patrimonialium diligenter con-signentur, & Superiori, quoties ipsi

videbitur, desuper ratio reddatur  
lites verò, si quæ super dictis bonis  
patrimonialibus movebuntur, non  
à Sacerdotibus in persona, multò  
minus nomine communitatis, sed  
per procuratores coram Tribunalib-  
us agitentur.

*De Fraterna Cohabitatione.*

## XXIV.

Duo, tres, vel etiam plures Cle-  
riei, pro locorum qualitate (con-  
formiter antiquis Ecclesiæ Cano-  
nibus) eâdem in domo, ac mensa  
piè, sobriè castè & fraternè cohabi-  
tent; nec facilè aliquis solus expo-  
natetur, nisi locorum distantia postu-  
tet, eaq; sit parochialium proven-  
tuum tenuitas, ut duo cohabitare  
non possint: tales verò soli expo-  
nantur, qui eám vitæ morumque  
constantiam probârunt, ut solitu-  
do nihil periculi secum trahere mé-  
ritò credatur.

XXV.

Ut autem hujus vitæ socialis disciplina, vitatō otio, sanctius continuetur, & simul major proximo utilitas accrescat, teneros adolescentes in bonis moribus, & literis, eò usque informabunt, prout singulorum capacitas, opportunitasq; locorum permiserit.

XXVI.

Ne tamen ipsi Clerici notitiam studiorum Theologicorum, & Controversisticorum in scholis acquisitam deperdant, se se, etiam postquam ad animarum curam, aliasq; functiones Clericales applicati fuerint, in prædictorum studiorum exercitio diligenter occupabunt, & subinde in loco ad hoc deputando, per repetitiones & conferentias de super instituendas, aliquod suæ industriae, ac proiectûs specimen exhibebunt.

## XXVII.

Fraternam charitatem , & unionem sedulò observare nitatur , supportantes se , mutuò in charitativa patientia , & infirmitatis propriæ recordatione; quemadmodum nos , & totum mundum in peccatis innumeris divina bonitas benignissimè sustinet.

## XXVIII.

Quilibet Sacerdotum , quavis hebdomada pro Summo Romano Pontifice , & occurrentibus Sanctæ Ecclesiæ necessitatibus , nec non pro incremento hujus vitæ Clericalis , & singularibus ejus Benefactoribus unam Missam faciat: menstrua verò sacra duo (unum quovis in loco pro ejusdem Ordinario, alterum pro defunctis Confratribus , & Benefactoribus) à singulis celebrentur. Quotiescumq; etiam continget aliquem ex dictis Confratri-

bus è vita decedere præter consue-tas exequias, quæ in sepulturæ loco peragentur , quivis Sacerdos hujus vitæ , pro salute animæ ejusdem , tria Sacra legat : preces , & alia pietatis opera uniuscujusq; li-berati relinquuntur.

*De separatione mulierum.*

**XXIX.**

Cùm Sacerdotes quotidianum Christi Domini receptaculum sint, arctissimam castitatis custodiam o-mnes habeant , enitendo Angelicam puritatem imitari ; ad quam obtinendam portas sensuum occlu-dere, omnesque occasiones, & pri-vata cum mulieribus commercia diligentissimè fugere studeant.

**XXX.**

Quare nullæ mulieres cum hisce Sacerdotibus in eadem domo ha-bitent; sed quantum fieri potest, in

administratione domiūs & culinæ,  
Opera virorum utantur, si tamen fa-  
miliæ rusticæ , vel alia inevitabilis  
necessitas , mulierum famulitum  
requirat; matres, vel sorores, si ha-  
beri possint , vel saltem tales su-  
scipientur, quas vitæ, morumq; ho-  
nestas commendat, eâ nihilominus  
separatione factâ , quæ Superiori-  
bus videbitur fore sufficiens, & ne-  
cessaria.

*De Obedientia.*

## XXXI.

Viam regiam sanctæ illius obe-  
dientiæ omnes teneant , quam lo-  
corum Ordinariis exhibere Clerici  
Sæculares communiter tenentur:  
quemadmodum hæc via Clericalis  
ab origine sui , sine exemptione il-  
lorum Jurisdictioni se subiiciens  
sanctè servavit, & servare deinceps  
perpetuò debebit. Præterea omni-  
bus, & singulis dictæ vitæ consti-

tutionibus , ac omnibus illis , quæ eorum Superiores rationabiliter in Domino mandaverint , circa actiones , & functiones suas privatas & æconomicas , perfectam quandam obedientiam , non solum operare , verum etiam voluntate , & intellectu , præstare pro viribus enitantur , salvâ semper in omnibus Ordinariorum autoritate , & Jurisdictione.

XXXII.

In obtinendis , vel retinendis beneficiis non proprium suum arbitrium , vel commodum spectantes , promptum semper , & paratum animum habeant , vel manendi , vel alio eundi ; sic tamen , ut in acceptione , ac dimissione , seu renuntiacione ejusmodi beneficiorum , ordo debitus , & uniuscujusq; Diæcessis consuetudo semper observetur .

## XXXIII.

Secundum subordinationem superioritatis, & inferioritatis unusquisque in conversatione sua , vel officio , ab alio se dirigi patiatur: si quis tamen fortè irrationabili & indiscreto imperio gravetur , ad Superiorum recurrat ; qui pro sua discretione in Domino remedium afferet.      XXXIV.

Superioribus suas necessitates candidè aperiant , & amotis suspicionibus, eorum dicta, & facta, ita accipient , ut semper in meliorem partem interpretentur et si propriæ voluntati, & judicio contraria esse videantur: maximè verò cœvant murmura , & factiones contra Superiorum dispositiones excitare ; hæc enim mutuam charitatem scindunt , bonorum regimen disturbant , & instar pestis corpus viresq; Communitatis inficiunt, ac divino spiritui aduersantur.

*De cura animarum.*

**XXXV.**

Cùm pro nostræ vocationis scopo habeamus , juxta normam SS. Canonum (quo ad ejus fieri potest) & vitæ Ecclesiasticæ honestatem , puritatemq; vivere , & simul per functiones Parochiales Dei honorem , & salutem animarum, sincerè atque vigilanter , cum propriæ perfectionis studio , per Dei gratiam promovere; idcirco Sacerdotes hujus vitæ singulari industriâ dictam animarum curam exercebunt, & quidem eâ ferventi charitate, ac solicitudine, ut neq; in verbo, neq; in opere, aut exemplo bono aliquid desideretur , quod ad ovinulas sibi concreditas, etiam cum extremo vitæ periculo , ritè pa-scendas conducere possit.

**XXXVI.**

*Sacramentorum itaque admini-*

strationem, Sacrarumq; Cæremo-  
niarum functiones, cum decenti  
gravitate, & veneratione peragant.  
Ritus etiam ubique illos observent,  
quos Romana Ecclesia, & locorum  
Ordinarii præscripserint.

## XXXVII.

Ad frequentem usum Sacramen-  
torum, Pænitentiæ, & Eucharistiaæ  
populum servidè adhortentur; ne-  
cessitatem, vim, & effectus eorum  
explicando; maximè verò invigi-  
lent, ut ægroti Sacro Viatico, &  
extremâ Unctione mature provisi,  
ex hac vita decedant.

## XXXVIII.

In prædicando Evangelio Chri-  
sti, solius Dei gloriam, & anima-  
rum salutem spectantes, ab omni  
invectivarum genere, & acrimoniâ  
verborum in particulares personas  
abstineant, neque hominibus, sed  
Deo placere studeant: unde, & o-

temptationem, & auditorum captiu-  
minis accommodatos conceptus fu-  
giant; ea semper in medium pro-  
ferentes, quæ pro diversitate audi-  
torii sui, populum in virtute Chri-  
stiana erudire, aut in moribus cor-  
rigere, vel in charitate, aliarumq;  
virtutum studio magis accendere  
apta sint. De quibus plura infrà.

## XXXIX.

In sensu simplicitatis, & veritatis  
Christianæ abundantes, Ecclesiæ  
traditiones, & Sanctorum Patrum  
doctrinas, præcipue verò Sacræ  
Scripturæ libros summè æstiment,  
venerentur & sibi familiares red-  
dant; quos non ex propria sapien-  
tia interpretando, ad subtiles con-  
ceptus trahere, sed simpliciter ita  
proponere studeant, prout est uti-  
le ad docendum, ad arguendum,  
ad corripiendum, & erudiendum in  
justitia, & prout Sancta Ecclesia,

Sancti Patres, & Theologorum orthodoxorum consensus, sanctè hac tenuis intellexit, & etiamnum intelligit.

## XL.

Doctrina catechetica, ad radiores, & paryulos in articulis fidei orthodoxæ, & moribus Christiano homine dignis ritè instruendos, singulis Dominicis in Ecclesiis Parochialibus uniformiter ex præscripto instituatur; ut sic ex naturalibus ignorantiae tenebris ad lumen veritatis fidei, & viam sanctæ conversationis traducantur.

## XLI.

Ad hoc plurimum juvabit, si scholas vernaculas (quæ magnum, præter alia commoda non pauca, doctrinæ catecheticæ cum fructu prosequendæ præsidium conferunt) ruri non minùs, quam in civitatibus, omni studio & solicitu-

dine instituendas curent, frequen-  
tiūs visitent, & ea, quæ in catechesi  
dicta, vel dicenda sunt, ludimagi-  
strum parvulos suos docere ju-  
beant.

## XLII.

Ex vernaculis hisce scholis ali-  
qui bonæ indolis parvuli ad ædes  
parochiales assumentur; qui Sa-  
cerdotibus ad altare inserviant,  
mensæ ministrent, ad eamque Scri-  
pturam Sacram legant, canere, &  
Latinè loqui paulatim addiscant; in  
misteriis quoque Christianæ fidei,  
timore Domini, ingenuis moribus,  
bonis literis, & aliis hujus vitæ  
Clericalis principiis instruantur;  
sicque ad omnem pietatem, & mo-  
rum honestatem ab ineunte ætate  
solicite educentur.

## XLIII.

Animarum fructum plurimūm  
pr moveri sciant, si Parochiani sin-  
cerâ charitate foveantur: hinc æ-

grotos frequentiūs invisant , eisq;  
cūm opus erit, ad ultimam luctam  
ex debito salutaribus monitis assi-  
stant, & confortent: pauperum ve-  
rò, pupillorum, viduarum, alia-  
rumque miserabilium , & afflictar-  
um personarum singularem quan-  
dam curam habeant, earundem ne-  
cessitates , & miseras , quantum  
fieri poterit, confiliō, operā, fola-  
tiō sublevando.

## XLIV.

In Parochiis suis nihil novi inci-  
piant, nihil mutent ; verūm con-  
ſuetudinibus laudabiliter hactenus  
observatis infiant ; maximè verò  
caveant , ne in ullam controver-  
ſiam, præſertim cum Magistratibus  
ſe intromittant ; niſi requiſitō priuſ  
Superiorum confiliō, & impetratō  
consensu.

## XLV.

Hanc Clericorum Sæcularium

vitam diligent, defendant, propagent, & in vocatione sua, tanquam generosi milites in statione, quibuscumque adversariis non obstantibus, constanter perseverent; ac pro firmiore harum Constitutionum observatione, & custodiâ, quandoq; colloquia instituant, quibûs id efficiant, ne res suæ, sive spirituales, sive temporales, aliquid capiant detrimenti, & casu, quo disciplinam dissolvi, vel æconomiam periclitari deprehenderint; providô, maturôq; consiliô occurant, quod ipsum asequentur facilius, si quis in examine privato, juxta statum, & conditionem suam, super his Constitutionibus, cum proposito emendationis, diligenter se examinaverit.

XLVI.

Denique hæ Constitutiones sub peccato, per se loquendo, non o-

bligant, et si quis ad hanc vitam  
Clericalem servandam per jura-  
mentum se adstringat. Solus au-  
tem ille perjurus censebitur, qui  
proprio motu se ab hujus Clerica-  
lis vitæ, & disciplinæ statu separa-  
verit.



# CONSTITUTIONES JUVENTUTIS AD VITAM SACERDOTIALEM CLERICICO- RUM SÆCULARIUM.

*In Commune viventium Educandæ.*

## P R O O E M I U M .

**F**inis hujus vitæ Clericalis est,  
& Clericos Sæculares in Com-  
mune viventes in honestate, & di-  
sciplina Clericali conservare & in-  
genuos adolescentes ad eadem edu-  
care : unde qui hic aluntur firmiter  
sibi pronere debent, quòd Sacerdo-  
tes facti , sub disciplina hujus vitæ  
ad incrementum Ecclesiæ Catholi-  
cæ militare , & juxta propriam, &  
aliorum salutem ex professo pro-  
curare velint. Quare, qui ad hujus  
disciplinæ institutionem accedunt,  
sibi persuadeant , se verè in filios,

& in membra hujus corporis suscipi: igitur seposito erga domum paternam & consangvineos inordinato affectu , eò magis Deum Creatorem suum , & Spirituales suos parentes diligere debent, quò majora beneficia & pretiosiorem vitam omnino gratis ab ipsis accipiunt. Proinde hanc Clericorum sæcularium vitam , ut veram & charissimam Matrem habeant , illius disciplinæ ex animo se submittant, tradendo personas suas, instituendas , & erudiendas secundùm voluntatem suorum Superiorum: maximè vero ad perfectionem debitam, & gradum quendam excellenter communitatis bonorum , dilectionis fraternalę, castitatis, & obedientiæ ab adolescentia conentur; in quibus, veluti columnis, tota structura hujus vitæ Clericalis subsistit. Porro Constitutiones hu-

jus juventutis ad vitam Clerico-  
rum sæcularium ritè educandæ in-  
tria potissimum puncta dividere  
visum est. Primum erit de pietate  
Christianæ: alterum de morum  
honestate; tertium de studiis literarum.

*De Pietate Christianæ.*

## I.

Articulos fidei Catholicæ, eo-  
rumque fundamenta animis suis fir-  
miter imprimere; item tam Sacra-  
mentorum virtutes, quam etiam si-  
gnificationes sacrarum Cæremo-  
niarum, earumque congruitates  
probè addiscere studeant, ex quo-  
rum deinde scientia intelligent, so-  
lam Ecclesiam Catholicam cæle-  
stis sapientiæ, & divinæ veritatis,  
insuper & morum laudatissimo-  
rum in terris Magistrum existere,  
extra quam salvare impossible fit.

## II.

Nosse prætera debent, mundum, carnem, & diabolum esse tres animæ nostræ capitales hostes, qui viam ad Cælum tanquam latrunculi obsidentes, suis hostilitatibus efficiunt, ut tota vita hominis sit militia super terram, ad quam viriliter oportet accingi. In hunc finem sibi omnis generis practica principia, ac media facilita ex lectione, & meditatione sacra comparabunt, quibus concupiscentiæ motus, aliæque tentationes eludi, & muscularum instar possint ac debeant repelli. Huic rei maximoperè deservient libri piorum Auctorum, quos Pater Spiritualis singulorum captui, atque profectui idoneos jucaverit.

## III.

Frequenter sibimetipſis inculcent humani generis vilitatem,  
vanita-

vanitatem, fragilitatem & nihilum,  
ut ex hujuscemodi cognitione , &  
quotidianâ experientiâ agnitionem  
sui ipsius paulatim consequantur.  
Item tam beneficia Creationis,  
Redempcionis , & Sanctificationis,  
quâm pænas eorum, qui iisdem abu-  
tuntur; sicut & quatuor hominis no-  
vißima perpetuó ob oculos ponant;  
ut sic vel ad amorem Dei, gratiq;  
animi affectum , vel ad justum ti-  
morem Domini seriò impellantur,  
super quæ , tanquam firma Chri-  
stianæ vitæ fundamenta , olim so-  
lidarum virtutum ædificium ex-  
truere oportet. IV.

Virtutum Theologicarum, fidei,  
spei, charitatis; & Cardinalium, pru-  
dentiae, temperantiae, fortitudinis, &  
justitiae genuinam naturam practicè  
addiscant. Ad hæc in vera humilita-  
te, patientiâ, abnegatione, sui ipsi-  
us jugiter se exerceant , omnesq;

suas actiones in vera discretione instituere seriò conentur: maximè verò quodnam in quavis virtute medium, & quænam vitiosa extrema sint, sedulò indagent: alias enim juvenilis impetus, ob suam immoderatam vehementiam, experientiâ teste facilè & plerumque ad extrema deflectit. Hic multum proderit, si quilibet aliquid temporis certo cuidam vitio, vel particulari defectui extirpando, & virtuti oppositæ exercendæ, juxta majorem suam indigentiam & utilitatem de consilio Patris Spiritualis, vel quoties sibi alias visum fuerit, impendat.

## V.

Veram indifferentiam erga omnes res hujus mundi habeant; solum illud optimum existimantes, quod à Dei, & Superiorum voluntate dimanat: proinde promptam

obediendi voluntatem, quæ omnibus hanc vitam sectantibus maximè necessaria est, à juventute sibi comparabunt.

VI.

Tam primam innocentiam, quam castitatem mentis, & corporis, ut pupillam oculi, illibatam conservare fatagant: proinde principiis obstent, & omnes malas suggestiones sine cunctatione ex animo ejiciant.

VII.

Ad sensuum suorum tam internorum, quam externorum custodiām pro viribus attendant: maximè verò ab auditione rerum turpium, tanquam à facie colubri, fugiant; & si fugere non possint, reprehendant, vel saltem serio apud se detestentur.

VIII.

Oculos suos ab omni curioso intuitu Sexûs fæminei, aliarumque

vanitatum, quæ hominem fascinando inquinare, vel distrahere solent, solicite avertant. Hinc frenum timoris Domini sibi iniicientes, foris, & in templo oculos ab omni inordinata evagatione pro viribus cohibere nitantur; quod facilius consequentur, si præsentiam Dei, & futurorum bonorum stabilitatem, respectu quorum hæc conduca vilescent, animò jugiter revolvant.

## IX.

Turpiloquia, sicut & blasphemiae, procul arceantur; & si quis in his deprehensus, tertiaque vice corruptus, emendationem effectivè non demonstraverit, tanquam pestis è consortio innocentum ejiciatur.

## X.

Ne rerum singularium usū ad avaritiæ fordes inclinentur, nemini licet pecunias proprias, aut res alias, clandestinè, possidere; & si quis

à parentibus, consangvineis, tuto-  
ribus, aut quibuscunq; aliis simile  
quid acceperit, non sibi seorsim re-  
servet, sed in communi custodiâ  
Superiori asservandum tradet.  
Hinc et si plutei ad asservationem  
quarundam regularum studiosæ ju-  
ventuti necessiarum , singulis  
permittantur, Superior tamen ad  
eos clavem magistram habebit.

XI.

Singulis diebus, statim post pre-  
ces matutinas, medium horam lecti-  
oni spirituali, vel meditationi dili-  
genter impendant ; & quæ ex at-  
tenta lectione ; vel meditatione  
notatû digna deprehenderit, cum  
brevi reflexione , primò memoriae  
benè mandent, tum etiam in libro  
suo spirituali ad hoc deputato cla-  
rè, & breviter notent, ne thesauro  
spiritualis scientiæ defraudentur.

## XII.

Quotidie, tempore, & loco sibi assignato, tremendo Missæ Sacrificio devotè intersint; & sub eodem non solum corpus & animam, verum etiam omnes cogitationes, verba, & opera sua Patri Cælesti per Jesum Christum in servitium offerant: & qui Officium parvum B. Virginis Mariæ necdum orant, Officium Immaculatæ Conceptoris à S. Sede Apostolica approbatum, una cum Hymno S. Casimiri, pariter approbatō vel approbando, præcipue pro conservanda castitate persolvant: cum verò celebrans ad Communionem pervererit, suam quoq; spiritualem Communionem (prout didicerunt) instituant.

## XIII.

Qui verò in majoribus Classibus existunt, Officium parvum B. M. Virginis pro incremento gratiæ

vocationis Clericalis singulis diebus recitent; sic quidem, ut Primam, Tertiam, Sextam, & Nonam sub Missæ Sacrificio, Vespertas verò, & Completorium, cum Matutino & Laudibus pro die sequenti, tempore pomeridiano paùlo ante cænam in honorem Genitricis Dei, Reginæ, & Patronæ singularis hujus vitæ Clericalis, pro temporum diversitate, alternis vocibus recitando persolvant.

XIV.

In templo sub Missæ Sacrificio, aut Vesperis verâ pietate, & modestiâ præluentes, ab omni garrulitate, & strepitu, oculorum curiositate, & inordinata mentis, omniumque aliarum facultatum effusione se custodiant. Sub auditione Verbi Dei januam alienis cogitationibus præcludendo, intellectum, memoriam, & voluntatem, ad per-

cipiendum debitum fructum, Con-  
eionatoris sermoni ex animo ac-  
commodent.

## XV.

Philosophiæ, & Theologiæ stu-  
diosi singulis septimanis, & majo-  
rum totius anni Festivitatum die-  
bus, conscientiam suam Sacra-  
mentali Confessione expiare, & ad Sa-  
cram Communionem accedere as-  
fuescant: qui verò in humaniori-  
bus scholis existunt, saltem singu-  
lis quatuordecim diebus id obser-  
vabunt. Confessariis autem con-  
teantur omnes, quos Superiores,  
vel ex hujus vitæ Clericalis Sacer-  
dotibus, vel aliunde determina-  
verint. XVI.

Post Communionem aliquantum  
temporis in gratiarum actionem  
pro tanto beneficio, aliquam affe-  
ctuosam orationem, vel ore, vel  
mente recitando impendant; in

qua omnia viscera sua, cum omnium necessitatum suarum, tam privatarum, quam publicarum Ecclesiæ, explicatione, coram oculis divinæ Majestatis effundent, & in vulnera Christi hospitis amabilissimi abscondendo commendabunt.

XVII.

Ut ab occultis satanæ & naturæ vitiatæ insidiis facilius præserventur, ab adolescentia assyescant, non raro cum Superioribus, Patre Spirituali, & Confessario super statu hominis sui interioris conferre; & iisdem graviores, præsertim extraordinarios, animi sui motus, & impulsus candidè aperire, id, quod ad cognitionem, & discretionem spirituum, an ex Deo sint, nec ne, plurimum prodefse dignoscitur.

XVIII.

Singulis annis recollectioni spirituali, qui ejusdem capaces sunt,

per aliquod dies vacabunt. Idem obseruetur in eorundem susceptione ad hanc vitam, antequam iuramentum præstent: adjungant etiam confessionem generalem totius vitae, nisi ante eam fecerint.

**XIX.**

Majores junioribus in observatione constitutionum, tanquam speculum veræ integritatis, pro viribus præluceant; & cogitent, se à pueritiæ indulgentia ablactatos, jam ad veras & solidas virtutes evocari; proinde spirituali fulgore, studiosis nempe virtutum, & exercitorum hactenus præscriptorum actibus, in vera discréctione ubique prælucere conentur.

*De morum honestate.***XX.**

Ad eam integritatem morum omnes & singuli pro viribus atten-

*In Comm: viven:* 59

dant, ut castigationibus non indigeant; & si deliquerint, citò contriti, & humiliati, fateantur suam culpam, atque cum proposito seriæ emendationis, se Superioris arbitrio submittant, sustinentes libenter pænitentias, quæ pro qualitate delicti fuerint injunctæ; idque sine resistentia, aut murmuratione, vel frivolâ excusatione.

### XXI.

Senectutem venerentur, & tam domi Superiores, quam foris Sacerdotes, ac personas Ecclesiasticas quascunq; maximè verò præceptores suos, & omnes homines, secundum cujusque statûs dignitatem, ex animo venerentur, ac debitum honoris titulum impendant.

### XXII.

In externis cæremoniis, quæ in modò dictæ reverentiæ signum solent adhiberi, hypocriticam pseudo-

politicorum simulationem , & ineptam gesticulationem , ut pestem fugiant, è contrà cum debita gravitate, modestia, & decore, ut recta prudensque dictabit ratio venerationem paucis ostendant.

## — XXIII.

Quoties domi, vel foris, sibi invicem obviabunt, semper ii, qui sunt in inferiori Classe adolescentes altiorum Classium, omnes verò, & singuli suos Superiores, aliasq; Sacerdotes, honore debito præveniant, Majores quidem detecto capite, Superiores verò, & Sacerdotes, etiam cum inclinatione corporis salutantes.

## XXIV.

Coram Superioribus, & majoribus se ultrò non facilè ad loquendum ingerant, ad interrogata verò paucis, modestè, & graviter respondeant. Cum æqualibus ea agere,

& loqui expedit, quæ vel honestas,  
vel utilitas, vel necessitas com-  
mendat.

**XXV.**

Quando advertent, ex domesti-  
cis aliquem deliquisse, aut ad deli-  
ctum periculose inclinari, vel si  
aliud quodcunque scandalum pa-  
tiantur, ad Superiorem debitâ cum  
modestiâ, locô, & tempore con-  
gruo, fraternæ correctionis causâ  
deferre teneantur, ut maturè malo  
occurri possit.

**XXVI.**

Contra correctionem Superio-  
rum non murmurent & si quid inju-  
stè sibi pati videantur, patienti ta-  
citurnitate prudenter sufferant, &  
in meliorem partem accipiendo co-  
gitent, se de præsenti non intelli-  
gere correctionis mensuram. In-  
primis autem caveant, ne de suis  
Superioribus malè loquantur, vel

illos judicent, irrideant, aut illorum dicta, facta, correptiones, dispositiones &c. sinistrè interpretentur; multò minus talia suis sociis, aut (quod pejus foret) extraneis evulgent.

### XXVII.

Contra dispensationem necessariorum, nullas factiones, & murmura excitent; sed si quem defecatum horum quomodolibet in veritate notaverint, competenti Superiori seorsim indicabunt, ut suō tempore; & modo sciat remedium adhibere.

### XXVIII.

Ab omni specie mendacii abstinere; veritatem verò, quæ inter præcipua benè moratæ juventutis ornamenta meritò numeratur, tanquam pupillam oculi, in omnibus verbis, & actionibus suis custodire studeant.

XXIX.

Non adulentur, non pietatem singant, neminem decipiendo verbis circumveniant: & in narratione rerum auditarum ab omni falsa amplificatione abstineant, ut sicut os loquitur, ita in veritate sentiat cor.

XXX.

Nemo alterum mendacii inciviter arguat; nec in passione iræ erga se invicem effervescent, aut vindictam sumere quocunque modō attendent: ad competentem vero Superiorem, si rei gravitas postulaverit, rationabiliter, & sine cupiditate vindictæ deferre nemo prohibetur, qui noverit optimè in Domino providere.

XXXI.

Sermone utantur modesto, non sapientiæ sublimitatem affectent, non falsæ humilitatis abiectionem, sed in omnibus curent simplicita-

tem sinceritatemque Christianam servare; quibus ædificetur proximus, non offendatur.

## XXXII.

In iis, quæ narrant, ambages. & superfluos verborum ambitus sicut, & circumstantias ad rem non pertinentes, abscindant & modò rectò, ac planò ad scopum sui discursus festinent, aliis etiam discurrendi locum cessuri,

## XXXIII.

Seipsoſ præ aliis non extollant, neque interius in suis rebus ſibi vanè complaceant: multò minus ſeipſoſ, aut ſua laudare, & per jactantiam magni facere præfumant: cogitare enim debent omne bo- num eſſe deſuper à Patre lumi- num.

## XXXIV.

Non ſint morofi, erga omnes au- tem affabiles, manè, & vefperi fa- lutem invicem impertiantur: mi-

nores in alloquio à majoribus , & superioribus affatum expectent; quod debitæ submissionis & verecundiæ signum fuerit.

XXXV.

Tam vultū tristitiam, & oculorum austeritatem, quam levitatem in seipsis omnes sic corrigant, ut suavitas cum gravitate, modestia verò cum magnanimitate in cuiusvis vultu certare videatur, in hoc ipso tamen omnem simulationem, & hypocrysin excludentes.

XXXVI.

Exclusa omni levitate, in incessu gravitatem cum modestia conjungant semper, incedendo non currant; in vestibus munditiem amant, fordes oderint, & in omnibus verbis, actionibusque suis gestus membrorum, ac totius corporis compositionem talem exhibeant, quæ omnem hominem ædificare possit, ac debeat.

**XXXVII.**

Erga cibos in mensa appositos ipsius appetitus sensualitatem sibi prædominari sic non sinant, ut gula rectæ rationis usum præveniat; quantum autem ad moderatam corporis refectionem necessarium fuerit comedant: in singulorum ciborum contrectatione debitam modestiam, ac decorem in allorum ædificationem observent: silentium quoque in triclinio sanctè servetur, extra mensam porrò ordinariè sive domi, sive foris, abstineant, neque sine licentia Superiorum alibi comedant, aut bibant.

**XXXVIII.**

Post mensam aliquantum temporis honestæ recreationi indulgebunt, sic tamen, ut ab indecora corporis agitatione abstineant, & cum ea circumspectione, ac modestia lætitiam attemperent, ut nemo prudens offendi queat.

XXXIX.

Nemo autem, sive domi, sive foris, recreationi se subducere, vel ad alia loca, occasiones, aut confortia declinare, vel eo tempore, præpostero ordine, literis operam dare, vel in loco solitario se tristitia, aut melancholiae dedere permittatur: est enim tempus flendi & tempus ridendi, omnia tempus habent.

XL.

Quamvis humanum sit, intra limites virtutis Eutrapeliæ, jocari, & jocos, aut sales ab aliis accipere, ac tolerare posse; nihilominus tamen stultiloquia, scurilitates, & alia, quæ honestatis terminos mediumque discretionis excedunt, in nulla occasione tolerentur. Cùm verò ex humana imperfectione, tam domi, quam foris, contra dictas Eutrapeliæ & discretionis le-

ges non raro peccari soleat, à teneris assvescant, ne ita delicati efficiantur, ut nihil pati velint, aut possint, existimantes omnia sibi ex voto accidere debere.

## XLI.

Cum valde indecens sit, proprium sermonem suis interpolare cachinis, ideo in narrandis, vel audiendis leporibus, ac facetiis, nolint aliis in ridendo palmam præripere; sed appetitum suum inhibentes, cum moderata savitatem oris sua loquantur, vel alios auscultent: aliis in risum solutis, & ipsi subrideant; prout virtus Eutrapeliæ suaferit; vitando duo extrema, nimiam quidem austерitatem ex una, nimiam verò levitatem ex altera parte.

## XLII.

In recreationibus invicem verbis, vel actionibus irritare, aut in-

sulforum morum ineptiis molesti  
esse nolint, quibus alii ad tristia-  
tiam, nauseam, irracundiam, vel  
antipathiam provocentur.

XLIII.

In auscultando alterius discursu,  
secluso omni contemptu, sagaciter  
observent, quid is pulchrum, quid  
indecens effundat, indeque sibi do-  
cumenta tacite efforment, quomodo  
se in simili occasione gerere velint,  
quæ cavere, quæ observare: lo-  
quentem autem proximum impor-  
tuné ne interrumpant, sed patienter  
audiant; indecens enim est au-  
diri velle, audire verò non nisi im-  
patienter.

XLIV.

Nemini detrahant, aliorum di-  
cta, & facta in melius interpræten-  
tur. Sinistrè verò alios judicare,  
& amarīs verbis perstringere, ode-  
rint, cane pejus & angye.

## XLV.

Ubi duo, tres vel plures fuerint simul, cayeant, ne defectus tertii, (quisquis ille fuerit, domesticus, vel extraneus, Superior, vel æqualis) imprudenti ore suggillent, quod enim sibi quis fieri non vult, æquum est, ne faciat alteri.

## XLVI.

Alterius dicta vel facta, seu graviora, seu leviora videantur, tertio non revelent; sed ad Superiorem, si correctione indiguerint, cum debita modestia, & commiserationis affectu deferant.

## XLVII.

Ab aliis audita in se finant emori, quæ cum debita utilitate, necessitate, aut honestate non propalari possunt: quod fiet, si Superiores abolendæ garrulitati, adolescentes verò servando silentio derint operam.

XLVIII.

Si quis proximum , vel fratrem suum, de tertio malè loqui audiērit; hoc tertio non manifestabit: multò minus , quæ tertius ille de eodem proximo dixerit, velut susurro, effutiet: hæc enim quia discordiam seminarint etiam in rebus levibus, adolescentes, odio capitali prosequi meminerint.

XLIX.

Unus alterum vexando, irritando vel defectus exprobando, ad iram non provocet; multò minus discordiam inter fratres seminar, aut cum altero verbis , pugnisque contendere attentet , quæ omnia, sicut è diametro bonis moribus repugnant , ita in domo juventutis nequaquam tolerabuntur.

L.

Quòd si unus alterum læserit, citò in gratiam redeant, & qui illa-

tæ injuriæ reus fuerit, injunctâ pænitentiâ, lesæ parti humiliter deprecando satisfaciat.

## LI.

Injurias tamen ab aliis sibi illatas nullô modô vindicare velint, scientes in patientia possidere animas suas; maximè si tantum in propriam personam, sine alio nocimento redundare videantur.

## LII.

Si quando proximus in flagranti passione effervescit, qui sibi præsentes sunt, cedant, illius iræ dando locum, ne similiter accendantur. Hinc neq; corripiant quemquam in fervore animi constitutum, sed tempus congruum expectent, donec ardor sedetur, & sedatâ passione correctionis sit capax.

## LIII.

Nemo alteri quicquam suretur, aut ex petulantia abscondat: proinde

inde serio sit omnibus interdictum  
aliorum musæa pervagari, aut plu-  
teos lustrare.

LIV.

Omnium rerum munditiem dili-  
gentes, non tantum in musæo li-  
bros, chartas, aliaque studiosis ne-  
cessaria, post singulos usus in or-  
dinem componant, verum etiam  
in cubiculo vestimenta quæcumq;  
inter fordes perire, & àliis nau-  
sam creare non finant.

LV.

Longiores crines, aut comam  
non nutriant; sed proscriptâ inde-  
corâ capillorum longitudine, mo-  
destam mediocritatem ex præscri-  
pto uniformiter omnes sérvent, ut  
caput honestè tegatur, non ob-  
ruatur.

LVI.

Seorsim dormant omnes; & to-  
tum corpus cum omnibus membris

ad debitam honestatem compone-  
re, sicque compositum in obsequio  
servare assuescant.

*De studiis literarum.*

## LXXI.

Gratiæ Dei, & naturæ talentis  
viriliter cooperentur; virtutumque  
studio illum scientiarum proœctum  
conjungant, qui virtutibus admi-  
niculetur.

## LXXII.

Tam in scholis, quam domi, eli-  
minatâ omni petulantia, explica-  
tionibus, alisque scholasticis exer-  
citationibus, sedula attentione au-  
res præbeant.

## LXXIII.

Tempore studiorum nemo stre-  
pitum, aut pulveres excitet, mul-  
tò minus extra proprium musæum  
in domo vagetur, aut quocumquo  
modò alios inquietare, & à studiis  
impedire audeat.

## LX.

Concertationes scholasticæ absque clamore nimio, qui veritate in dubii solummodo confundit, sic instituantur, ut argumentans tardè & ordinatè sua proponat; defendens verò patienter argumentum audiens ad formam respondeat. In se invicem non invehan-  
tur, neque fervore nimiō, vel irā excandescant: multò minus unus alterum confundere, sed rei propositæ veritatem eruere conentur, & ubi illius evidentia, vel probabilitas constiterit non violenter argumentum ex stimulo superbiae intellectualis torquere præsumant, sed veritati, vel probabilitati prudenter acquiescant.

## LXI.

A prandio ante initium studiorum medium saltem horam cantui chorali addiscendo impendent o-

D ij

mnes, à quo nemo eximi poterit.  
**H**unc ſemel edocti, vel ad cantū ſi-  
guralis, vel musicæ instrumentalis  
varia exercitia pro cujusque capa-  
citate applicabuntur.

## LXII.

In quibus quilibet privatim deli-  
quit, etiam privatim caſtigetur,  
publica verò delicta publicâ pæni-  
tentia. intra domesticos parietes  
mulctentur, ut ſic scandalum tol-  
latur, & alii à ſimilibus abſter-  
reantur.

**N**obis propterea præfati expo-  
nentes, ac etiam dilectus fi-  
lius Abbas Pompejus de Scarlat-  
tis dilecti filii Nobilis Juvenis Ma-  
ximiliani Emmanuelis utriusq; Ba-  
variæ Ducis, Sacri Romani Impe-  
rii Principis Electoris, in Romana  
Curia Adminiſter, tam ipſius Prin-

cipis Electoris, quam dilecti quoque filii Nobilis viri Ducis Maximiliani Philippi ejus Patrui, & Electoratus Administratoris nomine humiliter supplicari fecerunt, ut Institutum, & Constitutiones hujusmodi pro majori Religionis Catholicæ bono, ipliusque Instituti decore & augmento, Apostolicæ confirmationis nostræ patrocinio communire, & alias opportunitatem in præmissis providere de benignitate Apostolica dignaremur. Nos igitur piis eorundem Maximiliani Emanuelis & Maximiliani Philippi Ducum votis, quantum cum Domino possumus favorabiliter annuere, dictosque exponentes specialis favore gratiæ prosequi volentes, & eorum singulares personas à quibusvis excommunicationis, suspensionis, & interdicti, aliisque Ecclesiasticis sententiis,

censuris & pænis à jure, vel ab ho-  
mine quâvis occasione , vel causa  
latis , si quibus quomodolibet in-  
nodatæ existunt, ad effectum præ-  
sentium duntaxat cōsequendum,  
harum seriè absolventes & abs-  
olutas fore censentes , hujusmodi  
supplicationibus inclinati , de me-  
moratorum Cardinalium consilio,  
Institutum prædictum sub imme-  
diata Jurisdictione Ordinariorum,  
& directione unius generalis Præ-  
sidis , nec non Constitutiones præin-  
sertas, cum omnibus & singulis in  
eis contentis, Auctoritate Aposto-  
licâ tenore præsentium Confirmam-  
mus, & Approbamus, illisq; invio-  
labilis Apostolicæ firmitatis robur  
adiicimus , ac omnes & singulos  
Juris , & facti defectus, si qui desu-  
per quomodolibet intervenerint,  
supplemus. Præterea eisdem ex-  
ponentibus alias Constitutiones

præinsertis non contrarias pro spirituali, temporalique dicti Instituti directione ab hac Sancta Sede postmodum approbandas condendi facultatem impertimur. Ac ad tollendam omnem ambiguitatem, cum dicti exponentes sint Clerici merè sœculares, omnibusque sœcularis Cleri oneribus obnoxii, eosdem exponentes quorumcunq; beneficiorum Ecclesiasticorum sœcularium capaces esse, ac proinde **Canonicatus, & Præbendas, Personatus, Dignitates,** etiam post Pontificalem majores in Cathedralibus, etiam Metropolitanis, & Principales in Collegiatis Ecclesiis, nec non Parochiales Ecclesias earumque perpetuas Vicarias, & alia quæcunq; cum cura, & sine cura, beneficia Ecclesiastica sœcularia quomodolibet qualificata, quæ per Clericos sœculares obtineri con-

sveverunt , possidere , ac consequi  
& obtinere posse, Auctoritate , &  
tenore præfatis declaramus. De-  
cernentes easdem præsentes lite-  
ras semper firmas, validas, & ef-  
ficaces existere , & fore , suosque  
plenarios, & integros effectus for-  
tiri , & obtinere , ac illos, ad quos  
spectat , & pro tempore quando-  
cunq; spectabit, in omnibus, & per  
omnia plenissimè suffragari , & ab  
eis respectivè inviolabiliter obser-  
vari ; sicq; in præmissis per quos-  
cunque Judices Ordinarios, & de-  
legatos etiam causarum Palatii A-  
postolici Auditores , judicari , &  
definiri debere, ac irritum , & in-  
ane, si seculis super his à quoquam  
quavis auctoritate scienter , vel  
ignoranter contigerit attentari.  
Non obstantib; præmissis , ac  
Constitutionib; , & ordinationi-  
bus Apostolicis , nec non quate-

nus opus fit , quarumvis Ecclesiarum , aliisvè quibuslibet etiam Juramento , confirmatione Apostolica , vel quavis firmitate alia roboratis statutis ; & consuetudinibus ; privilegiis quoque indultis , & literis Apostolicis in contrarium præmissorum quomodolibet concessis , confirmatis , & innovatis . Quibus omnibus , & singulis , illorum tenores præsentibus pro plene , & sufficienter expressis , ac de verbo ad verbum insertis habentes , illis alias in suo robore permanfuris ad præmissorum effectum hâc vice duntaxat specialiter , & expressè derogamus , certisque contrariis quibuscunq; Volimus autem , ut earundem præsentium literarum transumptis , seu exemplis etiam impressis ; manu alicujus Notarii publici subscriptis , & sigillo personæ in Ecclesiastica

dignitate constitutæ munitis ea-  
dem prorsus fides ubique locorum  
tam in Judicio , quæ extra illud  
habeatur, quæ haberetur, ipsis præ-  
sentibus , si forent exhibitæ , vel  
ostensæ. Datum Romæ apud San-  
ctum Petrum sub Annulo Piscato-  
ris die 7. Junii M.DC.LXXX.  
Pontificatûs Nostri Anno IV.

*J.G. Slusius.*



## S T A T I O N E S

*Quotidianorum Exercitiorum  
Spiritualium omnibus huic  
vitæ addiditis communes.*

## STATIO MATUTINA.

## I.

**M**ane omnes , & singuli statuta horâ è lecto surgant ; & factò signo S. Crucis inter induendum serìo recogitent , quòd creati sint , ut Creatori suo in hac vita serviant , & per hoc ipsum servitum salvi fiant. Ex hac cogitatione quendam vehementem in voluntate impulsum excitantes , die illo , ac in omni vita Deo servire , ad ipsiusque Majestatis majorem gloriam , omnes suas cōgitationes , verba , & opera unicè dirigere ; consequenter peccatum , tanquam summum hominis malum , fugere firmissimè proponant.

## II.

Porrò vestiti ad abluerendum corpus accedant, & sub lotione vultus, puritatem cogitationum ac mentis; sub lotione oris, prudentialiam, & verborum rectitudinem, & deniq; sub lotione manuum, sanctitatem operum suorum à Deo ex poscant.

## III.

Uno quadrante sic impenso, flexis genibus ante altare domesticum clarâ voce Litanias Laurentianas, unâ cum adjunctis Sæ. Matris, & S. Josephi collectis, devote recitent: addatur etiam cum suis versiculis, & responsoriis Oratione pro loci Ordinario, quæ incipit: Omnipotens sempiterne Deus, qui facis mirabilia magna solus. (Idem fiat meridie post Litanias Omnia Sanctorum, & noctu post psalmum, De profundis) tum ad

matutini examinis finem ter Pater  
& Ave in secreto subjungant, qui-  
būs finitis, ad lectionem spiritua-  
lem, vel meditationem singuli ac-  
cedant.

*De intentione dictarum Litaniarum.*

IV.

Has Litanias Lauretanās in di-  
lectionis tessera ex filiali affectu  
erga suam Matrem Sanctam Ma-  
riam Virginem quotidie recitent,  
unicè ab eadem flagitantes, ut nos  
filios suos in hora mortis, cum co-  
mite, & Sponso suo svavissimo Jo-  
sepho, maternè velit protegere.

*De examine matutino.*

V.

In examine matutino super ma-  
lignantate noctis inquirant, primò,  
quomodo præterita nocte consci-  
entiam examinaverint, & preces

suas compleverint: in quibus cogitationibus, & desideriis dormitum iverint: qui noctem exegerint, & quomodo se mane usq; ad examen gesserint. Secundò, præter culpas, quas de præsenti in se repererint; omnia totius vitæ peccata conceptu quodam collectivo ac generali ante oculos Divinæ Majestatis, ingratitudinem propriam intimè agnoscentes, statuant; atq; de iisdem dolentes, humiliimè se in abyssum misericordiæ Dei, & meritorum Christi per actus Fidei, Spei, & Charitatis proiiciant. Tertiò, firmissimè in genere omnia peccata mortalia & venialia de præsenti die per divinam gratiam prorsus evitare proponant: in specie verò contra proprias passiones suas, certumq; vitium extirpandum animum obsirment.

*De exercitio trium Pater & Ave.*

VI.

Tria deniq; Pater & Ave in honorem Sanctissimæ Trinitatis per solvent; per Jesum & Mariam trium virtutum Thologicarum incrementum; item cogitationum, verborum & operum suorum rectitudinem perfectionemq; desiderent: insuper proportionatum medium, triplici hâc nostrâ operatione ordinatè semper utendi, scilicet Lumen, Gratiam & benedictionem supernaturalem à Deo petant; quorum beneficio sciant (per illuminationem) quid in omni re Creatori suo acceptum sit; moveantur etiam (per gratiæ excitationem) ad eadem facienda; & deniq; moti ita afficiantur (per supernaturalem benedictionem) ut operentur bonum.

*Statio Meridiana.*

## VII.

Postea unō quadrante horæ ante mensam recollectioni spiritūs insistant: & in hunc finem simul omnes Litanias de Omnibus Sanctis, unā cum earum collecta, recitabunt, easq; præviō examine meridiano, dictisq; submīsā voce septem Pater, & Ave, concludent.

*De intentione dictarum Litaniarum  
de Omnibus Sanctis.*

## VIII.

Præfatis Litaniis non solūm suos Patronos, sed etiam Omnes Sanctos, veluti singulares Dei Amicos & Advocatos amantissimos, piō affectu honorent & invocent; ut à Christo Jesu Rege suo veram charitatem fraternalm, unitatisque vinculum adamantinum huic statui Clericorum sacerdularium impetrare

velint, quò in hac vita, usque ad finem mundi, in debita compage pacis & dilectionis, ad suam & a liorum æternam salutem, mutuò conserventur.

*De examine meridiano.*

IX.

In hoc Examine recollectionem mentis seriam instituant, & super decursum medii diei sedulò inquirant, quam conformiter, vel dif formiter, matutinis suis propositis fuerint operati; vel quibus delictis à præfixo sibi scopo divini servitii aberrayerint, & si per divinam gratiam benè in stadio se cucurisse invenerint, glorificant Deum, lætantesq; spiritū similiter reliquum diei cursum consumere proponant, quod si verò defectus quoscunque repererint, eorum occasiones indagent, & contrito corde firmiter ad

oppositas virtutes animum assument.

## X.

Deniq; septem Pater & Ave sic persolvant, ut unicuiq; Pater noster sua petitio (prout ordine in oratione Dominicæ comprehenduntur, & paulò post fusius explicantur) correspóndeat: idem fiat in septem Ave Maria per Matrem Dei à Filio suo postulando septem dona Spiritus S. prout ad hanc vocationem Clericalem, & ad lucrandas animas necessaria sunt.

*Explicatio septem Petitionum Orationis Dominicæ, cum earundem applicatione ad supradicta septem Pater noster.*

## PRIMA PETITIO.

*Pater noster, qui es in Cælis, sanctificetur nomen tuum.*

## XI.

In primo Pater noster mentem

ad Deum Patrem suum in cælis residentem elevent; & per memoriam innumerorum beneficiorum, quæ unicuique; & toti orbi benignissimus Pater in creatione, conservatione & gubernatione exhibuit, & quotidie exhibit, filialem quendam affectum excitent, intimè humiliè; desiderantes, ut primò à se ipfis, deinde à toto Clero nostro sæculari, & denique ab omnibus creaturis Deo Creatori suo omnis gloria deferatur; quemadmodum in cælis per illam unanimem vocem à tota curia cœlesti in æternum Sanctus, Sanctus, Sanctus proclamatur.

**SECUNDA PETITIO.**

*Adveniat regnum tuum.*

**XII.**

In secundo Pater noster præsentiae Dei, quam sibi priùs efformâ-

runt, insistentes, se ad Verbum Dei  
Incarnatum convertant; itidemq;  
per memoriam ingentium benefi-  
ciorum, quæ sibi ipsis totiq; gene-  
ri humano per redēptionem mi-  
sericordissimus Salvator contulit,  
ad majorem quandam amoris af-  
fectum mentem suam erigant; to-  
tō desiderio intimè cupientes, ut  
primò à se ipsis, tum à toto Clero  
nōstro sacerdotali, omniq; genere  
humano fidelissimè huic Filio Dei,  
amantissimo Salvatori serviatur,  
& in nomine ejus omne genu fle-  
ctatur, consequenter idem Salva-  
tor omnes homines (propter quo-  
rum salutem descendit de cælis)  
hic in teris, & ibi in cælis sibi re-  
gnūm facere benignissimè digne-  
tur.

**TERTIA PETITIO.**

*Fiat voluntas tua sicut in cælo. & in  
terra.*

**XIII.**

In tertio Pater noster ad Spiritum Sanctum conversi, per memoriam beneficiorum, quæ tam in Sanctificantis quam actualis gratiæ, & aliorum beneficiorum dispensatione specialiter unicuique, & toti mundo abundantissimè præsttit, & adhuc præstat, majore nisi ad amorem voluntatem suam inflamantes ardentissimè desiderent, ut hic Spiritus amantissimus, verus Deus, ab omnibus super omnia diligatur; & Sanctissima ejus voluntas, cum sit ineffabiliter bona, in cælo & in terra impleatur; cuius directioni sanctæ in omnibus conformari dulcissimum est, & his tribus petitionibus, Deo ob proprietatem Personarum, & appropria-

tionem beneficiorum , gloria, ser-  
vitium & amor præstari à nobis  
desideratur.

### QUARTA PETITIO.

*Panem nostrum quotidianum da nobis  
hodie.*

#### XIV.

Verùm , quia secundum Aposto-  
lum Paulum non sumus sufficiētes  
ex nobis aliquid cogitare, & tribus  
illis prædictis titulis divinæ Maje-  
stati sine ejusdem nova gratia fa-  
tisfacere; ideo in quarto Pater no-  
ster, non solum corporalem , sed  
magis etiam spiritualem panem,  
scilicet actualem gratiam ad Dei  
servitium necessariam , postulent:  
ad quām faciliū obtinendam , mo-  
re cuiusdam mendici, qui cum ol-  
lula ad divitis fores stare soiet, in  
consp ectu Sanctissimæ Trinitatis  
penitus humiliati se sistant , & o-

stendendo insufficientiam suam ,  
mediantibus omnibus Sanctis , in  
vas suum inane (quod est anima )  
donari sibi à Deo efficacem gra-  
tiam exposcant , quâ ipsi per de-  
carsum diei dignum servitium præ-  
stetur.

**QUINTA PETITIO.**

*Et dimitte nobis debita nostra ; sicut  
& nos dimittimus debitoribus nostris.*

**XV.**

Cùm verò scriptura dicat , nimi-  
umq; constet , nos omnes quotidie  
in multis offendere , quibus tripli-  
cem illum titulum divinæ Majesta-  
ti debitum per neglectum laudis ,  
per transgressionem legis , & de-  
niq; per teponem charitatis læ-  
dimus ; in quinto Pater noster quo-  
tidianorum defectuum veniam de-  
precantes , intimè à Deo postulent ,  
ut in nullo peccato mortali ab i-  
pso finaliter deserantur : hinc in-

star alicujus leprosi , qni in via ia-  
cet, & miseriam suam viatoribus  
monstrat, sua peccata, & imperfe-  
ctiones summo Sacerdoti Jesu  
Christo humillimis lachrymis o-  
stendant , firmissime secum statu-  
entes , omnibus injuriis per alios  
sibi illatis, semper ignoscere.

### SEXTA PETITIO.

*Et ne nos inducas in tentationem.*

#### XVI.

Penultimè , cùm via hominis sit  
militia super terram , viamq; cæli  
hostes sævissimi, mundus scilicet,  
caro & diabolus perpetuâ obsedio-  
ne infestent , quorum insidiis tot  
millia millium ad inferos tanquam  
spolia rapiuntur , neq; ignoremus,  
nobis etiam insidias esse paratas ad  
ruinam; ideo timentes Deum in vi-  
sceribus suis , ab eo humilimè pe-  
tant, ut tentationes benignissimè  
ayerte-

avertere dignetur , ne in eas indu-  
cantur, in quibus peccarent , aut  
finaliter perirent: hinc in conspé-  
ctu Dei, Omniumq; Sanctorum in  
comparatione suorum hostium se,  
tanquam parvulos , contra mille  
gigantes æstimabunt.

**SEPTIMA PETITIO.**

*Sed libera nos à malo.*

**XVII.**

Ultimò, quia nemo coronabitur,  
nisi, qui legitimè certaverit, in se-  
ptimo Pater noster ad calicem ten-  
tationum heroicè se Patri cælesti  
offerentes victoriam finalem , &  
tam liberationem à peccatis, quam  
damnatione æternâ vehementissi-  
mè postulent, desiderantes à malo  
æterno liberari. Et hæ quatuor  
petitiones ad tres ptimas, tanquam  
media ad finem , ordinatæ esse cer-  
nuntur.

## XVIII.

Quantum ad septem Ave Maria; in primo donum timoris Domini petant. In secundo, donum fortitudinis in arduis & adversis. In tertio, donum scientiae, cuius beneficio sciant, quid Deo suo in omni re sit acceptum, simulq; nequitias spirituales mundi, carnis & diaboli in cælestibus dignoscant; quibus debitâ prudentiâ præmuniti; congruè occurrere, & discernerentes bonum à malo, in bono malum vincere possint. In quarto, donum pietatis. In quinto, donum consilii. In sexto, donum intellectus, ad intelligendum, contemplandum, atq; interpretandum Sacras Scripturas. In septimo denique, donum Sapientiæ & libertatis Filiorum Dei, quâ omnes suas cogitationes, verba & actiones semper recte instituere noverint.

*Statio Nocturna.*

**XIX.**

Vesperi priusquam cubitum ibunt, ad recollectiones spiritus omnes revertantur; gratias agentes Deo pro beneficiis, quæ per decursum diei in nos contulit. In hunc finem unam partem Psalterii Beatae Virginis Mariæ, & Psalmum De profundis, unâ cum duabus collectis (modò infra tradendo) comprehendentur; quibus nocturnum Examen conscientiæ, & quinque Pater & Ave adjungent.

**MODUS RECITANDI**

*Psalterium Beatæ Virginis  
Mariæ per hebdomadem.*

*De exercitio primæ partis Psalterii  
ad diem Lunæ, & Jovis ordinato.*

**XX.**

**C**um fides sit fundamentum reliquarum virtutum, Psalterium à Symbolo Apostolorum ordiantur; sub quo mentem ad Deum elevent, & Stationem suam spiritualem in conspectu Sanctissimæ Trinitatis, Christi Domini, Beatæ Mariæ Virginis, Omniumq; Sanctorum instituant; ostendentes Patri Cælesti mundum cum omnibus statibus, veluti quandam domum leprosis, aliisq; morbidis innume-ris scatentem, pro quibus sunt deprecaturi.

**XXI.**

Ut majorem efficaciam eorum petitiones apud Deum Patrem fortiantur , post Symbolum Apostolorum , sicut & post singulas Decades, unum Pater noster addant, sub quo Filium Dei Unigenitum Jesum Christum; utpote infiniti pretii victimam , in Cruce & Altari immolatam , Patri cælesti offerant, cùjus intuitu ad commiserationem flectatur; non enim negabit, quæ per Filium ejus , in quo sibi super omnia complacuit , ad illius gloriam , & animarum salutem, petiverint.

**XXII.**

Primam Decadem pro errantibus in fide persolvant, deprecantes Beatam Virginem Mariam , ut per meritum & gaudium , quo Filium Dei concepit, à divina bonitate impetrare velit gratiam, quâ convertantur. Sunt autem hujusmodi in

triplici differentia , primò Pagani,  
Ethnici & Athei, qui vero Deo de-  
bitam gloriam auferunt. Secundò  
Judæi, qui sua incredulitate Filium  
Dei , & Sanctissimam Trinitatem  
blasphemant. Tertiò Hæretici, qui  
Ecclesiam & Spiritum Sanctum  
contemnunt. Quæ tria genera in-  
fidelium , per Gentes , Populos &  
lingvas in Sacra Scriptura notan-  
tur. Hanc injuriam, quam isti Deo  
quotidie inferunt , pensantes , ve-  
hementer Divinam bonitatem, me-  
diante Christo Domino , & Beata  
Virgine Maria , ad miserationem  
perurgeant, desideria amoris & do-  
loris diversa coram Curia cælesti  
exponendo , prout unicuiq; præ-  
sens devotio suggesserit.

### XXIII.

In secunda decade pro conver-  
sione peccatorum intercedant , qu-  
in aliquo peccato mortali existeni

tes , imaginem Dei supernaturalem abjecerunt, serviq; diabolorum effecti , Creatorem suum, & Dominum dereliquerunt cum extrema ingratitudinis nota, quam dolorosè secum pensent , & intimâ affectu teneritudine Beatæ Virginis Mariæ inexplicabilem peccatorum miseriam ostendant; unicè solicitantes , quatenus per meritum & gaudium , quo Filium suum Iesum in utero Virginali portavit, cælestem gratiam à Deo exorare dignetur , quæ eos è statu damnationis resungere, & jugum servitii divini portare faciat.

XXIV.

In tertia Decade pro imperfetis orent, & Beatæ Mariæ Virginis ostendant omnes status Ecclesiæ humillimè supplicantes, ut per meritum & gaudium , quo Filium suum genuit , & in lucem edidit,

imperfectionibus nimis, quibus omnes status carnali hoc sæculō, quasi ad ocaſum vergente, redundant, remedium à Deo impetrare velit; viros scilicet perfectos, qui singulos status veluti stellæ illuminent, dirigant & ad antiquum spiritū vigorem reducant.

## XXV.

Quartam Decadem pro fagis, maleficiis, & aliis obstinatis peccatoribus persolvant; considerantes, quanta ex hoc capite malorum injuria Domino Deo fiat, Beatam Virginem Mariam intenso quodam doloris affectu rogent, quatenus per meritum & gaudium præsentationis, hujusmodi miseras animas Filio suo ad misericordiam præsentare, & in posterum suo patrocinio impedire velit, ne homines taliter seducantur.

XXVI.

In quinta Decade pro innocentia juventute, & aliis in gratia Dei existentibus supplicant; deprecantes Matrem Christi, ut per meritum & gaudium Inventionis, à Filio suo omnibus gratiam, & custodiam contra lapsum in peccatum mortale impetrare dignetur, semperque Filius inveniatur in suo templo, quod sunt animæ justorum.

*De Exercitio secundæ partis  
Psalterii Beatae Virginis Ma-  
riae, pro die Martis & Vene-  
ris.*

XXVII.

Decadem sextam pro universo statu Clericali recitent, & ad pedes Matris Dei supplicibus lacrymis provoluti, ingentes hujus status miserias illi ostendant, simulq,

petant, ut hanc nostram vitam  
Clericalem, tanquam Domina, Ma-  
gistra, & Mater nostra, suo Filio  
unicè velit commendare, & con-  
tra hostes suos defendere.

## XXVIII.

Decadem septimam pro iis, qui  
præfunt, & pro confessariis offe-  
rant, divinam assistentiam solici-  
tantes, quā officia sua ad beneplac-  
itum Dei, & salutem animarum  
dignè perficiant, vulneribusq; pec-  
catorum congruè medeantur.

## XXIX.

Decadem octavam pro statu Vir-  
ginum, & continentium orent, ro-  
gantes Christum spinis corona-  
ti m, ut tanquam Rex Virginum,  
per dolorem spineæ coronæ omni-  
bus gratiam & custodiā suæ vir-  
ginitatis & & continentiae largiri  
velit.

## XXX.

Decadem nonam pro iis, qui de

præsenti , aut de futuro , in aliquo  
mundi angulo propter fidem , &  
Justitiam , tanquam Martyres pa-  
tiantur , persolvant ; similiter gra-  
tiam cæteris hominibus petant ,  
quâ unusquisq; crucem suam tol-  
lat , & Christum ad mortem usq;  
patienter sequatur .

XXXI.

Jn decima decade non solùm  
Jmperii Romani , Regnorum &  
Principatum dilacerationem ; ve-  
rùm etiaam in fide , & moribus dis-  
sonantiam deplorent ; humillimèq;  
Christum Crucifixum rogent , ut  
omnia ad se trahere , & per humili-  
tatem crucis superbiam & æmu-  
lationem statuum confundere , ac  
pacem unitatemq; benignissimè  
imperitiri dignetur .

*De Exercitio tertiae partis  
Psalterii Beatae V. M. pro die  
Mercurii & Sabbati.*

## XXXII.

In undecima Decade finalem perfeverantiam in bono spiritu poscant, quemadmodum David precatus est dicens: Cor mundum crea in me Deus, & spiritum rectum innova in visceribus meis. Ne propicias me à facie tua, & Spiritum Sanctum tuum ne auferas à me. Redde mihi lætiam salutaris tui, & spiritu principaliter confirma me.

## XXXIII.

In duodecimâ decade pro parentibus, fratribus & sororibus; propinquis, & benefactoribus, pro omnibus sibi commissis & commendatis memoriam faciant; gratiam ipsis exposcentes, quâ sic transellant per bona temporalia, ut non amittant æterna.

## XXXIV.

In decimâ tertia Decade per viscera misericordiæ Dei à Christo,

mediante Beata Virgine Maria, pente-  
tant, ne Spiritum S. suum à Polo-  
nia auferat, sed misericorditer à  
spiritibus immundis hæreticorum,  
falsorumq; Christianorum liberet;  
largiendo ipsi Spiritum Veritatis,  
Sanctitatis, Charitatis; Spiritum  
Sapientiæ, unitatis & consilii.

XXXV.

In decima quarta Decade sup-  
plicant Beatæ Virginis Mariæ pro  
morientibus, ut per gaudium suæ  
gloriosæ Assumptionis illis assistere,  
& gratiam benè moriendi à Filio  
suo impetrare velit, ut post hanc  
vitam ab Angelis in cælum susci-  
piantur. XXXVI.

In decima quinta Decade pro a-  
nimabus adhuc in purgatorio de-  
tentis commemorationem institu-  
ant; deprecantes Matrem Dei, ut  
per gaudium Coronationis suæ,  
miseris animabus liberationem à

pænis purgatorii, & coronam vi-  
tæ æternæ apud Filium suum soli-  
citare dignetur.

## XXXVII.

Cæterū die Dominica, antequam cubitum concedant, locò Psalterii Beatae Virginis Mariæ, Salvatorem suum Jesum Rosariolō ex triginta tribus Pater noster constante venerentur; postulentq; ab eodem gratiam, quā ad plenitudinem meritorum pervenire, & in stadio sic currere possint, ut braviū vitæ æternæ apprehendant.

## XXXVIII.

Post Psalterium B. V. Mariæ Psalmum *De profundis*, cum duabus Collectis, nempe *Deus veniæ largitor* &c, & *Fidelium Deus* &c quotidie addant; ut animæ fidelium defunctorum, maximè aliis auxiliis destitutæ à pænis solvantur.

*De Examine nocturno.*

XXXIX.

In hoc Examine, veluti in speculo quodam gressus suos retro considerent; doleantq; vehementer de admissis delictis, & de futuris cavere firmiter per divinam gratiam proponant.

XL.

Quinque Pater, & Ave pro peccatis, & admissis defectibus in honorem quinque vulnerum Christi adjungant, & sensuum suorum, tam internorum, quam externorum puritatem petant.

XLI.

Per hæc statuta exercitia quotidiana Spiritualia ad quandam solitudinem cordis perpetuam, ac recollectionem mentis, nobis in medio turbarum viventibus summè necessariam, omnes pro viribus conentur; ad cuius consecutionem

plurimum juvabit, si tam precibus  
jaculatoriis, & divinæ præsentiaæ  
familiaritati, quàm etiam piarum  
stationum, & personarum effictio-  
ni (modò paulò post tratendo)  
circa humanas suas occupationes  
ritè assuefcant: sic, ut in omnibus,  
salvâ externarum actionum liber-  
tate, conversatio eorum sit in cæ-  
lis.

## DE DIVERSIS ORANDI MODIS.

*Quibus ad collectionem mentis,  
& conservationem Spiritus,  
pro diversitate temporum, lo-  
corum, personarum, & con-  
versationum utentur.*

### PRIMUS MODUS.

**P**rimus orandi modus est, quô a-  
nima ex peccatis suis vel ali-

enis , mentem ad Deum elevat , agnoscendo reatum , deprecandoq; veniam , & humiliando se infra omnia propter nimiam vilitatem suam: sic oravit Manasses in captivitate sua, David, & alii, quos imitari semper utiliter possumus, quando peccatorum nostrorum , vel mundi in maligno positi recordamur.

Secundus orandi modus est , si anima nostra ex beneficiis & creaturis Dei ascendat ad Creatorem suum , laudando eundem & admirando ejusdem sapientiam , & bonitatem, &c. Ita oraverunt tres pueri in camino ardenti , fuitq; communis viris Sanctis.

Tertius orandi modus est, quando anima interdiu in temptationibus, aut ad conservandam mentis recollectionem , inter sua negotia precatiunculis utitur: sic orare fuit S. Franciscus , dicendo, *Deus meus, & omnia.*

Quartus orandi modus in eo consistit, ut circa actiones suas, & res quascumque obvias, anima considerationem congruam, & spiritualem, ac utilem suscipiat, quâ mens semper (salvâ functionum debitâ libertate) unita maneat cum suo Creatore dilecto. Ad acquirendum hunc orandi modum multum juvat bona facultas imaginativa, quâ homo sibi vg. in paupere Christum; in Creatura Deum; in leproso peccatorem; in ancilla Martham; in igne infernum; in assato damnatos, in tuba judicem, &c. Spiritualiter effingat.

Quintus orandi modus fit per quandam determinatam vocum & temporum commensurationem: ut si orem Pater noster, Ave Maria, Psalmum; Breviarium, Rosarium &c. Offerendo illud tanquam verba sancta, quibus adoratur Deus

in ejusdem laudem debitam (absque eo, quod intelligam verba, ad eaque attendam, alteri honestae, pieque considerationi intentus) vel adstringendo mentem ad sensum & affectus, qui ex prolatione verborum per apprehensionem simplicem formantur; vel expendendo interim certae alicujus vocis, ac sententiæ prolatæ significationem; personæ ad quam dirigitur Oratio, dignitatem; vel mei ipsius vilitatem & indigentiam.

### DE MODO MEDITANDI.

Primò, qui cupit benè meditari, pridie statutò tempore certam sibi materiam feligere, eamque in unum, duo, vel etiam plura puncta, pro materiae capacitate, dividendo, prævidere debet: aliquò modo unum, vel alterum finem, quem varietas, vel fæcunditas materiae

per apprehensionem quandam simplicem solet proponere.

Secundò; in meditatione anima sui ipsius proprius concionator est, unde meditationis scopus eò tendit; ut per eam homo in aliqua veritate Christiana erudiatur, & clarus illuminetur; vel instruatur in moribus; vel deniq; magis accendatur in charitate erga Deum, & proximum, ex dictis, factisq; Christi, & Sanctorum ejus; quæ proponuntur.

Tertiò; mane statutâ horâ aggradiatur quis meditationem, præmissa invocatione Spiritûs S. de puncto ad punctum exerceat memoriā, intellectum & voluntatem; quæ potentiae quandoq; pro opportunitate à phantasia juvantur.

Quartò; memoria profert in medium materiam paratam ad meditationem faciendam, & cùm neces-

sitas exigit, alia vel lecta, vel au-  
dita, quæ ad rem faciunt, & me-  
ditationem uberiorem reddunt,  
congruè suggerit.

Quintò; intellectus ratiocinatur  
circa materiam à memoria propo-  
ositam, apprehendendo, judicando,  
concludendo, rem unam ex alia de-  
ducendo. Ea porrò, circa quæ ver-  
fatur operatio-intellectus, in iis me-  
ditationibus, quæ non pertinent ad  
mysteria Christi, vel Sanctorum; va-  
ria sunt, pro varietate punctorum;  
in mysteriis solent esse personæ,  
verba & opera personarum, earun-  
demq; cogitationes, & affectus in-  
terni : virtutes quoq; modus præ-  
terea, & finis verborum, ac ope-  
rum: item causa, effectus, tempus  
& reliquæ circumstantiæ, quæ fa-  
ciunt ad pleniorem mysterii intel-  
ligentiam. Illud ordinarium est in-  
tellectui in omnibus cujuscunque

materiæ , & generis meditationibus, ut in sua ratiocinatione utatur rationibus, exemplis, & similitudinibus ex Scripturâ , vel libris SS. PP. aliorumq; nobilium Scriptorum desumptis , ut sic intellectâ & benè perspectâ veritate, varia motiva proponat voluntati; donec eam vincat , & ad prosecutionem, vel fugam rei intellectæ prorsus adducat.

Sextò; voluntas afficitur ex iis, quæ intellectus proponit: excitando in se ipsa amorem , vel odium: desiderium, vel fugam , gaudium, vel tristitiam, spem, vel desperationem; audaciam, vel timorem; aut iram , pro varietate rerum ac motivorum, quæ ab intellectu proponuntur. Dilatari autem possunt hujusmodi affectus multis modis: e. g. admirationis , humilationis, imitationis, laudis, obsecrationis,

petitionis, prosopopeiae, quere& reprehensionis, objurgationis, gratiarum actionis, &c. eosdem conformatiter triplici viæ, purgativæ, illuminativæ, & unitivæ exercendo & attemperando.

Septimò, phantasia proponit loca; vultusq; personarum, earumq; motus, situm, magnitudinem; gravitatem, pro exigentia reliquarum trium potentiarum, ut efficacius & cum vivacitate exerceantur.

Octavò, colloquia etiam solent esse in meditatione plura, vel pauciora: in eoque, consistunt, ut meditans, quotiescumque suggestus, in toto meditationis decursu, & in ejus fine, colloquatur cum Deo, Christo, vel cum B. Virgine Maria, aut cum Sanctis Angelis, reliquisq; Sanctis, sive gratias agendo, sive offerendo, sive petendo, sive obsecrando, sive consulendo.

do , sive aliquid aliud agendo pro  
opportunitate & exigentia medi-  
tationis , & propriæ necessitatis:  
aliquando assumendo personam fi-  
lli agentis cum patre : aliquando  
servi, loquentis cum Domino; ali-  
quando sponsæ, loquentis cum  
sponso ; aliquando amici, conver-  
fantis cum amico ; aliquando rei,  
deprecantis judicem; aliquando le-  
prosi, deprecantis suum Medicum:  
aliquando mendici stantibus ante do-  
mum divitis, &c. juxta Spiritus S.  
dictamen. Concludentur autem  
colloquia , quæ sicut in fine medi-  
tationis, vocali aliqua oratione ad  
eas personas , quibuscum facta  
suerunt colloquia.

MANI-

**M A N I P U L U S**

*Piarum Precum & Exercitiorum.*

**Pro usu Clericorum Sæcularium in  
Commune viventium.**

**STATIO MATUTINA.**

*Mane prima evigilantium cogitatio  
sit ad Deum hæc precatiuncula.*

**B**enedicta sit Sancta , & individua Trinitas , nunc & semper, & per infinita sæcula sæculorum, Amen.

*Dum surgunt; signent se signo sanctæ Crucis dicantque.*

**In nomine Patris , & Filii , & Spiritus Sancti, Amen.**

**In nomine Domini mei JESU Christi surgo , qui me redemit suò pretioso sangvine; ille me benedicit, regat, custodiat, & ad vitam perducat æternam, Amen. F**

Dum se vestibus induunt, finem suum  
ultimum recogitantes, Deo se & o-  
mnia sua offerant, sequenti precatione.

**O** Dominus meus, Deus meus,  
& omnia, justitia mea, boni-  
tas mea & misericordia mea: fiat à  
te, ut in unione meritorum vitæ,  
Passionis, Resurrectionis, & Ascen-  
sionis Domini nostri Jesu Christi,  
sicut & sub patrocinio Beatissimæ  
Virginis Mariæ, ac Sanctorum Se-  
raphim, Cherubim, Thronorum,  
Dominationum, Virtutum, Pote-  
statum, Principatum, Archange-  
lorum, Angelorum, Patriarcha-  
rum, Prophetarum, Apostolorum,  
Martyrum, Confessorum, Virgi-  
num & Viduarum, omnes mei tam  
boni, quam indifferentes cogita-  
tus, intentiones, suspiria, vota,  
preces, & exercitia, verba, opera,

omissiones, comodiæ, incommoda, tentationes, angustiae, adversitates, contemptus, irrisiones, una cum omnibus devotorum tuorum precibus, laboribus, tribulationibus, & quibuscumq; necessitatibus ad majorem Sanctissimi Nominis tui gloriam unice cedant, & tu tantum Deus meus agnoscaris ab omnibus, timearis, ameris, lauderis Benedictus Deus, qui vivis & regnas in sæcula sæculorum, Amen.

*Ad Beatissimam Virginem.*

**O** Domina mea Sancta Maria, me in tuam benedictam fidem, ac singularem custodiam, & in simum misericordiae tuæ, hodie & quotidie, & in hora exitus mei, animam meam & corpus meum tibi commendo: omnem spem & consolationem meam, omnes angu-

F ij

stias, & miserias meas, vitam & finem vitae meae Tibi committo, ut per Tuam sanctissimam intercessione & per Tua merita, omnia mea dirigantur, & disponantur eloquia, cogitationes & opera, secundum tuam Tuique Filii voluntatem, & meam ac totius Ecclesiae utilitatem ac necessitatem, Amen.

*Ad S. Angelum Tutelarem.*

Angele Dei, qui Custos es mei,  
me tibi commissum pietate superna  
hodie illumina, custodi, rege, &  
guberna.

*Vel*

Angele mi custos tuæ me commendando tutelæ, cui me custodiendum Divina Bonitas commendavit: duc, quæso, cæcum, ignorante instrue, imbecillum conforta, pupillum tuere, errantem reduc, pigrum impelle, dormientem excita, gradientem promove; & ex-

tremam illam difficilemque; luctam,  
quæ cum morte & dæmone mihi  
aliquando futura est, felicem esse  
procura, ut in vestrum confor-  
tium anima mea, cùm vicerit, re-  
cepta lætè decantet: laqueus con-  
tritus est, & nos liberati sumus  
Amen.

*Ad Omnes Sanctos.*

Sancti Dei omnes intercedant  
pro nobis ad Dominum, ut nos me-  
reamur ab eo adjuvari, & salvari,  
qui vivit & regnat in sæcula sæ-  
culorum Amen.

*Vel*

Sancti & electi Patroni mei, N.N.  
& omnes Sancti, rogo vos & de-  
precor, subvenite mihi, miseremi-  
ni mei, corrigite & erigite me mi-  
sericorditer, & orate pro me in-  
stanter, ut per vos mihi detur à  
Deo conscientia sancta, gratia Spi-  
ritus Sancti, virtus Sacramento-

rum, augmentum gratiæ, virtutum Theologicarum, & Cardinallium studium, conversatio honesta, vita honorabilis, & consummatio laudabilis, ut ad vos pervenire merear, Per Christum Dominum nostrum, Amen.

*Dum se lavant.*

*Aspirent ad Dominum Deum, & petant puritatem cogitationum, & re-ctitudinem verborum, & operum Sanctitatem hanc aratione.*

Munda Domine cor meum, ac labia mea, ut te ac tua tantum cogitem; & quod cor sentit interius, hoc lingua proferat exterius. Da virtutem manibus meis ad abstergendam omnem maculam, ut sine pollutione mentis & corporis Tibi servire valeam, Amen.

*Ad aspercionem aquæ benedictæ.*

*Asperge me Domine rore gratiæ Tuæ, munda me à peccatis; do-*

Ieo erim, quod Te , quem super  
omnia diligo , unquam offendere-  
rim: extingue in me omnem affe-  
ctum tibi adversum, ut Te solūm  
amem & glorificem in perpetuum,  
Amen.

*Deinde ante Altare domesticum  
flexis genibus alternatim pro felici  
morte recitent Litanias Lauretanas.*

LITANIE LAURETANÆ.

**K**yrie eleyson ,  
Christe eleyson ,  
Kyrie eleyson ,  
Christe audi nos ,  
Christe exaudi nos ,  
Pater de cælis, Deus, misere nobis  
Fili redemptor mundi Deus, mife-  
rere nobis .  
Spiritus S. Deus , miserere nobis ,  
Sancta Trinitas unus Deus , mife-  
rere nobis .

Sancta Maria, Ora pro nobis  
 Sancta Dei Genitrix,  
 Sancta Virgo Virginum,  
 Mater Christi,  
 Mater Divinæ gratiæ,  
 Mater purissima,  
 Mater castissima  
 Mater inviolata,  
 Mater intemerata,  
 Mater amabilis,  
 Mater admirabilis,  
 Mater Creatoris,  
 Mater Salvatoris;  
 Virgo prudentissima,  
 Virgo veneranda  
 Virgo prædicanda,  
 Virgo potens,  
 Virgo clemens,  
 Virgo fidelis,  
 Speculum justitiæ,  
 Sedes Sapientiæ,  
 Causa nostræ lætitiae,  
 Vas Spirituale

Ora pro nobis

Ora pro nobis

Vas honorabile,  
Vas insigne devotionis  
Rosa mystica,  
Turis Davidica,  
Turis eburnea,  
Domus aurea,  
Fæderis arca,  
Janua cæli,  
Stella matutina,  
Salus infirmorum  
Refugium peccatorum,  
Consolatrix afflictorum.  
Auxilium Christianorum,  
Regina Angelorum,  
Regina Patriarcharum,  
Regina Prophetarum,  
Regina Apostolorum,  
Regina Martyrum,  
Regina Confessorum,  
Regina Virginum,  
Regina Sanctorum omnium.

*Regina uite nostre letalis*  
*Agnus Dei, qui tollis peccata*  
*mundi, parce nobis Domine.*

Ora pro nobis

Ora pro nobis

Agnus Dei , qui tollis peccata  
mundi exaudi nos Domine.

Agnus Dei , qui tollis peccata  
mundi, miserere nobis.

Christe audi nos ,  
Christe exaudi nos ,  
Kyrie eleyson.  
Christe eleyson.  
Kyrie eleyson.

*Ave Maria , &c.*

*Antiphona.*

**S**ub Tuum præsidium confugim⁹,  
Sancta Dei Genitrix : nostras  
deprecationes ne despicias in ne-  
cessitatibus nostris , sed à pericu-  
lis cunctis libera nos semper Vir-  
go gloriofa & benedicta.

**V.** Ora pro nobis Sancta Dei  
Genitrix

**R.** Ut digni efficiamur promis-  
sionibus Christi.

*Oremus.*

**G**ratiam Tuam, quæsumus Domine, mentibus nostris infunde; ut, qui, Angelo nuntiante, Christi Filii tui Incarnationem cognovimus, per passionem ejus & Crucem ad resurrectionis gloriam perducamur. Per eundem Christum Dominum nostrum, Amen.

v. Ora pro nobis Beatissime Joseph.

r. Ut digni efficiamur promissionibus Christi.

*Oremus.*

**S**anctissimæ Genitricis Tuae Sponsi, quæsumus Domine, meritis adjuvemur; ut, quod possibilitas nostra non obtinet, ejus nobis intercessione donetur. Qui vivis & regnas in sæcula sæculorum, Amen.

*Addantur sequentes versiculi & responsoria cum oratione pro Ordinario loci.*

V. Salvum fac famulum tuum N.

R. Deus meus sperantem in te.

V. Esto ei, Domine , turris fortitudinis

R. A facie inimici.

V. Nihil proficiat inimicus in eo.

R. Et filius iniquitatis non apponat nocere ei.

V. Domine exaudi orationem meam

R. Et clamor meus ad te veniat,

*Oremus.*

**O**mnipotens sempiterne Deus,  
qui facis mirabilia magna so-  
lus prætende super famulum tuum  
N. & super gregem ei commissum,  
Spiritum gratiæ salutaris ; & ut in  
veritate tibi placeat , perpetuum

ei rorem tuæ benedictionis infunde. Per Dominum nostrum Jesum Christum Filium tuum, qui tecum vivit & regnat in unitate ejusdem Spiritus Sancti Deus per omnia saecula saeculorum, Amen.

V. Nos cum prole pia

R. Benedicat Virgo Maria.

*H*isce precibus finitis, probet  
se examinent sub silentio in  
tribus pondis.

Primò Quomodo fraterita nocte,  
antequam cubitum concesserunt, con-  
scientiam suam examinaverint.

Secundò, Quomodo preces & exer-  
citia compleverint, & in quibus co-  
gitationibus atque desideriis dormi-  
tum se contulerint.

Tertiò, Quomodo se noctu, & mane  
usque ad examen gesserint.

Conscientiā sic discussa super pec-  
cata memorata & alia totius vita,

*contritionem eliciant, cum firmo pro-  
posito emendationis.*

*Praxis actus contritionis frequen-  
ter exercendi.*

**O** Amantissime Jesu, doleo ex  
toto corde meo, quod te De-  
um meum, Creatorem meum, Sal-  
vatorem meum, summum bonum  
meum, hisce peccatis meis, quae  
detestor super omnia detestabilia,  
offenderim: Ideo in Abyssum mi-  
sericordiae tuae me conjicio, & pro-  
pono firmiter amplius non peccare  
omnesq; peccandi occasionses devi-  
tare, vel centies mori. Speciatim  
gratiam tuam invoco, qua me ab  
hoc N. vitio, quod Majestati tuae in  
me multum displicet, potenter  
hac die, & tota vita mea praeser-  
ves, & virtutem N. eidem con-  
trariam misericorditer animo meo

inferas. Qui vivis & regnas in sæcula sæculorum. Amen.

*Denique subjungant tria Pater, & Ave; in honorem Sanctissimæ Trinitatis pro augmento trium virtutum Theologicarum Fidei, Spei, & Charitatis; ac rectitudine cogitationum, verborum & operum, item pro lumine, gratia & benedictione supernaturali, tanquam medio ad bonum usi. triplicis hujus operacionis nostræ valde necessario, impe- trandis.*

## STATIO MERIDIANA

*Uno quadrante ante corporis refectionem meridianam, redeant ad altare domesticum, & flexis genibus. clara voce pro impetranda unitate ac charitate fraterna inter membra hujus vitæ clericalis Litanias Omnium Sanctorum recitent.*

LITANIÆ SANCTORUM  
OMNIUM.

**K**yrie eleyson  
Chryste eleyson.

Kyrie eleyson.  
Christe audi nos.  
Christe exaudi nos.

Pater de cælis Deus , miserere no-  
bis.

Fili Redemptor mundi Deus , mi-  
serere nobis.

Spiritus Sancte Deus , miserere  
nobis.

Sancta Trinitas unus Deus , mise-  
rere nobis.

Sancta Maria. Ora pro nobis.

Sancta Dei Genitrix,

Sancta Virgo Virginum,

Sancte Michæl, ora.

Sancte Gabriel, ora.

Sancte Raphael, ora.

Omnes Sancti Angeli & Archan-  
geli, Orate pro nobis.

Omnes Sancti Beatorum Spirituum  
Ordines, Orate pro nobis.  
Sancte Joannes Baptista, ora.  
Sancte Joseph, ora.  
Omnes Sancti Patriarchæ, & Pro-  
phetæ, Orate pro nobis.  
Sancte Petre, ora.  
Sancte Paule, ora.  
Sancte Andrea, ora.  
Sancte Jacobe, ora.  
Sancte Joannes, ora.  
Sancte Thoma, ora.  
Sancte Jacobe, ora.  
Sancte Philippe, ora.  
Sancte Barholomæe, ora.  
Sancte Mathæe, ora.  
Sancte Simon, ora.  
Sancte Thadæe, ora.  
Sancte Mathia, ora.  
Sancte Barnaba, ora.  
Sancte Luca, ora.  
Sancte Marce, ora.  
Omnes Sancti Apostoli, & Evan-  
gelistæ. Orate pro nobis.

Omnes Sancti Discipuli Domini  
Orate pro nobis.

Omnes Sancti Innocentes, ora.

Sancte Stephane, ora.

Sancte Laurenti, ora.

Sancte Vincenti, ora.

Sancti Fabiane & Sebastiane, ora.

Orate pro nobis.

Sancti Joannes, & Paule. orate.

Sancti Cosma & Damiane, orate.

Sancti Gervasi & Protasi, orate.

Omnes Sancti Martyres. orate.

Sancte Silvester, ora.

Sancte Gregori, ora.

Sancte Ambrosii, ora.

Sancte Augustine, ora.

Sancte Hieronyme, ora.

Sancte Martine, ora.

Sancte Nicolae, ora.

Omnes Sancti Pontifices, & Confessores. orate pro.

Omnes Sancti Doctores, ora.

Sancte Antoni, ora.

Sancte Benedicte. ora.

Sancte Bernarde. ora.

Sancte Dominice, ora.

Sancte Francisce, ora.

Omnes Sancti Sacerdotes & Levite. Orate pro nobis.

Omnes Sancti Monachi, & Eremitæ, Orate pro nobis.

Sancta Maria Magdalena, ora.

Sancta Agatha, ora.

Sancta Lucia, ora.

Sancta Agnes, ora.

Sancta Cæcilia, ora.

Sancta Catharina, ora.

Omnes Sanctæ Virgines, & Viduæ, Orate pro nobis.

Omnes Sancti & Sanctæ Dei, intercedite pro nobis.

Propitius esto, parce nobis Dom:

Propitius esto, exaudi nos Domine

Ab obmni malo, libera nos Dom:

Ab omni peccato lib.

Ab ira tua, lib.

- A subitanea & improvisa morte lib.  
Ab infidiis diaboli, lib.  
**A** b ira & odio , & omni mala vo-  
luntate. lib.  
**A** spiritu fornicationis lib.  
A fulgure & tempestate. lib.  
A morte perpetua, lib.  
Per mysterium Sanctæ Incarnatio-  
nis tuæ. lib.  
Per Adventum tuum. lib.  
Per Nativitatem tuam, lib.  
Per Baptismum & Sanctum Jeiu-  
nium tuum, lib.  
Per Crucem & passionem tuam, lib.  
Per mortem & sepulturam tuam,  
libera nos Domine.  
Per sanctam Resurrectionem tuam,  
libera nos Domine.  
Per admirabilem ascensionem tu-  
am , libera nos Domine.  
Per adventum Spiritus sancti Pa-  
racleti, libera nos Domine.  
In die Judicii. lib.

Peccatores, Te rogamus audi nos.  
Ut nobis parcas, te rog.  
Ut nobis indulgeas. te rog.  
Ut ad yeram pœnitentiam nos per-  
ducere digneris, te rog.  
Ut Ecclesiam tuam sanctam rege-  
re, & conservare digneris,  
te rogamus audi nos.  
Ut Domnum Apostolicum, & omnes  
Ecclesiasticos Ordines in san-  
cta Religione conservare di-  
gneris, te reg.  
Ut inimicos Sanctæ Ecclesiæ nu-  
miliare digneris, te rog.  
Ut Regibus & Principibus Christia-  
nitis pacem & veram con-  
cordiam donare digneris, te  
rogamus audi nos.  
Ut cuncto populo Christiano pa-  
cem & unitatem largiri digne-  
ris, te rogamus audi nos.  
Ut nosmetipsos in tuo sancto ser-  
vitio confortare & conserva-  
re digneris, te rogamus audi

Ut mentes nostras ad cælestia de-  
sideria erigas, te rog.

Ut omnibus benefactoribus nostris  
sempiterna bona retribuas.  
Te rogamus audi nos.

Ut animas nostras, fratrum, pro-  
pinchorum & benefactorum  
nostrorum ab æterna damnatione  
eripias, te rogamus au-

Ut fructus terræ dare, & conser-  
vare digneris, te rog.

Ut omnibus fidelibus defunctis re-  
quiem æternam donare di-  
gnaris, te rogamus audi nos

Ut nos exaudire digneris, te rog,  
Fili Dei. te rog.

Agnus Dei, qui tolis peccata mun-  
di, parce nobis Domine.

Agnus Dei, qui tollis peccata mun-  
di, axaudi nos Domine.

Agnus Dei, qui tollis peccata mun-  
di, miserere nobis.

Christe audi nos.

Christe exaudi nos.

Kyrie eleysor.

Christe eleysor.

Kyrie eleysor.

Pater noster.

V. Et ne nos inducas intentationem.

R. Sed libera nos à malo.

V. Lætamini in Domiro, & exultate justi.

R. Et gloriāmini omnes recti corde.

*Item oculis Oremus.*

**O**mnipotens sempiterne Deus,  
qui nōs omnium Sanctorum  
tuorum ~~memoria~~ <sup>ritu</sup> sub una tribuisti  
commemoratione venerari, quæ  
sumus, ut desideratam nobis tuæ  
propitiationis abundantiam multi-  
plicatîs intercessoribûs largiaris.  
Per Christum Dominum nostrum.  
Amen.

*Oratio pro Ordinario Loci, ut  
suprà fol: 132.*

V. Divinum axilium maneat semper nobiscum. R. Amen.

*Postea fiat examen breve, an proposita matutina in effectum deduxerint, et ubi deviaverint: quibus comprehensis contritionem eliciant & reliquum saltem diei cursum bene consummare intendant.*

### CONTRITIONIS ACTUS Brevior.

**O**Jesu! amore tui doleo, quod offenderim Te, quem super omnia diligo: cupio omnia mea peccata, praesertim haec N. emendare tibi que pro iis satisfacere per auxilium gratiae tuae Amen.

*Continuò subjungant. 7. Pater & Ave. Per 7. Pater noster recogitent septem petitiones ejus, ita ut unicuique Pater noster sua petitio correspondeat.*

*Prima.*

**P**ater noster, qui es in caelis:  
Sanctificetur nomen tuum.

*Secunda.*

Adveniat regnum tuum.

*Tertia.*

Fiat voluntas tua, sicut in cælo & in terra.

*Quarta.*

Panem nostrum quotidianum da nobis hodie.

*Quinta.*

Et dimitte nobis debita nostra,  
sicut & nos dimittimus debitori-  
bus nostris.

*Sexta.*

Et ne nos inducas in tentatio-  
nem.

*Septima.*

Sed libera nos à malo, Amen.

*Per septem Ave Maria rogent Bea-  
tissimam Virginem Matrem Dei, ut  
impetrare velit à delectissimo Filio  
suo septem dona Spiritus Sancti.*

*a. Petant donum timoris Do-  
mini.*

2. *Donum fortitudinis in arduis & adversis.*

**PY**

3. *Donum scientiae.*

4. *Donum pietatis.*

5. *Donum consilii.*

6. *Donum intellectus.*

7. *Donum sapientiae, & libertatis filiorum Dei.*

### STATIO VESPERTINA.

*S*ingulis diebus vespere ad medium sextam, adolescentes majorum classium in loco ad hoc deputato omnes conveniant, & pro incremento gratiae in vocatione sua Clericali Vesperas & Completorium, cum matutino & Landibus in diem sequentem ex Officio parvo Beatæ MARIAE Virginis alternatim recitent.

*Antequam cubitum eunt, revertantur ad altare domesticum; & Deo pro acceptis beneficiis gratias acturi,*

• Manipulus piar: precum 147

unam partem Psalterii Beatissimæ  
Virginis Mariæ, & Psalmum de  
Profundis alternatim comprecentur:  
quibus in silentio annexent examen  
nocturnum. & quinque.

Pater & Ave.


### MODUS RECITANDI

*Psalterium Beatissimæ.*

### VIRGINIS MARIE.

Formatō imprimis devotè si-  
gnō Sandæ Crucis, dicitur sym-  
bolum Apostolorum, seu  
Credo, tum Pater noster.

Hæc tria puncta bene notanda.

I.  Sub symbolo Apostolorum San-  
ctissimæ TRINITATI ac  
toti Curiæ cœlesti mundi totius, ac  
omnium ejus statuum necessitates &  
miserias ad commiserationem exhibeant.

G ij

**II.** Ad singulas orationes Dominicas Deo Patri Filium ejus unigenitum Crucifixum, velut infiniti pretii victimam, ad majorem precum suarum efficaciam conciliandam offerant.

**III.** Sub exordium salutationis Angelicæ in quavis Decade, Beatissimam Virginem ut matrem spectent; ac mysterium in ea Decade considerandum, uti Ex petitionem, ad quam dirigitur, in memoriam sibi revocent.

In qualibet Decade, cum pervenatum fuerit ad Nomen Jesu, adjicitur.

In Rosario Gaudioso dicendo die Lunæ Ex Jovis.

- |    |                                 |
|----|---------------------------------|
| 1. | Quem Virgo concepisti           |
| 2. | Visitando Elisabetham portâsti. |
| 3. | Virgo genuisti.                 |
| 4. | In Templo præsentâsti.          |
| 5. | In Templo inventâsti.           |

Ad

5.

Quem

4.

5.

5.

S.MariaMater Dei&c.

*In Rosario Doloroso , quod  
dicitur die Martis & Veneris,  
Nomini IESUS adjiciatur.*

- |                         |                       |                         |
|-------------------------|-----------------------|-------------------------|
| <b>I.</b> Qui pro nobis | Sangvinem sudavit.    | <b>S. Maria &amp;c.</b> |
| <b>2.</b>               | Flagellatus est.      |                         |
| <b>3.</b>               | Spinis coronatus est. |                         |
| <b>Ad 4.</b>            | Crucem bajulavit.     |                         |
| <b>5.</b>               | Crucifixus est.       |                         |

*In Rosario Glorioſo , quod  
dicitur die Merc: & Sabbati,  
ad singulas Decades post No-  
men IESU addatur.*

- |                     |                              |                         |
|---------------------|------------------------------|-------------------------|
| <b>I.</b>           | Resurrexit à mortuis.        | <b>S. Maria &amp;c.</b> |
| <b>2.</b>           | In cælum ascendit.           |                         |
| <b>3.</b> <i>Q.</i> | Spiritum Sanctum mi-<br>fit. |                         |
| <b>4.</b>           |                              |                         |
| <b>5.</b>           | Te in cælis coronavit.       |                         |

## JNTENTIONES ROSARII GAUDIOSI.

1. Orent pro errantibus in fide.
2. Pro conversione existentium in peccato mortali,
3. Pro imperfectis.
4. Pro sagis, maleficiis, & aliis obstinatis peccatoribus.
5. Pro innocentia juventute, & in gratia Dei existentibus.

## JNTENTIONES ROSARII DOLOROSI.

1. Orent pro toto statu Clericali
  2. Pro iis, qui praesunt, & confessariis.
  3. Pro Virginibus, & continentibus.
  4. Pro iis, qui ob fidem, & iustitiam patiuntur.
- In Decade*
- Pro statu politico Christianæ Republicæ & præcipue pro S.R. Imperio.

JN ROSARIO GLORIOSO:

- In Decade*
1. Orent pro perseverantia finali  
in bono spiritu.
  2. Pro consanguineis, Benefacto-  
ribus & aliis sibi commissis ac-  
commendatis.
  3. Pro Polonia
  4. Pro morientibus.
  5. Pro animabus Fidelium defun-  
ctorum.

Die vero Dominicā venerentur Je-  
sum Salvatorem suum Rosariolō 33.  
Pater noster, ad impetrandam ab eo-  
dem gratiam, quā ad plenitudinem  
meritorum pervenire, & in studio sic  
currere possint, ut bravium vitæ aeternæ  
apprehendant.

Exordium autem fiat à symblo A-  
postolorum, cui subiiciantur tria Pa-  
ter noster; tum ante primam Deca-  
dem orationum Dominicarum præce-  
dat unum Ave Maria: idem etiam fiet  
ante reliquas duas Decades.

*Post Rosarium quotidianum sequitur  
Psalmus De profundis cum duabus  
collectis pro Defunctis.*

**D**e profundis clamavi ad te Domine; Domine, exaudi vocem meam. Fiant aures tuæ intendentes; in vocem deprecationis meæ.

Si iniquitates observaveris Domine, Domine quis sustinebit?

Quia apud te propitiatio est; & propter legem tuam sustinui te, Domine.

Sustinuit anima mea in verbo ejus; speravit anima mea in Domino.

A custodia matutina usq; ad noctem speret Israel in Domino.

Quia apud Dominum misericordia, & copiosa apud eum redemptio.

Et ipse redimet Israel ex omnibus iniquitatibus ejus.

V. Requiem æternam dona eis  
Domine.

R. Et lux perpetua luceat eis.

V. Domine exaudi orationem  
meam.

R. Et clamor meus ad te veniat.

*Oremus,*

**D**eus veniæ largitor, & huma-  
næ salutis amator : quæsum⁹  
clementiam tuam , ut nostræ con-  
gregationis fratres, propinquos, &  
benefactores , qui ex hoc sæculo  
transferunt , Beatâ Mariâ semper  
Virgine intercedente cum omnib⁹  
Sanctis tuis, ad perpetuæ beatitu-  
dinis consortium pervenire conce-  
das.

Fidelium Deus omnium Condi-  
tor, & Redemptor animabus famu-  
lorum, famularumque tuarum re-  
missionem cunctorum tribue pecta-  
torum: ut indulgentiam, quam sem-

per optaverunt piis supplicationibus cunsequantur. Qui vivis & regnas in saecula saeculorum. Amen.

*Oratio pro Ordinario loci*, ut supera fol: 132.

*V.* Divinum auxilium maneat semper nobiscum.

*R.* Amen.

*Denique fiat examen nocturnum, quod consistit in quinque punctis.*

### P R I M U M.

*Gratiarum actio pro beneficiis acceptis.*

O Infita bonitas, gratias tibi ago pro omnibus beneficiis, quae mihi hodie, & totâ vitâ meâ contulisti, tibi laus, & gloria in infinitas saeculorum myriadas.

### S E C U N D U M.

*Luminis petitio.*

O Æterna Sapientia Christe Iesu, da ut quidquid tibi hodie in me displicuit, id mihi integre in memoriam redeat.

T E R T I U M.

*Hic suam quisque conscientiam exa-  
minet, quid singulis horis ab ultimo e-  
xamine elapsis peccaverit; cogitatione,  
verbo, & opere; & quæ peccata non-  
dum confessus fuerit.*

Q U A R T U M.

*Peccatorum deprecatio.*

O Inexhausta misericordia, igno-  
scere mihi quidquid hodie peccavi  
coram te: omnes offensas hujus  
diei, & totius vitæ meæ depono in  
abyssum misericordiæ tuæ; & per  
mortem Filii tui te deprecor, ô  
Deus, dimitte mihi quidquid un-  
quam in te peccavi.

Q U I N T U M.

*Emendationis propositum.*

O Immensa Majestas, firmissimè  
propono non peccare amplius.

*Coronidis loco subjungantur quinque  
Pater, & Ave, in honorem quinque  
vulnerum Christi, pro remissione pec-*

catorum, & puritate sensuum tam internorum, quam externorum impertranda.

Exuentes se, & cubitum secedentes  
committant se Beatissimae Virgini. si-  
c ut de die saepius pro commoditate.

O Domina mea Sancta Maria me  
in tuam benedictam fidem &c.  
ut supra. sol: 123.

Ad Sanctum Angelum Custodem.

Angele Dei, qui custos es mei me  
tibi commisum, pietate supernâ  
hâc nocte illumina, custodi, re-  
ge & guberna. *Vel*

O Amantissime Angele Dei, qui  
hucusq; tam fidelis custos es mei,  
dignare insuper hâc nocte cor &  
corpus meum immaculatum con-  
servare ut tecum merear SS. Tri-  
nitatem æternum contemplari, a-  
mare, & glorificare, Amen.

Ad Santos Patronos, & omnes San-  
tos.

Vos Sancti Patroni, mei & omnes  
Sancti Electi Dei, supplete vices  
meæ imperfectionis in benedicen-  
do & laudando Domino meo: &  
impetrare mihi meisq; gratiam in  
eius amore vivendi, perseverandi,  
tandemque ejusdem gloriâ vobis-  
cum æternum perfruendi.

*Antequam lectum ingrediantur, asper-*  
*gant se aquâ benedictâ & dicant:*

Asperge me Domine rore gratiæ  
tuæ &c. ut supra sol. 126.

*Lectum ingressuri signent se signo S.*  
*Crucis, & dicant.*

Per signum Crucis de inimicis  
nostris libera nos Deus noster.

Jesus Nazarenus, Rex Judæo-  
rum, titulus triumphalis defendat  
nos ab omnibus malis. Ecce Cru-  
cem Domini nostri Jesu Christi su-  
gite partes adversæ, vicit Leo de  
tribu Juda, Radix David. Sancte  
Deus, Sancte fortis, Sancte & im-  
mortalis miserere mei.

Benedicat me Jmperialis Maje-  
stas, protegat me regalis Divini-  
tas, custodiat me sempiterna Dei-  
tas, soveat me immensa divinitas,  
dirigat me inæstimabilis bonitas,  
gubernet me potentia Patris, vivi-  
ficet me Sapientia Filii, illuminet  
me virtus Spiritus Sancti, Amen.

*Ex horologio P. Drexelij.*

Pater Æterne, per vitam & mor-  
tem Filii tui, per omnem bonita-  
tem tuam te rogo, concede mihi, ut  
in bono perseverem, & in gratia  
tua moriar. Bone Jesu, per extre-  
mas illas in Cruce voces, quibus  
Patri Spiritum commendasti, te ro-  
go, fuscipe Spiritum in fine vitæ  
meæ.

Spiritus Sancte Deus, miserere  
mei & Sanctâ inspiratione tuâ me  
semper, & potissimum in hora mor-  
tis meæ, adjuva.

*Sanctissima Trinitas unus Deus*

*Manipulus piar: precum* 159 80

miserere mei nunc & in fine vitæ,  
mæ, Amen.

*In lecto modestè cōpositi & cancel-  
latis ante pectus brachiis in modum  
crucis, dicant:*

*Da Domine, ut singulæ meæ re-  
spirationes totâ nocte tibi laudem,  
& gloriam exhibeant. Amen.*

*In manus tuas Domine com-  
mendo spiritum meum.*

*In pace in idipsum dormiam, &  
requiescam.*

## MODUS OBEUNDI SACRA- MENTUM POENITENTIÆ.

*Oratio ante Examen conscientiæ.*

**A**Eterne Paren, Pater miseri-  
cordiarum, & Deus totius  
consolationis, peccata mea exami-  
naturus, vehementer confundor,  
sed tu nosti omnia, eorum gravi-

tatem & numerum & indignitatem  
habes perspectam. Tu enim scru-  
taris corda & renes, ô Deus meus!  
Rogo te humillimè, ut omnia &  
singula per gratiam tuam possim  
recordari, expendere & deplora-  
re. Concede mihi Spiritum San-  
ctum tuum, qui mihi eorum me-  
moriā refricet, cogitationes &  
discussionem mentis meæ dirigat,  
& dolorem animi mei, qui pecca-  
ta mea diluere possit, excitet.

*Hymnus.*

**V**eni Creator Spiritus,  
Mentes tuorum visita,  
Imple superna gratiâ,  
Quæ tu creâsti pectora.  
Qui diceris Paraclitus.  
Altissimi donum Dei,  
Fons vivus, ignis, charitas,  
Et spiritualis unctio.  
Tu septiformis munere,

Digitus paternæ dexteræ.

Tu ritè promissum Patris,

Sermone ditans guttura.

Accende lumen sensibus,

Infundere amorem cordibus,

Insirma nostri corporis

Virtute firmans perpeti.

Hostem repellas longius,

Pacemque dones protinus,

Ductore sic te prævio,

Vitemus omne noxium.

Per te sciamus, da, Patrem,

Noscamus atque Filium,

Teque utriusque Spiritum

Credamus omni tempore.

Deo Patri sit gloria,

Et Filio, qui à mortuis

Surrexit, ac Paraclito.

In sæculorum sæcula Amen.

v. Emitte Spiritum tuum, & crea-  
buntr.

v. Et renovabis faciem terræ.

*Oremus.*

**D**eus, qui corda fidelium Sancti Spiritū illustratione docuisti: da nobis in eodem Spiritu recta sapere, & de ejus semper consolacione gaudere. Per Dominum nostrum Jesum Christum Filium tuum, qui tecum vivit & regnat in unitate ejusdem Spiritū Sancti Deus, per omnia sæcula sæculorum. Amen.

**Discussio conscientiæ fiet circa sequentia.**

*Peccata contra Deum.*

Confessione sacrilegâ, dum peccatum mortale reticui, vel quia de peccatis non dolui, aut propositum emendationis non habui, toties, &c.

Communione sacrilegâ in statu peccati mortalisi, toties. *id*

Neglentiâ in præparatione ad confessionem, vel communionem.

Dubitazione voluntariâ circa  
Aliquem fidei articulum, toties.

Accusatio in repellendis co-  
gitationibus contra fidem, spem,  
charitatem, toties.

Blaspomiâ contra Deum, mur-  
de murando contra ejus justitiam,  
& misericordiam, &c. toties.

Neglientiâ in repllendis tenta-  
tionibus blasphemiae, pusillanimi-  
tatis, toties.

Violatione voti in re gravi, to-  
ties.

Perjurio; cùm falsum juravi, vel  
dubitans de veritate, toties.

Vel cum promisi aut minatus  
fui cum juramento, vel malum ali-  
quod grave vel leve facturum, a-  
nimô servandi, toties.

Vel dum juravi me rem licitam  
facturum animô non servandi, to-  
ties.

Fractione juramenti; quando

rem licitam juramentō promis-  
sam non servavi, cum possem.

**Accuso** me Juramentō temerario ; quando  
sine necessitate, vel utilitate ve-  
rum juravi.

Missâ die feriatâ omnino non,  
de vel non integrè auditâ, toties.

Disractionibus in ea voluntariè  
admissis, toties.

Negligentiâ in vitandis distra-  
ctionibus in oratione.

Ingratitudine erga Deum pro ac-  
ceptis specialibus beneficiis, to-  
ties.

Contemptu, vel neglectu pec-  
catorum gravium vel levium, to-  
ties.

Gloriatione ob peccata gravia  
vel levia, toties.

Complacentiâ in peccatis mor-  
talibus olim admissis, toties.

Superbiâ circa dona naturæ, vel  
gratiæ ; dum ea non Deo, sed meis  
meritis attribui, toties.

Jejunio Ecclesiastico , ad quod  
teneor, non observatō , toties.

*Contra seipsum.*

**A**ccuso me Superbiā, arrogantia, ambitio-  
ne , æstimatione mei ipsius ni-  
mia , complacentia vana , per-  
tinacia in proprio sensu & judi-  
cio, hypocrisi. toties.

**d**e Curiositate sciendi res perni-  
ciosas, curiosas, & periculofosas.  
toties.

Cogitationibus lascivis , quibus  
voluntariè inhæsi toties ; vel qui-  
bus me oblectavi. toties.

Desideriō deliberato peccandi  
contra castitatem , in tali specie.  
toties.

Negligentiā in præcavendis ; &  
comprimendis illicitis cogitationi-  
bus , motibus, illusionibus. toties.

Negligentiā gravi , vel levi, in  
custodiendis sensibus , visu, au-  
ditu, odoratu, gustu, tactu. to-  
ties.

**A**cuso **in**temperantiâ gravi , vel levi,  
in cibo & potu. toties.

**A**cuso **negligentiâ** & defectu appli-  
cationis in studiis.

**A**cuso **Otiositate** , seu tempore malè  
de collocato.

*Contra proximum.*

**J**nobedientiâ gravi vel levi in  
parentes, superiores, moderatores.

Murmuratione contra eos , vel  
eorum contemptu. toties.

Despicientia proximi, vel aver-  
sione ab eo; odio, ira, invidia, im-  
patientia , suspicione vana, teme-  
rario judicio. toties.

Detractio ne contra proximum;  
quando falsum delictum, grave vel  
leve ipsi affixi, vel verum occul-  
tum detexi. toties. Idque ex o-  
dio, & animô ejus famam lădendi.

Mendaciō , cum , vel sine gravi  
damno proximi. toties.

Scurrilitate in loquendo , turpi-  
loquio. toties.

Asperitate verborum, conten-  
tione, susurratione, maledicentia,  
convitiis, contumeliis, irrisione.

Verberatione, vulneratione, gra-  
vi læsione. toties.

Desiderio mali alieni gravis vel  
levis. toties.

Gaudiō ob malum proximi gra-  
ve vel leve,

Dolore ob bonum proximi, cum,  
vel sine animo tale bonum impe-  
diendi. toties.

Voluntate alteri nocendi, vel  
me vindicandi, quamvis effectus  
non sit secutus. toties.

Scandalō gravi, vel levi, toties.

Laude delicti alieni. toties.

Irritatione proximi ad iracun-  
diam, vel aliud malum.

Neglectu correctionis fraternæ,  
quomodo corrigere debuisse. to-  
ties.

*Ex his, occurrent facile alia, qua-*  
*hoc paradigmate non continentur.*

*Antequam accedant ad confessio-  
nem, poterunt præmitere hanc ora-  
tionem.*

**O** Jesu! Deus cordis mei, infinitè misericors & longanimis, infinitè suavis & amabilis, cum Patre & Spiritu Sancto multiplicas super me inæstimabiles dicitas misericordiæ, longanimitatis, & charitatis tuæ; qui hucusque me ingratum toties cum Petro respexisti, cum Magdalena in viam salutis reduxisti & in sanguine tuo animam meam dealbasti; toties me prodigum filium in osculum pacis recepisti, & infidelem licet famulum ad intimam familiaritatem invitasti: amplector, veneror, & adoro te, & tanta viscera misericordiæ tuæ erga me; atque omnium creaturæ affectū tibi gratias ago pro ineffabili isto æternæ tuæ dilectionis

nis excessu , quô mihi in tot de-  
fectus quotidie labenti, spatum &  
gratiam resipiscendi , spem veniae,  
fiduciam perseverandi, ac gloriam  
consequendi tribuisti. Utinam ô  
Deus meus, te infinito amore &  
honore dignissimum semper amâs-  
sem & glorificâssem ! utinam te  
nunquam offendissem , nec offend-  
derem post hac in æternum ! Sed  
ô bonitas infinita , quid tibi retri-  
bui pro omnibus bonis, quæ tribui-  
sti mihi , præter innumeræ meas  
offensiones, ingratitudines, & negli-  
gentias ? doleo de his ac omnibus  
& singulis vitæ meæ peccatis ex  
animo, purè propter te Deum meum  
infinitè amabilem, quia tibi, quem  
diligo , æternumque diligam super  
omnia displicant ea propono fir-  
miter ardenterque per gratiam tu-  
am emendare & compensare. In  
satisfactionem offero Tibi merita.

omnia, labores, ac dolores ipsumque sanguinem Domini mei Jesu Christi, merita Beatissimae Virginis, & Sanctorum omnium, meque, ac vitam meam, cum universis meis actionibus, quas cupio dirigere ad gloriam Nominis tui, tibi devoebo. Amen.

*Accedens ad confessionem, coram  
Sacerdote genuflexus dicat:*

Benedic Reverende Pater.

*Deinde factio signo S. Crucis recitet.  
Confiteor Deo Omnipotenti, Bea-  
tæ Mariæ semper Virgini, Beato  
Michaeli Archangelo, Beato Jo-  
anni Baptistæ, Sanctis Apostolis  
Petro & Paulo, omnibns Sanctis,  
& tibi Pater: quia peccavi nimis  
cogitatione, verbo, & opere.*

*His dictis peccata sua integrè, nul-  
lè omisso, purè, absq; ulla simulatio-  
ne, humiliter in conspectu Dñi, distin-*

*Etē cum verò emendationis affectu &<sup>et</sup> animo contrito, recenseat, & tandem sic concludat:*

De his & omnibus aliis meis peccatis, quorum etiam non recordor, dico: mea culpa, mea culpa, mea maxima culpa. Ideo precor Beatam Mariam semper Virginem, Beatum Michaelem Archangelum, Beatum Joannem Baptistam, Sanctos Apostolos Petrum & Paulum, omnes Sanctos, & te Pater, orare pro me ad Dominum Deum nostrum.

*Post hæc attentè ac devotè excipiat in iunctam pænitentiam, & si quam admonitionem Confessorius impetrat. Denique dum pronuntiatur absolutio, excitet Contritionem superiùs præscriptam.*

*Peracta in hunc modum Confessio-  
ne, & impetrata absolutione, si injun-  
cta pænitentia mox perjovri potest, ne*

differatur, sed accuratè præstetur magna devotionis affectu. Deinde, si commodè fieri poterit, recitetur sequens.

## ORATIO.

Ex S. August: lib: de Spirit: docum.

**D**e precor te Iesu Salvator, bene Redemptor, qui pretiosissimo Sangvine tuo redemptus sum, ut propter carnis corruptionem non peream, neque veniam in mortem secundam, nec in terram oblivionis. Hæc vox in auribus misericordiae tuæ sonet, ut tuam famam voluntatem, & omnis mens mea te meditetur, in te delectetur, te sequatur, te confiteatur, qui redemisti me.

In æternum misericordia tua est,  
& in misericordia tua revixi perditus peccatis, & surrexi à mortuis.

quoniam segregasti me à peccatis adolescentiæ meæ; & egi pœnitentiam coram te, quia servasti mihi tempus conversionis, & considerans peccata mea compunctus sum: lætus jam inde tibi nunc & semper innumeras gratias refero, quia ut inveniam te, tu prius quæsiviisti me; ut redirem ad te, tu compulisti me, ut confiterer tibi, tu es operatus; & ut me recognoscens plangerem; tu dedisti mihi: tu enim es misericors Dominus, qui sperantes in te non confundis, requirentes non derelinquis, revertentes ad te, non respuis, sed exultando & laudando suscipes, atque in æterna beatitudine, una cum Sanctis & electis tuis æternaliter regnare concedis, quia est tibi cum æterno Patre & Spiritu Sancto una Deitas, gloria, virtus, imperium & potestas, in sœcula sœculorum. Amen.

*Modus Sacrae Communionis Eucharistiae. Ante Communionem tria sunt, quæ animam ad dignissimum hoc convivium piè disponunt.*

*Primum; dolor de peccatis, sive compunctionis.*

*Secundum; desiderium, sive fames spiritualis.*

*Tertium; profunda reverentia, & animi demissio.*

*Oratio pia continens dolorem, desiderium & animi demissionem.*

**A**d mensam dulcissimi convivii tui, pie Domine Jesu Christe, ego peccator de propriis meritis nihil præsumens, sed de tua confidens misericordia & bonitate accedere vereor, & contremisco. Nam cor & corpus habeo multis criminibus maculatum; mentem, & linguam non cautè custoditam. Ergo, ô pia Deitas, ô tremenda

Majestas, ego miser inter angustias  
deprehensus, ad te fontem miseri-  
cordiae recurro; ad te festino fa-  
nandus; sub tuam protectionem fu-  
gio; & quem Judicem sustinere  
nequeo, Salvatorem habere suspi-  
ro. Tibi Domine, plagas meas o-  
stendo: Tibi verecundiam meam  
detego. Scio peccata mea multa  
& magna, pro quibus damnari ti-  
meo. Confido misericordiis & mi-  
serationibus tuis, quarum non est  
numerus. Respice ergo in me oc-  
culis misericordiae tuæ, pie Domi-  
ne Jesu Christe, Rex æterne, Deus  
& homo, crucifice propter homi-  
nem. Exaudi me sperantem in te:  
miserere mei, pleni miseriis & pec-  
catis, tu qui fons miserationis nun-  
quam manare cessas. Salve salu-  
taris victima pro me & omni hu-  
mano genere in patibulo Crucis  
oblata. Salve nobilis & pretiose

Sanguis de vulneribus crucifixi  
Domini mei Jesu Christi profluens,  
& peccata totius mundi abluens.  
Recordare Domine, Creaturae tuæ,  
quam tuo sanguine redemisti. Pæ-  
nitet me peccasse: cupio emenda-  
re, quod feci. Aufer ergo à me,  
clementissime Pater, omnes inqui-  
tates & peccata; ut purificatus  
mente & corpore, dignè digustare  
merear Sancta Sanctorum. Et con-  
cede, ut Sancta prælibatio Corpo-  
ris & Sanguinis tui, quam ego in-  
dignus sumere intendo, sit pecca-  
torum meorum remissio; sit de-  
liectorum perfecta purgatio, sit tur-  
pium cogitationum effugatio ac  
bonorum sensuum regeneratio o-  
perumque tibi placentium salubris  
efficacia; animæ quoque & cor-  
poris contra inimicorum meorum  
infidias firmissima tutio. Amen.

Eja ergo laudo te Deus meus &

exalto te in æternum; I despicio me  
& subiicio tibi in profundum vili-  
tatis mæ: ecce tu Sanctus San-  
ctorum, ego fordes peccatorum:  
ecce tu inclinas te ad me, qui non  
sum dignus vel te respicere; & ta-  
men tu venis ad me, tu vis esse  
mecum, tu me invitas ad convi-  
vium tuum.

*Sub ipsa Communione primò, pia  
& modesta corporis compositio adhi-  
benda est, accedendo ad altare junctis  
ante pectus manibus, oculis demissis,  
flebendo genua, capite decenter ere-  
cto, corpore quieto, sine lectione vel  
labiorum motu, oreque honestè aper-  
to, cùm sacra hostia porrigitur, ita  
ut lingua extremitum labium attingat;  
nec sit ultrà exerta.*

*Secundò excitanda spes & amor  
in Christum, non orando voce, sed me-  
ditando sequentia.*

## ORATIO MENTALIS.

*Sub ipsa Commnnione.*

**O** Dulcissime Jesu, in te est totum, quod desiderare possum & debedo, tu salus mea, redemptio mea, spes & fortitudo; decus & gloria: amem te ex corde meo o suavissime Jesu: regna in voluntate mea in aeternum, ut nihil a mem præter Te, & nihil mihi placet nisi propter Te, sed semper idem velim, quod Tu vis, idem faciam, quod placet Sanctissimæ voluntati Tuæ.

**O** Virgo Beataissima Maria, Patroni mei & Sancti Dei omnes adjuvate vestris precibus, ut præstem constanter, quod firmiter propono ad gloriam dulcissimi mei Salvatoris.

*Post facram Communionem  
tria praestanda.*

1. *Agenda Deo gratiae.*
2. *Offerendum cor, & quidquid  
suadet affectus ac pietas.*
3. *Petendum à Christo; quod no-  
stra necessitas requirit.*

*Actio gratiarum & oblatio.*

**A**mabilissime Jesu, Deus cor-  
dis mei, unde mihi indignis-  
simi peccatori tanta dignatio, tanta  
dilectio, tantæ majestatis ut me  
occulis misericordiæ tuæ tam beni-  
gnè, tam amanter visitare, tam mi-  
sericorditer reficere, tam paternè  
fovere, tam suaviter, efficaciter &  
mirabiliter ad gloriam mihi, ut  
spero, prædestinatam, deducere  
hucusque digneris? Benedicta sit  
in æternum infinita bonitas, cha-  
ritas, & misericordia tua, quâ me

ingratum toties cum Patre & Spí-  
ritu Sancto ab æterno sic dilexisti,  
ut decerneres me cum electis o-  
mnibus creare, salvare, dotare, vo-  
care ad tuam gratiam, & conser-  
vare ad gloriam: sed quanta beni-  
gnitas & misericordia tua, quòd  
me in tempore créaris, conserva-  
veris, dotaveris, redemeris pretiō  
Sanguinis tui pretiosissimi, & ho-  
die animam meam corpore & san-  
guine tuo refeceris, mihi què pi-  
gnus amoris tui & futuræ gloriæ  
te ipsum in Sacratissimo convivio  
tuo dederis. Agnosco, ô benignis-  
sime Jesu, charitatem tuam erga  
me, & omnium creaturarum affe-  
ctū, præsertim voce omnium San-  
ctorum & Spirituum cælestium, te  
Dominum meum adoro, laudo &  
glorifico: me insra omnes crea-  
turas in centrum nihili mei demitto,  
& supremæ tuæ Majestati inclino;

nam tua sola gratiâ sum id , quod  
sum. Credo in te, ô ineffabilis ve-  
ritas: in te spero, ô fidelissima mea  
felicitas: te amo & semper amabo  
super omnia , ô summa bonitas !  
Gaudeo etiam de omni tua per-  
fectione , beatitudine , gloria &  
beneplacito tuo , meque tibi usq;  
ad mortem & mei annihilationem  
resigno: totus tuus esse & in æter-  
num permanere desidero , sicut tu  
totus in hac suavissima communi-  
one & in vita ac morte tua meus  
esse voluisti. Omnem vitam meam  
tuo offero obsequio: offero tibi  
iutellectum meum , ut te cognos-  
cat, cogitet & meditetur : offero  
memoriam, ut tui recordetur: of-  
fero voluntatem, ut te diligat: of-  
fero omnia pia desideria, quæ un-  
quam habui , aut habiturus sum:  
offero sensus meos & affectus, ne  
unquam à te declinent : offero

quidquid sum, quidquid habeo, aut  
habiturus sum, ut totus tibi ex o-  
mnibus viribus & ex tota mente  
serviam in æternum, Amen.

Anima Christi sanctifica me.

Corpus Christi salva me.

Sanguis Christi inebria me.

Aqua lateris Christi lava me.

Passio Christi conforta me.

O bone Jesu exaudi me.

Intra vulnera Tua absconde me.

Ne permittas me separari à te.

Ab hoste maligno defende me.

In hora mortis meæ voca me.

Et jube me venire ad te.

Ut cum Sanctis tuis laudem te.

In sæcula sæculorum. Amen.

*Subijciat 5. Orationes Dominicas,  
& totidem salutationes Angelicas, ad  
honorem 5. vulnerum Christi, eique  
commendet;*

*a. In Sacrum vulnus dexteræ; Ec-*

*Manipulus piar: precum* 183

*clesiam Catholicam, summum Pontificem, omnesque Ecclesiae Prælatos.*

Pater noster, Ave Maria.

2. *In vulnus manū sinistræ; magistratus, præsertim supremos, statūs sæcularis, & Superiores suos.*

Pater noster, Ave Maria.

3. *In vulnus Pedis dextri; omnes obduratos & in peccato mortali existentes.*

Pater noster, Ave Maria.

4. *In vulnus pedis sinistri; animas fidelium defunctorum.*

Pater noster, Ave Maria.

5. *In vulnus lateris commendet, se, suos Parentes, nutritios, amicos, & inimicos.*

Pater noster, Ave Maria.

*Memor sit diem, quō Sacram Communionem suscepit, peculiari modestiā ac pietate transigere, & frequenter diebus in sequentibus inestimabilis illius beneficii recordatione se ad*

evitanda peccata & sectandas virtutes incitare.

Modus audiendi devotè Sacrum.

Factō signō S. Crucis, Domino Deo, cuius præsentiam recogitabunt, instantem suam orationem offerant, & gratiam benè precandi petant sequenti collectā, quam aliis quoque prolixioribus orationibus, ac univēsim quibuscumque negotiis præmitti convenit.

Actiones nostras, quæsumus Domine, aspirando præveni & adjuvando prosequere ut cuncta nostra oratio & operatio à te semper incipiat; & per te cæpta sibiatur. Per Christum Dominum nostrum.

Amen.

Factā hac oblatione, & benedictionis divinæ invocatione, qui in classibus superioribus sunt, usque ad elevationem quatuor minores Horas, id est Primam, Tertiam, Sextam &

*Nonam ex Officio B. Mariæ Virginis,  
pro incremento gratiae in vocatione  
sua Clericali recitent. Adolescentes  
vero inferiorum classium dicant pro  
conservanda castitate Officium Im-  
maculatæ Conceptionis B. M. Virgi-  
nis. & Hymnum S. Casimiri.*

**OFFICIUM PARVUM**  
*Immaculatæ Conceptionis Beatissimæ*

**VIRGINIS MARIAE.**

**AD MATUTINUM.**

v. **E**ia mea labia nunc annun-  
ciate

R. Laudes & præconia Virginis  
Immaculatæ.

v. Domina in adjutorium meum  
intende.

R. Me de manu hostium potenter  
defende.

v. **Gloria Patri, &c.**

*Hymnus.*

**S**alve mundi Domina,

Cælorum Regina,

Salve Virgo Virginum.

Stella matutina,

Salve plena gratiæ,

Clara lux Divina,

Mundi in auxilium

Domina festina.

**A**b æterno Dominus

Te præordinavit

Matrem Unigeniti

Verbi, quô creavit.

Terram, Pontum, æthera;

Te pulchram ornavit

Sibi Sponsam, quæ in

Adam non peccavit.

**V.** Elegit eam Deus, & prælegit eam.

**R.** In tabernaculo suo habitare fecit

eam.

AD PRIMAM

*Hymnus.* X.

**S**alve Virgo Sapiens,  
Domus Deo dicata;  
Columna septemplici;  
Mensaque exornata;

**A**b omni contagio  
Mundi præservata;  
Ante Sancta in utero  
Parentis, quam nata.

**T**u Mater viventium,  
Et porta es Sanctorum;  
Nova Stella ex Jacob,  
Domina Angelorum.

**Z**abulo terribilis  
Acies castrorum,  
Portus & refugium  
Sis Christianorum.

**V.** *Ipse creavit illam in Spiritu Sancto.*

**R.** *Et exaltavit illam inter omnia opera sua.*

**AD TERTIAM.**

*Hymnus.*

**S**alve Arca fæderis ;  
**T**hronus Salomonis ,  
**A**rcus pulcher ætheris ,  
**R**ubus visionis ,  
**V**irga frondens germinis ,  
**V**ellus Gedeonis ;  
**P**orta clausa Numinis ,  
**F**avusque Samsonis .  
**D**ecebat tam nobilem  
 Natum precavere  
**T**e ab originali  
 Labe Matris Evæ ,  
**A**l mamm , quam elegerat  
 Genitricem verè ,  
 Nulli prorsus sinens  
 Culpæ subjacere .

**V.** Ego in altissimis habito ,  
**R.** Et Thronus meus in columna nu-  
 bis .

AD SEXTAM.

*Hymnus.*

**S**alve Virgo puerpera,  
Templum Trinitatis,  
Angelorum gaudium,  
Cella puritatis.  
**S**olamen mærentium,  
Hortus voluptatis,  
Palma patientiæ,  
Cedrus Castitatis.  
**T**erra es benedicta,  
Et Sacerdotalis,  
Sancta, & immunis  
Culpæ originalis.  
**C**ivitas Altissimi,  
Porta orientalis,  
In Te est omnis gratia,  
Virgo singularis.

*V. Sicut lilyum inter spinas,*  
*R. Sic amica mea inter filias Adæ.*

**AD NONAM.**

Hymnus.

Salve Urbs refugii,  
Turrisque munita  
David, propugnaculis  
Armisque insignitis  
In Conceptione

Charitate ignita,  
Draconis potestas  
Est à Te contrita.

O mulier fortis,  
Et invicta Judith!  
Pulchra Abijsag Virgo,  
Verum sovens David:

Rachel Curatorem  
Ægypti gestavit:  
Salvatorem mundi  
MARIA portavit.

V. Tota pulchra es amica mea.

R. Et macula originalis nunquam  
fuit in te.

AD VESPERAS.

*Manipulus piar: precum* **xix**

*Hymnus.*

**S**alve horologium ,

Quo retrò gradiatur

Sol in deceim lineis,

Verbum incarnatur.

**H**omo, ut ab inferis

Ad summa attollatur,

Jmmensus ab Angelis

Paulò minoratur.

**S**olis hujus radiis

MARIA coruscat,

Consurgens aurora

In conceptu micat.

**L**ilium inter spinas,

Quæ serpentis conterat

Caput , pulchra ut Luna

Errantes collustrat.

**V.** *Ego feci in celis, ut oriretur lu-*  
*m̄en indeficiens.*

**R.** *Et quasi nebula texi omnem te-*  
*ram.*

**AD COMPLETORIUM.**

## Hymnus.

**S**alve Virgo florens,  
Mater illibata,  
Regina clementiæ,  
Stellis coronata.

**S**upra omnes Angelos

Pura, Immaculata,  
Atque ad Regis dexteram  
Stans veste deauratâ.

**P**er te Mater gratiæ;

Dulcis spes reorum.

Fulgens Stella maris,

Portus naufragorum,

**P**atens Cæli janua,

Salus infirmorum;

Videamus Regem

In aula Sanctorum.

**V.** Oleum effusum Maria Nomen tuum.

**R.** Servi tui dilexerunt te nimis.

**V.** Domina protege orationem meam.

**R.** Et clamor meus ad te veniat.

Ore-

*Oremus.*

**S**ancta MARIA Regina cœlorum,  
Mater Domini nostri Jesu Christi , & mundi Domina , quæ nullum dereliquis, & nullum despicias: respice nos Domina clementer oculō tuæ pietatis , & impetra nobis apud Tuum dilectum Filium cunctorum veniam peccatorum; ut qui nunc Tuam Sanctam , & Immaculatam Conceptionem devotô affectu recolimus , æternæ in futurum beatitudinis bravium capiamus, ipso , quem Virgo peperisti, donante Domino nostro Jesu Christo , qui cum Patre , Spiritu Sancto vivit , & regnat in Trinitate Perfecta Deus, in sæcula sæculorum, Amen.

**C O M M E N D A T I O .**

**S**upplices offerimus  
Tibi Virgo pia,

Hæc laudum præcomia.

Fac nos, ut in via  
Ducas cursū prospero,

Et in agonia  
Tu nobis assiste,

O dulcis MARIA, Amen,

*Antiph:* Hæc est Virga, in qua  
nec nodus originalis, nec cortex  
actualis culpæ fuit.

*V.* In Conceptione Tua, Virgo Im-  
maculata fuisti.

*R.*, Ora pro nobis Patrem, cuius Fi-  
lium preperisti.

*Oremus.*

**D**eus, qui per Immaculatam  
Virginis Conceptionem di-  
gnum Filio Tuo habitaculum præ-  
parasti: quæsumus, ut sicut ex mor-  
te ejusdem Filii Tui prævisa, eam  
ab omni labore præservasti, ita nos  
quoque mundos ejus intercessione  
ad te pervenire concedas. Per Do-

minum nostrum Jefum Christum  
Filiū Tuū, qui tecum vivit, &  
regnat in unitate Spiritus Sancti  
Deus, per omnia sēcula sēculo-  
rum, Amen.

V. *Immaculata B.M.V. Conceptio.*

R. *Sit nobis præfidium & protectio.*

### HYMNUS SANCTI CASIMIRI

*Ad Beatissimam Virginem.*

**O**nni die dic MARIÆ  
Mea, laudes, anima.

Ejus festa, ejus gesta  
Cole devotissima.

Contemplare & mirare  
Ejus celsitudinem.

Dic felicem Genitricem,  
Dic Beatam Virginem.

Jpsam cole, ut de mole  
Criminum te liberet.

Hanc appella , ne procella  
Vitiorum superet.

Hæc persona nobis dona  
Contulit cælestia :

Hæc Regina nos divina  
Illustravit gratiâ.

Lingua mea dic trophæa  
Virginis puerperæ ,  
Quæ inflictum maledictum  
Miro transfert germine.

Sine fine dic Reginæ  
Mundi , laudum cantica :  
Ejus bona semper sona ,  
Semper illa prædica.

Omnes mei sensus ei  
Personate gloriam.

Frequentate tam Beatæ  
Virginis memoriam.

Nullus certè tam disertæ  
Extat eloquentiæ ,  
Qui condignos promat hymnos  
Ejus excellentiæ ,  
Omnes laudent , unde gaudent ,  
Matrem Dei Virginem.

Nullus singat , quod attingat  
Ejus celsitudinem ;  
Sed necesse , quod prodesse  
Piis constat mentibus ,  
Ut intendam , quod impendam  
Me ipsius laudibus .  
Quamvis sciam , quod MARIAM  
Nemo dignè prædicet ,  
Tamen vanus & insanus  
Est , qui illam reticet .  
Cujus vita erudita  
Disciplinâ cælicâ ,  
Argumenta & figmenta  
Destruxit hæretica .  
Hujus mores , tanquam flores ,  
Exornant Ecclesiam :  
Actiones , & sermones  
Miram præstant gratiam .  
Evæ crimen nobis limen  
Paradisi clauserat ;  
Hæc dum credit , & obedit ,  
Cœli claustra referat .  
Propter Evam homo sœvam  
Accepit sententiam :

Per MARIAM habet viam,  
 Quæ dicit ad Patriam.  
 Hæc amanda, & laudanda  
 Cunctis specialiter :  
 Venerari , & precari  
 Eam decet jugiter.  
 Jpsa donet, ut , quod monet  
 Natus ejus, faciam :  
 Ut finitâ earnis vitâ ,  
 Lætus hunc aspiciam.

## SECUNDA PARS.

**O**Cunctarum fæminarum  
 Decus atque gloria !  
 Quam electam & evectam  
 Scimus super omnia.  
 Clemens audi, tuæ laudi  
 Quos instantes , conspicis.  
 Munda reos , & fac eos  
 Domîs dignos cælicis.  
 Virga Jesse , spes oppressæ  
 Mentis & refugium ,

*Manipulus piar; precum* 199 *loc.*

Decus mundi, lux profundi,

Domini sacrarium

Vitæ forma, morum norma.

Plenitudo gratiæ:

DEI templum, & exemplum

Totius Justitiæ.

Virgo salve, per quam valvæ

Cæli patent miseris,

Quam non flexit, nec allexit

Fraus serpentis veteris.

Generosa & formosa

David Regis filia,

Quam elegit Rex, qui regit,

Et creavit omnia.

Gemma decens, rosa recens,

Castitatis lilyum,

Castum chorūm ad polorum

Quæ perducis gaudium.

Actionis & sermonis

Facultatem tribue,

Ut tuorum meritorum

Laudes promam strenue.

Opto nimis, ut imprimis

Des mihi memoriam,

Quâ decenter & frequenter  
Tuam cantem gloriam.  
Quamvis muta , & polluta  
Mea sciam labia ;  
Præsumendum , nec silendum  
Est de tua gloria.  
Virgo gaude , omni laude  
Digna , & præconiô ,  
Quæ damnatis libertatis  
Facta es occasio.  
Semper munca & fœcunda  
Virgo tu puerpera ,  
Mater alma , velut palma  
Florens & fructifera.  
Ejus flore , & odore  
Recreari cupimus ;  
Cujus fructu nos à luctu  
Liberari credimus.  
Pulchra tota sine nota  
Cujuscunque maculæ ,  
Fac nos mundos & jucundos  
Te laudare sedulè.  
O Beata ! per quam data  
Nova mundo gaudia ,

Et aperta fide certâ  
Regna sunt cælestia.  
Per te mundus lætabundus  
Novô fulget lumine.  
Antiquarum tenebrarum  
Exutus caligine.  
Nunc potentes sunt egentes,  
Sicut olim dixeras:  
Et egeni sunt pleni,  
Ut Tu prophetaveras.  
Per te morum nunc pravorum  
Relinquuntur devia,  
Doctrinarum perversarum  
Pulsa sunt præstigia  
Mundi luxus, atque fluxus  
Docuisti spernere:  
DEUM quæri, carnem teri,  
Vitiis resistere;  
Mentis cursum tendi sursum  
Pietatis studio;  
Corpus angi, motus frangi  
Pro cælesti præmio.

Tu portasti inter casti  
Ventrism claustra Dominum.  
Redemptorem, ad honorem  
Nos formans pristinum.  
Mater facta sed intacta  
Genuisti filium,  
Regem Regum, atque rerum  
Creatorem omnium.  
Benedicta, per quam **victa**  
Hostis est versutia,  
Destitutis spe salutis  
Datur Indulgentia.  
Benedictus Rex invictus,  
Cujus Mater crederis,  
Increatus ex te natus,  
Nostris salus generis.

## TERTIA PARS.

**R**eparatrix, Consolatrix  
Desperantis animæ,  
A pressura, quæ ventura  
Malis est nos redime.

Pro me pete , ut quiete  
Sempiternâ perfruar ,  
Ne tormentis comburentis  
Stagni miser obruar .  
Quod requiro , quod suspiro ,  
Mea sana vulnera ;  
Et da menti te poscenti  
Gratiarum munera ;  
Ut sim castus & modestus ,  
Dulcis , blandus , sobrius ,  
Pius , rectus , circumspectus ,  
Simultatis nescius ,  
Eruditus & munitus  
Divinis eloquiis ,  
Timoratus , & ornatus  
Sacrîs exercitiis ,  
Constans , gravis , & suavis ,  
Benignus , amabilis ,  
Simplex , purus , & maturus ,  
Patiens & humilis :  
Corde prudens , ore studens  
Veritatem dicere ,  
Malum nolens , DEUM colens  
Piò semper opere ;

Esto tutrix & adjutrix  
Christiani populi :  
Pacem præsta , ne molesta  
Nos perturbent saeculi ;  
Salutaris stella maris ,  
Summis digna laudibus ,  
Quæ præcellis cunctis stellis .  
Atque luminaribus ;  
Tuâ dulci prece fulci  
Suplices & refove .  
Quidquid gravat , vel depravat  
Mentes nostras , remove ,  
Virgo gaude , quod de fraude  
Dæmonis nos liberas ,  
Dum in vera & sincera  
Carne DEUM generas .  
Illibata & ditata  
Cælesti progenie ,  
Gravidata nec fraudata  
Flore pudicitiae :  
Nam quod eras , perseveras ,  
Dum intacta generas ,  
Illum tractans atque lactans ,  
Per quem facta fueras .

Commendare me dignare  
Christo tuo Filio,  
Ut non cadam , sed evadam  
De mundi naufragio :  
Fac me imitem , pelle litem ,  
Compelce lascivam ,  
Contra crimen da munimen ,  
Et mentis constantiam :  
Non me liget , nec fatiget  
Sæculi cupiditas ,  
Quæ indurat & obscurat  
Mentes sibi subditas:  
Nunquam ira , nunquam dira  
Me vincat elatio ,  
Quæ multorum sit malorum  
Frequenter occasio ;  
Ora DEUM , ut cor meum  
Suâ servet gratiâ ,  
Ne antiquus inimicus  
Seminet zizania :  
Da levamen & juvamen  
Tuum illis jugiter ,  
Tua festa , sive gesta  
Qui colunt alacriter . Amen.

*Ad consecrationem & elevationem ho-  
stiae usque ad orationem Dominicam,  
dicantur tarde & penitulatè sequen-  
tes orationes.*

**A**ve verum corpus natum de  
Maria Virgine: verè passum  
immolatum in Cruce pro homine:  
eius latus perforatum unda flu-  
xit sanguine; Esto nobis prægusta-  
tum in mortis examine. O dulcis,  
o pie, o Jesu Fili Mariæ Miserere  
mei. Amen.

O Jesu Fili Dei & Mariæ Virgi-  
nis, Dominus meus, & Deus meus,  
qui pro me in Cruce mori dignatus  
es, adoro, amo, & glorifico te su-  
per omnia: credo in te: spero in te:  
doleo purè propter te, quòd un-  
quam offenderim te. Ex hoc mo-  
mento paratum cor meum ad or-  
mnam nutum tuum. Tuus sum ego,  
eroque in æternum: posside me, &

tuæ voluntati penitus me conforma. Pater misericordiarum responde in faciem dilectissimi Filii tui, quem in sacrificium laudis, gratiarum actionis, & propitiationis tibi offero, per illius lachrymas, fudorem & sanguinem: per gemitus & suspiria, per labores & obsequia; per dolores & suppicia per infinita ejus merita miserere mei, & omnium, pro quibus mortuus est, ut te semper perfectè amemus, & tuam Sanctissimam voluntatem amplectamur & exequamur in tempore, & in æternitate.

Miserere etiam misericordissime Pater omnium fidelium defunctorum, eisq; requiem æternam concede, ut te æternum laudent, benedicant & glorifcent, cui debetur omnis laus, honor, & gloria, Amen.

Responce pie Pater piissimum Fi-

Ium tuum pro me crucem passum:  
intuere sacratissima ejus vulnera;  
cerne manus innoxias promanau-  
tes cruento; & remitte placatus  
scelera, quæ patraverunt manus  
meæ. Considera inerme latus cru-  
deli perfoſsum cufpide, & renova  
me sacrô fonte, quem inde fluxiſ-  
ſe credo. Vide immaculata vesti-  
gia, quæ non steterunt in via pec-  
catorum, sed semper ambulârunt  
in lege tua, diris confixa clavis:  
& perfice gressus meos in semitis  
tuis, & fac me odio habere omnem  
viam iniquitatis.

*Postmodum cum celebrante recitent  
orationem Dominicam, quæ sequitur.*

### O R A T I O .

**L**ibera nos, quæſumus Domine  
ab omnibus malis, præteritis,  
præſentibus, & futuris, & interce-  
dente Beatâ & gloriſâ ſemper

Virgine Dei Genitrice Maria, cum  
Beatis Apostolis tuis Petro & Pau-  
lo atque Andrea, & omnibus San-  
ctis: da propitius pacem in diebus  
nostris: ut ope misericordiae tuæ  
adjuti, & à peccato simus semper  
liberi & ab omni perturbatione se-  
curi. Per eundem Dominum no-  
strum Jesum Christum Filium tu-  
um, qui tecum vivit & regnat in  
unitate Spiritus Sancti Deus, per  
omnia sœcula sœculorum. Amen.

Agnus Dei, qui tollis peccata  
mundi, Miserere nobis.

Agnus Dei, qui tollis peccata  
mundi. Miserere nobis:

Agnus Dei, qui tollis peccata  
mundi. Da nobis pacem.

*Hic spiritualem Communionem per  
varios fidei, spei, charitatis & alia-  
rum virtutum actus erga Deum &  
Christum in venerabili Sacramento  
realiter præsentem instituant ad hunc  
modum:*

**A**doro te Domine Jesu vivâ, & verâ fide, in hoc Sacramento Corpore & animâ, carne & sanguine, vi mirabilis potentiae & bonitatis verè præsentem; & spero in te, ó fons omnis bonitatis & misericordiae; non enim sum dignus ut intres sub tectum meum, sed tantum dic verbô, tu qui solê nutu potes omnia, & sanabitur misera & languens anima mea. Amo Te Domine tam amantem mei ex toto corde meo, super me & omnia: & ideo cupio te sumere modô saltem spiritualiter per gratiam tuam, quæ cor meum à tot peccatis & imperfectionibus purisicet, meritis & virtutibus exornet, Sanctis cogitationibus & illustrationibus, velenut divinæ sapientiae tuæ radiis, illuminet, accendat in charitate, confortet in temptationibus, ne unquam separer à te, consoletur in

tribulationibus , ut amore tui & propter te feram eas patienter, lumen-  
ter & gaudenter ; in sancta vo-  
catione mea ad tuam gloriam , &  
animatorum salutem corroberet, at-  
que sic ad finem usque perseveran-  
tem, ad vitam æternam securè per-  
ducat. Amen.

Anima Christi sanctifica me , ut  
*supra fol: 182.*

Tum pro gratiarum actione ob ma-  
ximum beneficium, quod in Sacramen-  
to Eucharistiae , & Sacrificio Missæ  
Christus nobis exhibuit , se ipsum  
communicando, & Deo Patri pro no-  
bis offerendo , uti & pro ipsa Sacra-  
tissima passione , quam hoc Sacrifi-  
cium repræsentat, dicatur, *Antiphona:*

O Sacrum Convivium , in quo  
Christus sumitur, recolitur memo-  
ria passionis ejus : mens impletur  
gratiâ; & futuræ gloriæ nobis pi-  
gnus datur.

V. Panem de cælo præstitisti nobis:  
R. Omne delectamentum in se haben-  
tem.

Oremus.

**D**eus, qui nobis sub Sacramen-  
to mirabili passionis tuæ me-  
moriam reliquisti: tribue quæsumq,  
ita nos Corporis, & Sanguinis tui  
Sacra Mysteria venerari; ut Re-  
demptionis tuæ fructum iu nobis  
jugiter sentiamus, qui vivis & re-  
gnas cum Deo Patre in unitate  
Spiritûs Sancti Deus, per omnia  
sæcula sæculorum. Amen.

Sequitur Oratio S. Francisci Xa-  
verii, quam ipse sub sacro pro conver-  
sione paganorum dicere solebat, ad  
hæreticorum, & omnium gravium pec-  
catorum emendationem à Deo exo-  
randam directa.

**A**Eterne rerum omnium effector  
Deus, memento abs te ani-

mas infidelium, hæreticorum & peccatorum procreatæ, easq; ad imaginem & similitudinem tuam conditas. Ecce Domine in opprobrium tuum his ipsis infernus impletur: memento Jesum dilectum Filium tuum pro illarum salute atrocissimam subiisse necem: noli, quæso Domine, ultra permettere, ut Filius tuus ab infidelibus, hæreticis, ac peccatoribus contemnatur; sed precibus Sanctorum viorum, & Ecclesiæ Sanctissimæ Filii tui sponsæ placatus recordare misericordiæ tuæ, & oblitus idolatriæ, infidelitatis, contumaciæ & malitiæ eorum, effice, ut ipsi quoque agnoscant, timeant ac diligent aliquando, quem misisti, Dominum nostrum Jesum Christum, qui est salus & vita, & resurrectio nostra, per quem salvati & liberati sumus, cui sit gloria per infinita sæculorum. Amen.

Denique ad finem Missæ ex Officio parvo B. MARIÆ Virginis recitent hymnum & collectam ejus diei, cum versiculo & responsorio, ac cum celebrante percurrent sequens Evangelium.

Initium Evangelii S. Joannis.

**J**n principio erat Verbum, & Verbum erat apud Deum , & Deus erat Verbum. Hoc erat in principio apud Deum. Omnia pér Ipsiū facta sunt , & sine ipso factum est nihil, quod factum est, in ipso vita erat, & vita erat Lux hominum : & Lux in tenebris lucet, & tenebræ eam non comprehenderunt. Fuit Homo missus à Deo, cui nomen erat Joannes. Hic venit in Testimonium , ut Testimonium perhiberet de Lumine , ut omnes crederent per illum. Non erat ille Lux, sed ut Testimonium

perhiberet de Lumine. Erat Lux  
vera, quæ illuminat omnem homi-  
nem venientem in hunc mundum.  
In mundo erat , & mundus per  
ipsum factus est, & mundus eum  
non cognovit. In propria venit, &  
sui eum non receperunt : Quotquot  
autem receperunt eum , dedit eis  
potestatem filios Dei fieri, his, qui  
credunt in nomine ejus : Qui non  
ex sanguinibus , neque ex volunta-  
te carnis, neq; ex voluntate viri,  
sed ex Deo nati sunt. Et Verbum  
caro factum est, & habitavit in no-  
bis: Et vidimus gloriam ejus, glo-  
riam quasi Unigeniti à Patre , ple-  
num gratiæ & veritatis. Deo gra-  
tias.

*Oratio ante quodvis opus.*

**A**ctiones nostras , quæsumus Do-  
mine, aspirando præveni , & ad-  
juvando prosequere, ut cuncta no-  
stra oratio & operatio semper à

te incipiat, & per te cæpta finiantur. Per Christum. &c.

*Alia*

O Christe Jesu, in unione charitatis illius, quâ opus nostræ redemptionis operatus es in medio terræ, offero tibi hoc opus. N. & omnes actiones meas ad majorem Nominis tui gloriam, meam & proximorum salutem.

*Oratio post quodlibet opus.*

Benedictus es Domine Deus meus, qui exordium, progressum & exitum huic operi tribuisti, tuum est, si quid in eo bonum est, propter quod te laudo: meum, si quid in eo peccatum, de quo doleo. Dignare ô piissimè Domine, susciperre, & meritis Unigeniti Filii tui supplere imperfectum meum & da, ut quod à me neglectum, alias juxta beneplacitum tuum corrigatur & perficiatur.

*Ante*

*Ante scholam & studia recitetur.*

Veni Sancte Spiritus, reple tuorum corda fidelium, & tui amoris in eis ignem accende: Qui per diversitatem linguarum cuicatarum gentes in unitate fidei congregasti.

¶. *Emitte Spiritum tuum & creabuntur.*

R. *Et renovabis faciem terræ.*

*Oremus.*

**D**eus, qui corda fidelium Sancti Spiritus illustratione docuisti da nobis in eodem Spiritu recta sapere, & de ejus semper consolatione gaudere. Per Dominum nostrum Jesum Christum Filium tuum, qui tecum vivit & regnat in unitate ejusdem Spiritus Sancti Deus, per omnia saecula saeculorum. Amen.

*Oratio ante studia.*

*Verbum Patris æterni ., & o-*

K

mnis sapientiae fons, Domine Iesu Christe, docilitatem mentibus nostris & intelligentiae lumen infunde, ut feliciter nobis cedant haec literarum studia, quibus adiuti ad clariorem tui agnitionem, & perfectum amorem bonitatis tuae pervenire possimus. Qui vivis & regnas Deus in saecula saeculorum.

Amen.

*Alia Oratio ante studia S. Thomae Aquinatis.*

Creator ineffabilis, qui de thesauro sapientiae tuae, tres Angelorum Hierarchias annotasti, & eas super caelum Empyreum miro ordine collocasti, atque elegantissime partes Universi distribuisti. Tu, inquam, qui verus fons luminis & sapientiae diceris, atque supereminenens principium, infundere digneris super intellectus mei tenebras tuae radium claritatis, duplices, in

quas natus sum , à me removens  
tenebras , peccatum scilicet , & i-  
gnorantiam . Qui linguas infant-  
um facis esse disertas , linguam  
meam erudias , atq; labiis meis gra-  
tiam tuæ Benedictionis infundas .  
Da mihi intelligendi acumen , reti-  
nendi capacitatem , interpretandi  
sublimitatem , addiscendi facilita-  
tem , loquendi gratiam copiosam :  
ingressum instruas , progressum di-  
rigas , egressum compleas . Per  
Christum Dominum nostrum . A.

*Oratio post studia.*

Gratialis ago Tibi æterna Sapien-  
tia Jesu Christe , cui hæc , quæ mo-  
do didici , me docere placuit . Da  
Domine labori meo incrementum ,  
quô proficiat ad tuam gloriam , &  
meam ac proximorum meorum æ-  
ternam salutem . Amen .

*Quoties auditur signum horæ , reci-  
tetur unum Ave Maria cum versiculis :*

K ij

MARIA Mater gratiæ,  
Dulcis Parens clementiæ,  
Tu nos ab hoste protege  
Et mortis horâ suscipe,  
Ad signum Angelicæ salutatiōnis.

1. Angelus Domini nuntiavit Mariæ,  
& concepit de Spiritu Sancto.

Ave MARIA. &c.

2. Ecce Ancilla Domini, fiat mihi  
secundum verbum tuum

Ave MARIA. &c.

3. Et Verbum Caro Factum est, &  
habitavit in nobis.

Ave MARIA. &c.

Oremus.

**G**ratiam tuam, quæsumus Domine, mentibus nostris infunde, ut qui Angelo nunciante, Christi Filii tui Incarnationem cognovimus, per Passionem ejus & crucem ad Resurrectionis gloriam producamur. Per eundem Christum Dominum nostrum. Amen.

*Die Jovis ad Christi agoniam pro  
opportunitate dicentur septem Pater  
noster.*

*V. Proprio Filio suo non pepercit  
Deus.*

*R. Sed pro nobis omnibus tradidit  
illum.*

*Oremus.*

**D**omine Jesu Christe, qui miseras & angustias, opprobria ac convitia, calumnias & injurias, pænas & afflictiones, passionem & mortem patienter pro nobis miseris peccatoribus redimendis ferre voluisti: te supplices exoramus, ut omnes cruciatus, vitam, & mortem tuam, inter judicium tuum, & animas nostras, nunc & in hora mortis nostræ ponere, & largiri digneris vivis misericordiam & gratiam, defunctis requiem & veniam, Ecclesiæ tuæ pacem & concordiam, patriæ nostræ tranquil-

litatem & nobis peccatoribus vitam & lætitiam sempiternam. A.

*Cum pulsatur die Veneris ad obitum Christi, precentur omnes :*

Christus factus est pro nobis obediens usq; ad mortem, mortem autem Crucis; propter quod Deo exaltavit illum, & dedit illi nomen, quod est super omne nomen.

*V. Adoramus te Christe & benedicimus tibi.*

*R. Quia per Sanctam Crucem tuam redemisti mundum.*

*Oremus,*

**R**espice, quæsumus Domine, super hanc familiam tuam, pro qua Dominus noster JESUS Christus non dubitavit manibus tradi nocentium & Crucis subire tormentum, qui tecum vivit & regnat in sæcula sæculorum, Amen.

**Benedictio Mensæ ante prandium.**

V. Benedicite. R. Benedicite.

V. Oculi omnim in te sperant Do-  
mine, & tu das escam illorum in tem-  
pore opportuno.

R. Aperis tu manum tuam & im-  
plies omne animal benedictione.

V. Gloria Patri & Filio & Spi-  
ritui Sancto.

R. Sicut erat in principio & nunc  
& semper & in sæcula sæculorum. A.

Kyrie eleyson, Christe eleyson.

Kyrie eleyson. Pater noster &c.

V. Et ne nos inducas intentionem.

R. Sed libera nos a malo.

Oremus.

Benedic Domine nos & hæc Tua  
dona, quæ de Tua largitate su-  
mus sumpturi. Per Christum Do-  
minum nostrum. R. Amen.

V. Jube Domine benedicere.

R. Mensæ cœlestis participes faciat  
nos Rex æternæ gloriæ. Amen.

⁊ exercitiorum  
Post Prandium.

V. Tu autem Domine miserere nobis.

R. DEO gratias.

V. Confiteantur tibi Domine omnia opera tua.

R. Et Sancti tui benedicant tibi.

V. Gloria Patri & Filio & Spiritui Sancto.

R. Sicut erat in principio & nunc & semper & in saecula saeculorum. A.

Agimus tibi gratias omnipotens Deus pro universis beneficiis tuis,  
Qui vivis & regnas in saecula saeculorum. R. Amen.

Laudate Dominum omnes gentes, laudate eum omnes populi.

Quoniam confirmata est super nos misericordia ejus & veritas Domini manet in eternum.

Gloria Patri & Filio & Spiritui Sancto.

Sicut erat in principio & nunc

& semper & in saecula saeculorum. A.

Kyrie eieyson, Christe eleyson  
Kyrie eleyson. Pater noster.

V. Et ne nos inducas in tentatio-  
nem. R. Sed libera nos à malo.

V. Dispersit dedit pauperibus.  
R. Justitia ejus manet in saeculum  
saeculi.

V. Benedicamus Dominum in omni-  
tempore.

R. Semper laus ejus in ore meo.

V. In Domino laudabitur anima  
mea.

R. Audiant mansueti & latentur.

V. Magnificate Dominum mecum.

R. Et exaltemus nomen ejus in id  
ipsum.

V. Sit nomen Domini benedictum.

R. Ex hoc uunc & usq; in saecu-  
lum.

Retribuere dignare Domine, o-  
mnibus nobis bona facientibus pro-  
pter nomen tuum vitam æternam.  
Amen.

K. v.

V. Benedicamus Domino.

R. DEO gratias.

V. Fidelium animæ per misericordiam Dei requiescant in pace. R. A.  
Pater noster secreto.

Deus det nobis suam pacem. R. A.

Ante Cenam.

V. Benedicite. R. Benedicite.

Edent pauperes & saturabuntur  
& laudabunt Dominum, qui requiri-  
runt eum: vivent corda eorum in  
saeculum saeculi.

V. Gloria Patri & Filio & Spi-  
ritui Sancto.

R. Sicut erat in principio & nunc  
& semper & in sacula saeculorum. A.

Kyrie eleison. Christe eleison,  
Kyrie eleison. Pater noster.

V. Et ne nos inducas in temptationem.

R. Sed libera nos a malo.

Oremus.

Benedic Domine nos & haec tua

dona, quæ de tua largitate sumus sumpturi. Per Christum Dominum nostrum. R. Amen.

Jube Domine benedicere. Ad cænam vitæ æternæ perducat nos Rex æternæ gloriæ.

*Post Cænam.*

¶. Memoriam fecit mirabilium suorum misericors & misereator Domini.

R. Escam dedit timentibus se.

¶. Gloria Patri & Filio & Spiritui Sancto.

R. Sicut erat in principio & nunc & semper & in sæcula sæculorum. A.

Benedictus Deus in donis suis, & Sanctus in omnibus operibus suis; qui vivit & regnat in sæcula sæculorum. R. Amen.

Laudate Dominum omnes gentes & reliqua ut supra 224.

*In Nativitate Domini usque ad Cænam Vigiliæ Epiphaniæ exclusivè dicitur.*

V. Verbum Caro factum est. Alleluia.

R. Et habitavit in nobis. Alleluia.

Gloria Patri & Filio & Spiritui  
Sancto.

Sicut erat in principio & nunc  
& semper, & in saecula saeculorum.

Amen. In fine dicitur.

V. Notum fecit Dominus. Alleluia.

R. Salutare suum Alleluia.

In Epiphania & per totam eam.

V. Reges Tharsis & insulae, mune-  
ra offerent. Alleluia.

R. Reges Arabum & Saba dona ad-  
ducent. Alleluia.

Gloria Patri &c. ut supra..

In fine dicitur.

V. Omnes de Saba venient. Alleluia

R. Aurum & thus differentes. Allel:

Gloria Patri & Filio & Spiritui S.

Sicut erat in principio & nunc &  
semper & in saecula saeculorum. A.

In Cana Domini dicitur absolute.

Christus factus est pro nobis ob-  
ediens usque ad mortem.

*Manipulus piar: precum* 229

Deinde Pater noster totum secreto.

*In fine iterum dicitur.*

Christus factus est *ut supra*

*Postea Psalmus 50. Miserere mei  
Deus, quō finito sine  
¶. Gloria Patri. Secreto dicitur.*

Pater noster. Deinde absolute O-  
ratio. Respice, quæsumus Domine,  
ut *suprà 222. sine* qui tecum &c.  
*In Parasceve Domini.*

*Eodem modo fit sicut in cœna Do-  
mini, sed dicitur ad.*

*¶. Christus factus est &c.*

*R. Mortem autem Crucis.*

*Sabbato Sancto.*

*¶. Benedicite. R. Benedicite.*

*¶. Vespere autem Sabbati, quæ  
lucescit in prima Sabbati, Alleluia.*

*R. Venit Maria Magdalene &  
altera Maria videre sepulchrum,  
Alleluia.*

*Gloria Patri, & Filio, &c.*

*In fine repetitur. ¶.*

Vespere autem Sabbati, ut supra.  
Gloria Patri, & Filio, & Spiritui S.  
Sicut erat in principio, & nunc, &  
semper, & in saecula saeculorum.  
Amen.

Laudate Dominum omnes gen-  
tes, &c.

Kyrie eleison. Chryste eleison.  
Kyrie eleison. Et reliqua ut supra,

*In die Paschæ usq; ad canam se-  
quentis sabbati.*

R. Hæc dies, quam fecit Domi-  
nus. Alleluia.

R. Exultemus & lætemur in ea,  
Alleluia.

Gloria Patri, &c. Infine iterum  
dicitur.

R. Hæc dies ut supra, cum reliquis.  
*In Ascensione Domini usque ad Vig-  
iliam Pentecostes exclusivè.*

R. Ascendit Deus in jubilatione.  
Alleluia.

R. Et Dominus in voce tubæ, Al:  
Gloria Patri, & Filio, & Spiritui S.  
Sicut erat in principio, & nunc, &  
semper, & in saecula saeculorum. A.

*In fine dicitur.*

V. Ascendens Christus in altum,  
Alleluia.

R. Captivam duxit captivitatem,  
Alleluia.

Gloria Patri, & Filio &c.

*In Festo Pentecostes, à Vigilia e-  
jusdem inclusivè usque ad cœnam se-  
quentis Sabbati exclusivè:*

V. Spiritus Domini replevit or-  
bem terrarum, Alleluia.

R. Et hoc, quod continent omnia,  
scientiam habet vocis. Alleluia.

Gloria Patri, & Filio, &c.

*In fine dicitur.*

V. Repleti sunt omnes Spiritu S. Al:

R. Et ceperunt loqui, Alleluia.  
Gloria Patri, & Filio, & Spiritui S.  
Sicut erat in principio, & nunc, &  
semper, & in saecula saeculorum. A.

L I T A N I E  
*De*  
*SVAVISSIMO NOMINE*  
 J E S U

*Approbatæ à Sede Apostolica ad In-*  
*stantiam Ducis Bavariae.*

K yrie eleyson. Christe eleyson.  
 Kyrie eleyson.  
 Christe audi nos.  
 Christe exaudi nos.  
 Pater de Cælis Deus, Miserere no-  
 bis  
 Fili Redemptor mundi DEUS, Mi-  
 Spiritus Sancte DEUS, Miserere.  
 Sancta Trinitas unus DEUS, Mise-  
 JESU Fili DEI vivi. Miserere nobis.  
 JESU Potentissime.  
 JESU Fortissime  
 JESU Perfectissime.  
 JESU Gloriosissime.  
 JESU Jucundissime.

- JESU Carissimè.  
JESU Clarior Sole.  
JESU Pulchrior Luna.  
JESU Splendidior Stellis.  
JESU Admirabilis,  
JESU Delectabilis,  
JESU Honorabilis,  
JESU Humillime,  
JESU Pauperrime,  
JESU Mitissime,  
JESU Patientissime,  
JESU Obedientissime,  
JESU Castissime,  
JESU Amator castitatis,  
JESU Amator pacis,  
JESU Amator noster,  
JESU Speculum vitæ,  
JESU Exemplar virtutum,  
JESU Decus morum,  
JESU Zelator animarum,  
JESU Refugium nostrum,  
JESU Pater pauperum,  
JESU Consolator afflictorum,

Miserere nobis

Miserere nobis.

JESU Thesauri fidelium,  
 JESU Gemma pretiosa,  
 JESU Armarium perfectionis.  
 JESU Bone pastor ovium  
 JESU Stella maris,  
 JESU Lux vera,  
 JESU Sapientia æterna,  
 JESU Bonitas infinita,  
 JESU Gaudium Angelorum,  
 JESU Rex Patriarcharum.  
 JESU Inspirator Prophetarum,  
 JESU Magister Apostolorum,  
 JESU Doctor Evangelistarum,  
 JESU Fortitudo Martyrum,  
 JESU Lumen Confessorum,  
 JESU Sponse Virginum,  
 JESU Corona Sanctorum omnium.  
 Propitius esto, Parce nobis JESU.  
 Propitius esto, exaudi nos JESU.  
 Ab omni malo, Libera nos JESU.  
 A transgressione mandatorum tuor:  
 Ab omni peccandi occasione.  
 Ab incursu omnium malorum.

*Miserere nobis.*

A morte perpetua ,

A pœnis inferni,

Per incarnationem tuam,

Per Nativitatem tuam,

Per Crucifixionem tuam(tionem

Percælestem Nominis Jesu imposi

Per dolores tuos.

Per flagella tua ,

Per mortem tuam ,

Per Resurrectionem tuam,

Per Ascensionem tuam,

Per gaudia tua ,

Per gloriam tuam;

Per dulcissimam Virginem Matrem tuam, Libera nos Jesu.

Per intercessionem omnium SS. tuorum, Libera nos Jesu.

Peccatores, Te rogamus audi nos.

Ut dulcem melliflui nominis tui memoriam, in tabulis cordis nostri digitō virtutis tuæ inscribere digneris, Te rog: audi nos.

Ut Nomen hoc Sanctissimum & vi-

Libera nos JESU.

ventes in opere , & morientes  
in ore habere mereamur , Te  
rogamus audi nos.

**U**t benignissime Jesu, nobis sis Je-  
sus, Te rogamus audi nos.

Agnus Dei, qui tollis peccata  
mundi, Parce nobis JESU.

Agnus Dei, qui tollis peccata  
mundi. Exaudi nos JESU.

Agnus Dei, qui tollis peccata  
mundi. Miserere nobis JESU.

JESU audi nos.

JESU exaudi nos.

Kyrie eleyson.

Christe eleyson,

Kyrie eleyson.

Pater noster.

**V.** Sit Nomen Domini benedictum.

**R.** Ex hoc nunc , & usq; in saecu-  
lum.

*Oremus.*

**O**mnipotens sempiterne Deus ,  
dirige actus nostros in benepla-

cito tuo, ut in nomine dilecti Filii tui, mereamur bonis operibus abundare.

Deus virtutum, cuius est totum quod est optimum, insere pectoribus nostris amorem tui Nominis, & præsta in nobis religionis augmentum, ut quæ sunt bona nutrias, ac pietatis studio, quæ sunt nutrita custodias: Qui vivis & regnas cum Deo Patre in unitate Spiritu Sancti Deus, per omnia sæcula sæculorum. Amen.



## LITERÆ APOSTOLICÆ

## IN FORMA BREVIUM.

*Quibus Sanctissimus Dominus N. D.  
Benedictus Papa XIII Institutum  
Clericorum Sæcularium in Commune  
Viventium Apostolica Authoritate ab  
Innocentio. P. P. XI. Confirmatum,  
Archiepiscopis, Regni Poloniæ & M.  
D. Lithvaniæ commendavit.*

ima.

*Ad Celsissimum Illusterrimum ac Re-  
verendissimum Dominum Dominum  
Theodorum à Potok POTOCKI Ar-  
chiepiscopum Gnesnensem, Legatum  
Natum Regni Poloniæ & M. D. Lit:  
Primatem Primumq; Principem Ab-  
batem Tynecensem.*

*Venerabilis Frater Salutem & Apo-  
stolicam Benedictionem. Dignissi-  
mam tuo Ordine, tuaq; Pastorali solli-  
citudine operam reputamus, si ad pro-  
pagandum Institutum Clericorum in  
Commune viventium, authoritatis &  
Zeli tui vires impendas. Neq; vero  
gratius Tibi quidpiam esse potest,*

quām ea curare atq; provehere, quāe ad 120  
Ecclesiasticæ Disciplinæ præsidium  
comparata esse intelligis, Te proinde  
Venerabilis Frater Vehementer hor-  
tamur, ut ad laudabile illud; atq; ab  
hac Sancta Sede probatum Clericalis  
vitæ genus, tuendum & amplifican-  
dum, tam in tua ista, quām in cæteris  
Provinciæ Tuæ Ecclesiis eam sedulita-  
tem adhibeas, quam in rebus ad Divi-  
num cultum animarumq; salutem per-  
tinentibus eximia cum laude impende-  
re non prætermittis. Ad Divini siqui-  
dem Honoris & Disciplinæ Incremen-  
tum spectant tam instituti illiq oratio-  
nes, quam nostræ hujusmodi Commen-  
dationis Officia; quibus dum Frater-  
nitatem tuam alaci animo obsecunda-  
turam confidimus, Tibi Venerabilis  
Frater Apostolicam Benedictionem  
permanenter impertimus. Datum Ro-  
mæ apud Sanctam Mariam Majorem  
sub annulo Piscatoris Die xxv. gbris  
MDCCXXVI. Pontificatus nostri  
Anno tertio.

C. Archicp: Emissens [L.S.]

zda

Ad Celsissimum Illustrissimum ac Re-  
verendissimum Dominum Dominum.  
Constantium in Szaniawy SZANIA-  
WSKI. Episcopum Cracoviensem,  
Ducem Severiae.

Venerabilis Frater Salutem & Apo-  
stolicam Benedictionem. Salutares  
fructus, quos ab Instituto Clericorum  
Sæcularium in Communi viventium  
provenire dignoscimus, & uberius  
proventuros esse confidimus, quem-  
admodum vehementer nos excitant,  
ut ad illius incrementum in tua ista  
Diœcesi curas Apostolicas conferamq,  
ita fraternitatis Tuæ operam depo-  
scunt; neq; nos sinunt, quia Tibi gra-  
ta futura sint nostræ benignitatis Of-  
ficia, quibus opem authoritatis, ac  
pietatis Tuæ requirimus, & flagita-  
mus. Quod igitur Institutum ista Ti-  
bi injuncta Pastoralis Ministerii sol-  
licitudo commendet, hoc Virtuti, ac  
Patrocinio Tuo, studiis etiam nostris  
magni-

magnopere commendamus. Enitere propterea Venerabilis Frater pro ea, quam in colenda Domini vinea præstas vigilantia, solertiaq; ut laudatissimæ Institutionis opus latius propagetur, Tuiq; Zeli præsidium jugiter experiatur. Id autem, cum filialis Tua erga nos observantia, & Ecclesiasticæ disciplinæ Zelus cumulatissimè polliceatur, amplius confirmatura speramus Paterna vota, quibus Tuum subсидium poscimus, & præcipuum caritatem, quam fraternitati Apostolicam benedictionem impertimur.

Datum Romæ Die 2. Maii 1726.

Ad Illustrissimum Excellentissimum ac Reverendissimum Dominum Dominum N. PANCERZYNSKI, Episcopum Vilnensem.

Venerabilis Frater Salutem. Quem in cunctis Episcopalis Ministerii Curis & officiis egregie probas, Zelus Ecclesiasticæ Disciplinæ facit: ut

L

quæcunq; ad illius utilitatem & Incrementum redundatura confidimus Tuæ Virtuti ac Vigilantiæ alacri fidentiq; animo commendemus. Hoc autem in genere potissimum vensemus Institutum Clericorum in Communi Viventium, quod hujus Sanctæ Sedis Iudicio probatum, magis adhuc utilitate Ecclesiarum commendari magnopere optamus. Propterea Fraternitatem Tuam ad illius præsidium Paternis Officiis advocamus Tibi certo confirmantes, futurum nobis gratissimum, Tuisq; Pastoralibus laudib⁹ dignum si Tuæ authoritatis ac sollicitudinis opem conseras, & qui soles animarum saluti advigilare, solertiam adhibeas, ut salutaris Institutio in Tua Diœcesi propagetur. Quanti enim Ecclesiæ intersit, ut Clericalis vita optimis Exemplis abundet, fraternitas Tua sat intelligit, idq; si unquam alias, temporum nostrorum conditio vehement-

ter posulat Te igitur adnitente laudabile Institutum nova Incrementa suscipiat, quod non solum ad consolationis nostræ, sed meritorum etiam Tuorum sumulum accedet, ac Fraternitati Tuæ Apostolicam Benedictionem permanenter impertimur. Datum Ramæ Die 2. Maii A.D. 1726.

Similia Brevia ab eodem SSmo sunt data Illüsmis & Rndissimis Episcopis Posnaniensi, Luceorienſi, Płocenſi, &c.

### BREVE APOSTOLICUM

*Sanctissimi Domini N. Innocentii Papæ XI Quo jus ad Beneficia &c. declaratur, & titulus ordinationis pro Clericis Sæcularibus in Commune viventibus conceditur.*

JNNOCENTIUS PAPA XI.

*Ad futuram rei memoriam.*

**P**rospero felique Instituti dilectorum filiorum Clericorum Sæcularium in Communi viventium statui, & progressui quantum No-

L ij

bis ex alto conceditur providere,  
eosq; specialibus favoribus, & gra-  
tiis prosequi volentes, & eorum  
singulares Personas à quibusvis ex-  
communicationis, suspensionis, &  
interdicti, aliisq; Ecclesiasticis sen-  
tentiis, censuris, & pœnis, à jure  
vel ab homine quavis occasione,  
vel causa latis, si quibus quomodo-  
libet innodatæ existunt, ad effe-  
ctum præsentium duntaxat con-  
sequendum harum serie absolven-  
tes & absolutas forè censentes,  
supplicationibus eorum nomine  
Nobis super hoc humiliter porre-  
ctis inclinati: de Congregationis  
nonnullorum ex Venerabilibus  
**Fratribus Nostris Sanctæ Romanæ**  
Ecclesiae Cardinalibus, & aliquo-  
rum ex dilectis filiis Romanæ Cu-  
riæ Prælatis à Nobis specialiter de-  
putatæ consiliô, authoritate Aposto-  
lica tenore præsentium declaramq;

eosdem Clericos Sæculares in  
communi viventes , quorum Insti-  
tutum & Constitutiones nuper ap-  
probavimus , ex assumptione sta-  
tūs & vitæ Communis juxta Insti-  
tutum & Constitutiones hujusmo-  
di nullō modo reddi incapaces Be-  
nefficiorum Ecclesiasticorum , cum  
cura vel sine curâ animarum &  
alias cujuscumq; qualitatis condi-  
tionis vel naturæ existentium , quæ  
per Clericos Sæculares in titulum ,  
Commendam vel administratio-  
nem , aut alias quovis modo obti-  
neri censuerunt , ac proinde ip-  
pos Clericos Sæculares in Com-  
muni viventes , tam præsentes ,  
quam futuros , quæcunq; Beneficia  
Ecclesiastica hujusmodi , quæ de  
præsenti Canonicè obtinent , reti-  
nere , & alia quælibet , servatîs de  
jure servandis , consequi & obtine-  
re posse ; & quatenus ad illa cæ-

teroqui Canonice præsententur, vel  
eligantur aut aliás quovis modo  
assumantur in illis Institui, electio-  
nesque de eorum personis factas  
confirmari posse, & debere in o-  
mnibus & per omnia, perinde ac si  
Institutum prædictum minimè as-  
sumpissent, nec in illo viverent.  
Ita tamen ut ipsi omnibus & singu-  
lis eorundem Beneficiorum obli-  
gationibus satisfaciant, oneraq; il-  
lis incumbentia supportent, quem-  
admodum alii Clerici Sæculares il-  
la obtinentes satisfacere, & sup-  
portare deberent. Præterea eos-  
dem Clericos in communi viven-  
tes, cum Sæculares sint, omnibus  
& singulis Clericorum Sæculari-  
um juribus, prærogativis, præemi-  
nentiis, immunitatibus, facultati-  
bus, & privilegiis uti, frui, potiri,  
gaudere posse & debere. Ac de-  
mum eisdem Clericis Sæcularibus

in Communi viventibus , ut licet  
sufficientem beneficij vel patrimo-  
nii titulum ad sacros ordines de  
jure requisitum non obtineant, ni-  
hilominus de Superioris Generalis  
dicti Instituti pro tempore existen-  
tis licentiâ ad titulum Communia-  
tatis sive Instituti prædicti pro ar-  
bitrio, & conscientia Ordinariorum  
locorum ad sacros Ordines hujus-  
modi, servatîs alias servandis, pro-  
moveri valeant, authoritate & te-  
nore præfatis concedimus , & in-  
dulgemus, eâ tamen lege, ut si eos  
subinde dimitti contingat, idem In-  
stitutum eis omnia ad congruam eo-  
rum sustentationem necessaria sub-  
ministrare teneatur, idque donec,  
& quousque eis aliunde sufficienter  
fuerit provisum, ad id autem præ-  
fatus Superior Generalis bona di-  
cti Instituti in forma Juris valida  
obligare & hypothecare debeat in

manibus eorundem Ordinariorum,  
quibus cura erit sedulō inspicere,  
an eidem Institututo sufficentes  
suppetant facultates, ex quibus ne-  
cessaria sicut præmittitur Clericis  
prædictis valeant, supportatis cæ-  
teris ipsius Instituti oneribus, sub-  
ministrari. Decernentes easdem  
præsentes litteras semper firmas,  
validas , & efficaces existere , &  
fore, suosque plenarios & integros  
effectus sortiri & obtainere , ac illis  
ad quos spectat & pro tempore spe-  
ctabit in omnibus & per omnia  
plenissimè suffragari , & ab eis re-  
spectivè inviolabiliter observari,  
sicque in præmissis per quoscunq;  
Judices Ordinarios & delegatos e-  
tiam causarum Palatii Apostolici  
Auditores judicari & definiri debe-  
re, ac irritum & inane si secus su-  
per his à quoquam quavis authori-  
tate scienter vel ignoranter conti-

gerit attentari. Non obstantibus Apostolicis ac in Universalib⁹ Provincialibusque & Synodalibus Conciliis editis generalibus vel specialibus Constitutionibus, & ordinationibus, nec non quibusvis etiam confirmatione Apostolicā vel quāvis firmitate roboratis, statutis & consuetudinibus, privilegiis quoq; indultis & litteris Apostolicis in contrarium præmissorum quomodolibet concessis, confirmatis, & innovatis, quibus omnibus & singulis illorum tenores præsentibus pro plenē & sufficienter expressis & ad verbum insertis habentes illis alias in suo labore permanfuris ad præmissorum effectum hâc vice duntaxat specialiter & expresse derogamus, cæterisque contrariis quibuscumque. Volumus autem, ut earundem præsentium literarum transumptis, seu exemplis, etiam

impressis , manū alicujus Notarii  
publici subscriptis , & sigillō per-  
sonæ in Ecclesiastica dignitate con-  
stitutæ munitis , eadem prorsus  
fides ubique locorum tam in judi-  
cio , quām extra illud habeatur ,  
quæ haberetur ipsis præsentibus , si  
forent exhibitæ vel ostensæ . Da-  
tum Romæ apud Sanctam Mariam  
Majorem sub Annulo Piscatoris  
die ix Febr: MDCLXXXV . Ponti-  
ficatus Nostri Anno Nono .

J. G. Slusius.

*Loco † Annuli Piscatoris  
Laurentius Bellus.*

*Cur: Cauf: Cam: Apost: Notar.  
Romæ, Ex Typographia Reverendæ  
Cameræ Apostolicæ MDCLXXXV.*

### BREVE APOSTOLICUM.

*Sanctissimi D.N. Innocentii Papæ XI  
Concessionis Indulgentiarum pro In-  
stituto Clericorum Sæcularium in  
Commune viventium.*

**INNOCENTIUS PP. XI,**  
*Ad perpetuam rei memoriam.*

Cum Nos Institutum , & Constitu-  
tiones Clericorum Sæculari-  
um, in Commune viventium au-  
toritate Apostolica confirmaverimus,  
& (sicut accepimus) iudem Clerici  
in vinea Domini ad animarum sa-  
lutem strenue laborent, multaque  
pietatis, & Christianæ charitatis o-  
pera assidue exerceant: hinc est,  
quod Nos felici eorum in vinea  
mandatorum Domini progressui,  
dicti⁹; Instituti ad Dei gloriam, &  
Ecclesiæ Catholicæ, cui Superni  
dispositione consilii, merit⁹ licet  
imparibus præsidemus, utilitatem,  
spiritualem⁹; Christi fidelium ædi-  
ficationem propagationi, & incre-  
mento, quantum Nobis ex alto  
conreditur, providere cupientes,  
de omnipotentis Dei misericordia,  
ac Beatorum Petri & Pauli Apo-  
stolorum ejus auctoritate confisi,  
omnibus, & singulis Clericis Sæ-

eularibus, qui dictum Institutum in posterum ingredientur, die primo eorum ingressus, si vere pænitentes, & Confessi, Sanctissimum Eucharistiae Sacramentum sumpserint, plenariam, illis quoq; qui Institutum hujusmodi ingressi, & in eo viventes juramentum de perseverando usque ad mortem in eodem Instituto juxta Constitutiones prædictas præstiterint, & verè simili ter pœnitentes, & confessi, eo die Saerâ Communione refecti fuerint, itidem plenariam; ac præfatis Clericis Sæcularibus in Commune viventibus, nunc & pro tempore existentibus, in cuiuslibet eorum mortis articulo, si verè pariter pœnitentes, & confessi, ac Sacrâ Communione refecti, vel quatenus id facere nequiverint, saltem contriti, Nomen Jesu ore, si poterint, si minus, corde devotè invocaverint,

etiam plenariam; præterea iisdem  
præsentibus, & futuris Clericis Sæ-  
cularibus verè similiter pœnitenti-  
bus & confessis, ac Sacra Com-  
munione refectis, qui aliquam dicti  
Instituti Ecclesiam vel Oratorium,  
vel Parochialem Ecclesiam loci, ubi  
pro tempore commorabuntur, die  
festo S. Petri ad Vincula à primis  
Vesperis usque ad occasum Solis  
diei hujusmodi annis singulis devo-  
tè visitaverint, & ibi pro felici In-  
stituti præfati progreſſu & propa-  
gatione ac pro Christianorum Prin-  
cipum concordia, hæresum extir-  
patione, ac Sanctæ Matris Eccle-  
siæ exaltatione pias ad Deum pre-  
ces effuderint, pariter plenariam;  
Insuper eisdem Clericis Sæculari-  
bus in Commune viventibus, qui  
spiritulia exercitia per octiduum  
continuum in aliqua ejusdem Insti-  
tuti domo peregerint, & interea

verè quoq; pœnitentes , & confes-  
si, Sanctissimum Eucharistiae Sacra-  
mentum prædictum sumpserint, ac  
ut præfertur, oraverint, similiter  
plenariam semel in anno omnium  
peccatorum suorum Indulgentiam,  
& remissionem misericorditer in  
Domino concedimus. Ac demum  
eisdem Clericis Sæcularibus præ-  
sentibus , & futuris sub Instituto  
prædicto viventibus , qui singulis  
diebus manè conscientiam suam di-  
ligenter examinaverint, cum pro-  
posito à peccatis abstinendi, & se  
corrigendi, ac Litanias Beatæ Ma-  
riæ Virginis devotè recitaverint,  
& ut supra expressum est , orave-  
rint, centum dies pro unoquoque  
die, quô id egerint, de injunctis eis,  
seu alias quomodolibet debitis pœ-  
nitentiis in forma Ecclesiæ con-  
sueta relaxamus. Præsentibus per-  
petuis futuris temporibus valituri.

Volumus autem, ut earundem præsentium litterarum transumptis, seu exemplis, etiam impressis manu alicujus Notarii publici subscriptis, & sigillō personæ in Ecclesiastica dignitate constitutæ munitis, eadem prorsus fides ubique locorum habeatur, quæ haberetur ipsis præsentibus, si forent exhibitæ vel ostensæ. Datum Romæ apud Sanctam Mariam Majorem sub annulo Piscatoris die XI. Aprilis MDCLXXXV. Pontificatus nostri A. Nono.

*Loco † Annuli Piscatoris*

*J. G. Slusius.*

## BREVIS DELINEATIO

*Vitæ Eximii Servi Dei Bartholomæi  
HOLZHAUSER Presbyteri Sæcularis  
&*

**JNSTITUTI CLERICORUM**  
*Sæcularium in Commune viventium.  
Initium & progressus.*

**V**enerabilis Vir Bartholomæus  
Holzhauser p.m. in pago Lon-

gnau quatuor horas Dilingâ sub di-  
tione Illusterrimorum DD. Comi-  
tum Fuggerorum sito, circa Festum  
S. Bartholomæi 1613. natus, lati-  
nitatis rudimenta Augustæ Vindeli-  
corum posuit: litteras humaniores  
Neoburgi ad Danubium, Ingolsta-  
dii verò Philosophicas, & Theolo-  
gicas disciplinas absolvit: ubi & S.  
Presbyteratûs Ordine ritè initiatus  
ipso die festo Pentecostes 1639. in  
Capella B.V. MARIAE de Victoria  
primum Sacrum fecit: Anno dein  
1640. in sequente, & studiorum  
suorum Theologicorum postremo,  
llicentiâ Doctoratûs Theologici in-  
signitus rectâ Salisburgum se con-  
tulit, prima vitæ Clericorum Sæ-  
cularium in communi viventium  
restaurandæ fundamenta positurus,  
id quod cum aliquot suæ intentio-  
nis Sacerdotibus in Ecclesia Col-  
legiata S. Laurentii in Tittmoning,

in Canonicum Curatum assumpt<sup>9</sup>,  
ipso D. Petri ad Vincula die ejus-  
dem anni re ipsa præstitit. Annō  
1642. jubetur esse Vicarius Reve-  
rendissimi, & Illustrissimi Princi-  
pis Episcopi Chiemensis & Deea-  
nus ad S. Joannem in Leoggonthal;  
ubi usque ad annum 1655. cum ma-  
gno subditorum ac pauperum, nec  
minori complurium Sacerdotū  
id temporis furorem Svecicum de-  
clinantium, ac aliorum quorum-  
cunq; quācunq; animi perturbatio-  
ne pulsatorum, subsidio & solatio  
persttit. Inde vocatus ab Eminen-  
tissimo & Celsissimo Principe Ele-  
ctore Moguntino Joanne Philippo  
per triennium Decanus & Paroch<sup>9</sup>  
Bingae infra Moguntiam suit usq; ad  
20. die m<sup>o</sup> Maii 1658. quā sub horam-  
nonam matutinam in præsentia qua-  
tuor Sacerdotum animam ejus Deo  
commendantium, cum per ventum

esset ad illa verba : *Subvenite San-  
cti Dei, &c.* inter sereni vultus indi-  
cia, Sacramentis Ecclesiæ ritè pro-  
visus animam Deo reddidit ; cum  
annos vitæ numeraret quadragin-  
ta quinq; minus tres menses ; atq;  
secundum restitutam à se vitam  
communem in Clero Sæculari su-  
perstes annos egisset octodecim,  
vidissetq; non sine magno suo sola-  
tio eandem receptam in binis Ar-  
chiepiscopatibus Salisburgensi &  
Moguntino, nec non in Episcopa-  
tibus tribus Chiemensi, Frisingensi,  
ac Heripolensi, majoribus identi-  
dem incrementis succrescere ; in  
quorum posteriori non solum anno  
1654. Clericis vitam hanc commu-  
nem viventibus Seminarium, & plu-  
ra Parochialia beneficia collata  
sunt, sed ipsum etiam eorum Insti-  
tutum anno 1655. publicis literis  
(prout & anno 1644. ab Illustris-

simo & Reverendissimo Principe  
Episcopo Curiensi, & anno 1653. à  
pariter Illusterrimo & Reverendis-  
simo Principe Episcopo Ratisbo-  
nenſi pro eorum Diœcēſib⁹ appro-  
batum, & commendatum per to-  
tam Diœcesim extitit. Ab obitu V.  
D. Bartholomæi cura Sacerdotum  
eiusdem Instituti effecit, ut annō  
1661. Moguntiæ Seminarium pro  
eodem Instituto fuerit erectum ac  
dein ipsius Constitutiones appro-  
batæ, ac jussu & authoritate Emi-  
nentissimi Archiepiscopi An: 1662  
primò impressæ publicatæq; fue-  
rint. Cujus prudentissimi Principis  
Electoris secutus exemplum Illu-  
strissimus ac Reverendissimus SRJ.  
Princeps Præpositus ac Dominus  
Elvacensis, Episcopatus Augustani  
id temporis Administrator, huic  
Instituto in Principatum suum in  
modo dicta Augustana Diœcesi exi-

stentem, jam anno 1663. à le introducto, Beneficia aliquod Parochialia committi, & insuper Seminarium in Civitate Dilingæ sub Patrocinio S. Francisci de Sales, in Episcopum electus anno 1665. erigi, ac ipsas etiam Constitutiones denudò imprimi curavit, Annis de hinc 1666. in Diœcesim Passavensem receptum, & 1674. in Archiepiscopatum Strigonensem Regni Ungariæ Primum introductum suit idem Institutum, ibiq; anno 1676. approbatum, atq; Episcopis Comprovincialibꝫ singulari Archipræfulis illius Zelo commendatum, an: 1680  
26. April: S. Congregatio Eminentissimorum Cardinalium in hunc finem specialiter deputata illud auctoritate Apostolicâ approbandum censuit, sicut eādem auctoritate die 7. Junii ejusdem anni a SND. Innocentio PP. XI. unà cum Constitu-

tionib<sup>9</sup> in forma specifica sicut approbatum & confirmatum, atq; Romano Imperatori, diversis Archiepiscopis, Episcopis, & Principibus per Brevia Apostolica commendatum. Anno 1682. Rex Hispaniarum in ejusdem introductionem in Regnis suis cum Consilio Regio, clementissimè consensit, ac proinde favente Reverendissimo & Illusterrissimo Episcopo in Civitate Gerundensi Seminarium cæptum sicut. Jisdem temporibus Eminentissim<sup>9</sup> Cardinalis de Norfocia Regnorum Angliae & Scotiae Protector, eorumdem Regnorum Sacerdotib<sup>9</sup> omnibus, hocce Institutum Clericorum Communis vitæ Pastoralib<sup>9</sup> litteris commendavit; Quod similiter Eminentissimus Cardinalis de Alteriis S.R.E. Camerarius pro Regno Hiberniae præststit. Circa idem tempus etiam in Italiam plantatum est

Institutum , præcipuè in Regno Si-  
ciliæ, iam duodecim Domus Colle-  
giatæ à Sacerdotibus Communis  
vitæ inhabitantur. Anno deinde  
1683. Singulari *Serenissimi Regis*  
*Regni Poloniae* benevolentia, *illu-*  
*strissimus & Rendissimus Episcopus*  
*Posnaniensis* idem Institutum , in su-  
um Episcopatum introduxit. Quem  
brevi post , nempè 1684. secutus  
*Illusterrimus Episcopus Luceoriensis*,  
idem Institutum in suo Episcopatu-  
cum Consensu Synodi Diœcesanæ  
acceptavit & Seminarii Janoviæ  
fundati, directionem commisit. An-  
nò verò 1685. Id ipsum per Comi-  
tia Generalia publicè receptum est.  
Eodem anno cum consensu V. Ca-  
pituli Varsaviensis Ecclesiæ Colle-  
giatæ S. Joannis, directio Semina-  
rii penes dictam Ecclesiam erecti,  
ejusdem Instituti Sacerdotibus con-  
credata. Successu temporis circa

annum 1699. *Illusterrimus D. Dol-*  
*ski Mareschalcus M.D Lithuaniae, in*  
*suis bonis Hæreditariis Carolin*  
*pè Pinscum, Præposituram pro Sa-*  
*cerdotibus Communis vitæ de no-*  
*vâ radice erexit anno dein 1711.*  
*Illusterrimus & Excellentissimus Do-*  
*minus Joannes Bonaventura, in Cra-*  
*sne Comes Krasinski Palatinus Plo-*  
*censis, Parochianuam suam Vęgrovien-*  
*sem in Præposituralem erexit, &*  
*novâ fundatione auctam, Clericis*  
*Sæcularib⁹ in Commune viventi-*  
*bus tradidit. Iisdem temporib⁹ no-*  
*va fundatio Cameneci Lithvanien-*  
*sis facta, pro eodem Instituto per*  
*Synodum & Decretum Illusterrimi*  
*Episcopi Luceoriensis, atq: V. Capi-*  
*tuli confirmata, Recenter verò Cel-*  
*lissimus Princeps Constantinus Sza-*  
*niewski Episcopus Cracoviensis An-*  
*no 1726. Sacerdotes Sæculares in*  
*Communi viventes in Almam Diæ-*

cesim Cracoviensem admisit, tradi-  
dendo eisdem Clericis Sæminarium  
Dioecesanum Kielcense; quod à  
Præfato *Celissimo*, à fundamentis,  
in Amplissimâ & magnificâ formâ  
de muro ædificatum, sufficientique  
ac largâ dote provisum est & fun-  
datum. Recentissime *Illustriſſimumq*  
*& Excellentissimus Dominus Archie-*  
*piscopus Metropolitanus Leopoliensis*  
*Joannes Skarhek* præfatum Institutum  
ad suam Archidiœcesim intro-  
duxit, ad interim Seminarium Dioce-  
esanum hujus vitæ Sacerdotibus  
committendo. *Illustriſſima* verò *Sie-*  
*niańska Ducissa Regni*, novam in  
eadem Archidiœcesi fecit fundatio-  
nem, Sacerdotes hujus Instituti lo-  
cando ad Ecclesiam Præpositura-  
lem in Arce Brzezanensi.

## EPISTOLA FUNDAMENTAIS

Ven: Viri Bartholomæi HOLTZHAU-  
SERI Restitutoris vitæ communis Cle-  
ricorum Sæcularium; quam ad suos  
Asscelas adverfitatibus pressos, iis-  
dem & posteris eorum pro solatio scri-  
psit. Anno 1644.

Pax, Gratia & Charitas Dei cum omnib⁹ vobis A.

Inter cæteras solicitudines, Fra-  
tres Charissimi, quib⁹ per omne  
Tempus erga minimum vitæ Cleri-  
calis novum institutum superabun-  
do; quomodo videlicet continuem  
cursum meum & fidelis inveniar?  
Omnium maxima est de vobis,  
non solum autem de vobis, verūm  
etiam de omnibus, qui in hoc vi-  
tæ proposito continentur, ut in  
obsequio fidei & incorruptæ simpli-  
citatis contra mundi carnis & dia-  
boli machinamenta inviolati subsi-  
stant; Quō Fundamento firmiter  
stante, sicut omnium hostium Tela

M

in vanum cadent, ita sanè eodem labente structura vestra spiritualis totally rueret. Et bonam meam sollicitudinem magis & quidem de vobis illud auget: quod audivi inter vos murmur & Spiritus disgustum exurgere contrarium probationi fidei vestræ; quod ex parte credo: Cum sciam, quia satan vos cribrabit, habens enim iram magnam ex innumerabilibus fructib⁹, quos defacto ex hoc modico evenire & magis eventuros astutè sagax prævidet, non ita facilè inultos vos transire permettet, sed secundūm Tempus & tempora (prout & quantum Dei dispensatio permiserit) multūm insidiabitur calcaneo fidei vestræ, & intelligentias vestras in humano sensu propriæ sapientiæ exacuans; simplicitatem spei vestræ primæ, in quā olim benè ambulabatis, ex adversis variè contingentibus enervare conabitur. Ex quo capite tandem omnem confidentiam erga eum, qui hoc negotium dirigit, amitteretis, & remissi facti in probatione fidei vestræ animum desponderetis, respicientes post quietam ollarum Egypciacarum fruitionem; quā mundum hunc & amatores illius gaudere cum

dolore conspicitis. Et quamvis in Christo Iesu, qui fidelis Deus est penitus confidam, vos ultra id; quod potestis sustinere, & utile vobis est non tentandos esse; verum tamen non tam præsenti malo remederi, quam de futuro præcavere volens, hanc Epistolam vobis scribo, ex qua sciatis contra omnem eventum contrarium in inviolata fide probationis vestræ immoti per gratiam Dei stare.

Primum fundamentum, cui in omnibus difficultatibus & adversitatibus unicè innitamini, est fides vestra; quæ in spe filiorum Dei sine hæsitatione penitus confidere debetis; Me, et si indignum ad hoc opus Ecclesiæ Christi dispositione miserantis Dei prorsus vocatum: deinde vos omnes similiter in ejusdem operis Ministerium præordinatos & vocatos esse: Quæ vocatio mihi quidem revelatione divinâ per fidem certò constat, de quæ plura litteris consignare, humilitatis modestia, & Personæ meæ peccataricis vilitas non sinunt; vobis vero omnibus sicut & mihi decursus omnium eorum, per quæ isto quatriennio propositum nostrum exurrexit & conatus simplicitatis nostræ fuere præventi, prædictam

vestram vocationem tanquam per si-  
gna credibilitatis omnino indubiam  
redit, si modo ea pensiculatè per or-  
dinem considerare velimus. Quam e-  
nim mirabiliter conjuncti sumus! quam  
conjunctionem neq; caro aut sanguis,  
neq; proprii amoris stimulus, aut va-  
ni alicujus honoris incentivum, nec  
denique ullum aliud temporale com-  
modum ac humanum interesse effec-  
re, cum hæc omnia à nostro proposi-  
to penitus proscripta & procul rele-  
gata manifestè cernantur. Ergo gratia-  
Spiritù Sancti, qui consolatur humili-  
les, conjunxit nos, & vocavit conso-  
latione suâ ad opus, in quo parturien-  
tes Spiritu laboramus. Deinde, quis  
nos in hâc unitate hactenus conser-  
vavit, & fortitudinem & Spiritù lon-  
ganimitatem ac patientiam Crucis  
tribuit, quæ tanquam fortes Athele-  
tæ Christi per omnia adversa calcan-  
tes gaudio spirituali sustinuimus? quod  
enim angustiæ & tribulationes, &  
Cruces, & pericula ex hoc mundo, ex  
falsis fratribus, ex insidiis hominum,  
ex linguis mendacium, ex susurratio-  
ne invidentium, ex detractionibus i-  
gnorantium & ex insultibus diabolo-  
rum, qui omnia tentaverunt jam ab in-

tra, jam ab extra turbationes animo-  
rum, antipathias ingeniorum, contra-  
rietates opinionum & judiciorum: nos  
ipsos saepius adversus invicem conci-  
tavit! Zelumi indiscretum in animis  
hominum contra nos, tanquam incen-  
dium effervescere fecit, quo incensi,  
multi putantes se obsequium superio-  
ri potestati praestare, nos humiles per-  
secuti sunt, & obstacula posuerunt &  
disturbare nos voluerunt verbô, facto  
& exemplô & sexcenta alia. Et in his  
omnibus sustinimus crucem, didici-  
mus pati; & non solum nemo ex no-  
bis defecit, sed fortiores facti sumus,  
& exuperavit gaudium, consolatio &  
gratia Dei in cordibus nostris, quae o-  
mnia certam vocationem nostram red-  
dunt, & solidissime probant ex hac  
minimâ, ex humili plantulâ ejusmodi  
arborem exurrecturam in his ultimis  
diebô, quae umbraculum faciat aestuan-  
ti huic saeculo in sceleribus suis. De-  
nique finis & media hujus vocationis  
honestate, necessitate, & utilitate ple-  
na & possibilia præ oculis existunt,  
sicut omnes homines alicujus ingenii,  
qui institutum legerunt, aut legunt  
sine affectu judicantes unanimiter fa-  
tentur. Quis ergo inspiravit? An

diabolus ? Sed contra regnum suum  
quod per hanc vitam directè destrui-  
tur, nihil faciet aut inspirabit. An  
propria sapientia ? Sed ipsi scitis me  
a puero parvulum lactentem fuisse u-  
bera simplicitatis; neq; in persuasibili-  
bus humanæ Sapientiæ argumentis  
exuperâsse. Quid ergo aliud dicem⁹,  
nisi Jesum Christum per Matrem suam,  
& voluntatem, & intelligentiam, & o-  
pus hoc in manibus nostris posuisse:  
resperxit enim nos humiles & abscondit  
haec a Sapientibus qui fuerunt tot  
saeculis & revelavit ea parvulis suis  
servis, qui facient & benedicentur &  
prosperabuntur in multâ humilitate.  
Ergo vocati sumus a Christo Iesu in o-  
pus & coronidem operis sui Sancti in  
Ecclesiæ ædificationem, ergo etiam  
omnia cooperabuntur nobis in bonum  
finaliter. Ergo adversa variè nobis con-  
tingentia, quæ subinde secundum præ-  
sentem instantiam nos urgent, non de-  
stituunt vocationem nostram primam,  
sed ædificant & probationem fidei no-  
stræ afferunt; probatio autem spem,  
spes verò non confundit. Quid ergo  
dicem⁹ in adversis; quod infidelis sit  
Deus, absit. Quod reprobus sit vester  
Antesignanus, aut quod seducatur spi-

ritu fallaci fugacitatis, nullò modo;  
sed probatio fidei horum omnium fi-  
nis est: Cum etiam Sancti Dei con-  
temptibiles & imbecilles in præsentि  
vita extiterint: Ergo non consumma-  
verunt cursum, ergo seducti sunt va-  
nō spiritu fugacitatis? nullò modo, sed  
probati sunt in paucis & in multis be-  
nè dispositi. Cum enim quis probatus  
fuerit, & probatio fidei apud, Deum  
mensuram suam impleverit, accipiet  
coronam fidei, quâ fidelis per omnia  
adversa substitit per gratiam Christi.

Secundum Fundamentum est scien-  
tia in adversis & difficilibus, quâ vide-  
licet prudenter sciatis, in quem finem  
divina Providentia illa permittat: quod  
fundamentum quia in vobis radica-  
tum non est, in vocatione vestrâ subin-  
de nutantes turbabimini ad tempus,  
Hoc ergo scitote intelligentes, quod  
Deus omnia sua opera præcipua in  
summâ humilitate exurgere voluerit.  
Deinde incrementum aliud etiam De-  
us ab æterno non disposuit, quam in  
gentes difficultates, tribulationes, ad-  
versa, cruces, contemptus, detractio-  
nes, falsiloquia, judicia contraria ho-  
minum, falsos Fratres, Zelum indi-  
scerum persecutorum; iusdias inimi-

corum Crucis Christi Machinamenta  
occulta diabolorum & errores, & tem-  
tationes & sexcenta alia , quæ o-  
mnia hujusmodi operum incremen-  
tum Dei Sapientia esse voluit , ut pri-  
mari lapides posteritati in omni humi-  
litate , patientiâ & longanimitate, tan-  
quam purissimum aurum in igne pro-  
bati subsistentiam mererentur. Elegit  
enim Deus stulta hujus mundi, ut con-  
fundat fortia. Et hoc Fratres charis-  
simi , esse veritatem solidissimè fu-  
ndatam, vobis constare potest nou fo-  
lium ex scripturâ, verum etiam ex o-  
mnibus retro saeculis, in quibus viri  
fortes Ecclesiam Dei operib⁹ suis San-  
ctis ædificaverant. Ergo adversa, et si se-  
cundum præsentem instantiam pror-  
fus destructura subinde exurgentem  
nostram plantulam videantur ; nullō  
modo destruunt, sed magis ædificant;  
& vos omnes in virtutibus & scientiâ  
depurant. Quæ facies erat exurgen-  
tis Ecclesiæ Xsti; secti sunt , distenti  
sunt, dispersi sunt, lapidati sunt; com-  
busiti sunt. Si hodie Mille Christiani  
facti, sequenti die sæpius omnes oc-  
cisi, & turbatio usq; ad aliquot cen-  
tenos annos. Contempti sunt, stulti  
habiti, ducti ad præsides , & quis pru-  
dens sibi imaginari tunc poterat Ec-

eleſiam hanc ſive ſectam (ut vocarunt  
prudentes hujus Sæculi) ad ſtatum  
Monarchicum mundi perventuram;  
cum ad aliquot centenos annos, nihil  
niſi occiſio, & turbatio, & inundatio  
malorum fuerit. Sed vos dicitis: viſi  
illi Spiritum Dei habuerunt, nos au-  
tem infirmi ſumus, erramus, ſeduci-  
mur, indiscreti ſumus, immaturum Ze-  
lum habemus: & enīlpa noſtrā tribula-  
tiones nobis eveniunt. Verūm etſi Spi-  
ritum Dei habuerint, tamen haec i-  
plis etiam & millies graviora in pro-  
bationem fidei acciderunt, ingemue-  
runt ſub jugo malorum. Apostolus di-  
cit: tædet nos vivere: infirmi erant,  
indiscreti erant, tentati ſunt, conten-  
tiones habebant, æmulabantur, pecca-  
verunt, erraverunt: imponebant manus  
& dabant Spiritum Sanctum indignis  
decepti: poſtea illi utpote ex diabo-  
lo inceperunt ſchismata. haereses, &  
docuerunt contra, rebelles facti, ſicut  
maxime conqueritur Apostolus Pau-  
lus de falsis fratribus. Quid ergo di-  
cemus de his? ergo Spiritum Dei non  
habuerunt, aut exciderunt de gratia  
Spiritus discretionis; nullō modo: Sed  
Deus permittit ſubtrahendo ad tem-  
pus ſine culpa lumen veritatis in pro-

bationem fidei Sanctorum. Deinde in  
Temporalibus constituerunt econo-  
mos, Diaconos; et falsi Fratres se ma-  
gis motivô necessitatis & sustentatio-  
nis per otium associârunt: postea re-  
bellaverunt, defraudaverunt, accepe-  
runt; discesserunt, elati sunt, & de-  
voraverunt. Ubi hoc scriptum est; in  
Apostolo Paulo dicente: sustinetis ve-  
rò, si quis in servitutem redigit, si quis  
devorat, si quis accipit, si quis extol-  
litur. Secundum ignobilitatem dico,  
quasi nos infirmi fuerimus in hâc par-  
te. Hoc & ego dico vobis, in hâc par-  
te, quâ vehementer vos disgustatos &  
impatientes fuisse & esse, scio: Ite-  
rnm dico, ne quis putet me ideò esse  
insipientem; quod multi devoraverint,  
multi acceperint, multi elati sint &  
discesserint: In his ego gloriabor,  
quia sustinui sine culpâ, quid dicem⁹  
ergo in his; ergo nos peribimus, ergo  
temporalia in ruinam nobis erunt, er-  
go nos dissolvemur? nullō modo: sed  
magis ex hoc sapientes erimus, con-  
firmabimus & divites erimus multum  
& stabimus gloriantes in omnibus his  
per Jesum Christum Crucifixum: Si  
enim ipsi passi sunt, & millies plura,  
& graviora passi sunt, & nos patientes

talia fidem accipimus firmam de consummando cursu nostro, quem gratiâ Jesu Christi & Ecclesiæ suæ Sanctæ nos evacuantes suscepimus. Ergo ô Fratres mei charissimi, alacres estote, & omne gaudium existimate, si in varias tentationes incideritis; probatio enim fidei vestræ pretiosior omni aurô & argentô. Itaq; fratres mei charissimi, nolite terrerri, nollite turbari in omnibus adversis, sed gaudete & sperate, & omnem confidentiam, hæc videntes in vobis concipite; quia hæc omnia solidissimum fundamentum sunt ex quo scire possumus, cursum nostrum nos feliciter & finaliter consummaturos Cælum non statim ruet, neque statim secundum præsentem malorum instantiam institutum nostrum peribit: sunt muscae diaboli, & quô major turbatio, eo minus ego turbor, & quo majora pericula, eo minus ego euero in fortitudine Spiritûs per Iesum Christum confirmatus.

Tertium Fundamentum est libertas Filiorum Dei, in qua stantes liberè agimus foras missò timore inani offensionis humanæ; neq; attendentes ad humanam hujusmodi sapientiam, quæ stultitia est apud Deum; Domi-

num Cæli timemus , Præcepta ejus  
observamus, implentes etiam ea, quæ  
Superiorum potestates nobis Canoni-  
cè mandant, in cursu nostro & in acti-  
bus nostris libertatem servamus, non  
curantes eos, qui resistere nobis vo-  
luerint, aut opera nostra judicantes  
reprehenderint, & sinistrè omnia in-  
terpretati fuerint. Hæc libertas Fi-  
liorū Dei, in qua omnes Sancti Dei,  
& viri fortes stantes olim cursum su-  
um consummaverunt, nobis tam ne-  
cessaria est, quam necessaria est ani-  
ma corpori, sine qua mortui sumus:  
in hac libertate Fratres , vellem ita  
vos abundare sicut in timiditate inani-  
vos abundare scio: nimis cito turbami-  
ni credentes judicantibus vos: nihil  
arduum audetis timentes etiam mi-  
nimas confusiones: pacem cordis amit-  
tis nimis inordinate placere cupien-  
tes omnibus, maximè iis qui foris no-  
bis præfunt, quibus impossibile est in  
cursu nostro semper placere, quidquid  
dicant homines , non curandum si se-  
cundum Regulam mandatorum Chri-  
sti & Ecclesiæ ejus operemur : Quid  
verba hominum ? Volant, nec lapides  
movere possunt, neq; maiores neque  
minores estis ex verbis eorum. Nimis

aniles estis attendentes ad omnia, quæ  
sparguntur, quibus & cor præbetis, &  
in iis sæpius usque ad turbationem &  
pusillanimitatem & despensionem ani-  
mi involvimi. Judicia hominum ni-  
mis superstitione accipitis, mihi au-  
tem pro minimo certe est, si ab homi-  
nibus judicor: Hinc vos in vobis ipsis  
diffiditis, contemptibiles efficiemini,  
& timidi & nihil audetis arduum in  
bonis, quia verba & judicia reprehen-  
sionesq; Hominum timetis. Creditis  
inimicis vestris, & dimittitis de spe  
vocationis vestræ, vocatis in quæstio-  
nem vocationem vestram, tanquam  
dubiam rem, quam firmiter credere,  
sperare & resignare humillimè divi-  
næ voluntati deberetis, stantes firmi  
in Fundamento vocationis vestræ.  
Quid ergo hic vel ille, qui libertatem  
carnis & Spiritus diligit, aut ignorat,  
nesciens intrinsecam instituti structu-  
ram. judicat nos, non posse cursum  
inceptum consummare, nos non con-  
summabimus! An judicium hominum  
Dei voluntatem evertet, & faciet de-  
creta ejus irrita, opera suæ potentiae  
impossibilia, Sapientiae insipientia,  
fortia imbecillia, ardua non futura, dif-  
ficilia non possibilia? Nullo modo,

Proinde vos infirmi estis, & libertatem Sanctam nondum benè radicatam habetis citò in vobis ipsis ex verbis & judiciis hominum inaniter diffluentes. Et ex hoc capite opera nostra in timore & pusillanimitate fiunt, judicia instabilita, proposita infirma, & Consilia nostra tanquam arundo ventis agitata, omni mutabilitati subjecta cernuntur. Ergo unusquisque hujusmodi libertatis subsistentiam per gratiam Dei & frequentationem actuum in animo acquirere, & probè fundare studeat, in quâ veluti in quodam propugnaculo stantes liberè operari, bona proposita executioni dare, & Consilia benè stabilita habere possitis, si debitâ circum spectione & providentiâ illâ semel rectè ponderaveritis. Essetis enim hic servi, quibus mundus illudaret, & tandem in eam angustiam animi coniiceret, quæ vos totaliter in agendo perplexos redderet; cum nihil tam Sanctum & prudens factum fannq; Consilium, quod non Sapientia hujus mundi carpere possit.

Quartum Fundamentum est ut vobis firmiter persuadeatis, cursum huius vitæ propositi per media ordinata, quæ in humana providentia semper

existant aut existere videantur, conse-  
quenter neq; via ordinaria per huma-  
num ordinem perpetuò decurrere posse  
Hoc se ita labere ipsi vobis facile per-  
suadebitis, si consideretis, quod non so-  
lum nulla via extet, quam ad hanc  
vitam & Clericorum coniunctionem a-  
liquis nobis stravit; verum etiam  
quod Divina Providentia proposito fi-  
ne Militibus suis ad Majorem Glori-  
am meritorum media ordinarie ab-  
scondat; sicut Pater aliquis volens ad  
se attrahere filium, manum ostendit,  
nucem vero abscondit: Hinc semper  
difficultatem & maximam arduitatem  
mediorum in executione finis servis  
suis relinquit, quam postea mediante  
suâ gratia & auxiliô per ingentes la-  
bores, curas, preces, varia Consilia,  
industriam, crues, tribulationes, va-  
rietates bonorum & malorum prospe-  
rorum & adversorum superantes vin-  
cere debent. Et hoc ita Deum asso-  
lere nobis ex omnibus retro saeculis  
constat, ubi semper proposito fine ser-  
vis suis abscondit media, ut illa per  
Heroicam fidem, spem & resignatio-  
nem a Domino successivè tanquam per  
violentiam Spiritualem efflagitarent,  
sic Deus Abraham promittit, dicens;

Multiplicabo Seimen tuum sicut Stellas Cœli, medium autem ob Saræ sterilitatem nullum extitit. Sed credit Abraham, & reputatum est ei ad justitiam, quâ meruit Filium præter Naturam accipere; postea probans Deus Abraham, an infirmus esset in fide, spe & resignatione; jussit immolari Filium suum: & sic iterum nullum prorsus medium ad illum finem cernebatur: Et obedivit Abraham & credidit contra spem, de spe priori in spem alteram, & meruit audire vocem Angeli de non immolando Filio suo. Et sic saepissimè Deus non solum media abscondit, sed dans illa denuo irrita saepè facit ad tempus, ut ad maiorem fidem, spem & resignationem servos suos alliciat. Sic & nos in nostro proposito procedere debemus, et si media certa subinde non apparent, aut apparentia denuo deficiant & irritentur, de fide tamen spe & resignatione in Dominum nostrum Iesum Christum & Matrem ejus, aut de fine proposito quidquam recedere non debemus, sed alacriores reddi ad laborandum: Sic omnibus Fundatoriis Statuum Deus proposuit finem, & media abscondit, & tamen finem felicem.

citer assecuti sunt, non per viam ordinariam & media in humana providentiâ jam existentia, sed per Fidem mereri debuerunt & per laborem assequi, quod non viderant. Sic & mihi Deus ante undecim annos in revelatione per fidem finem posuit, media autem prorsus abscondit; Et credere didici contra spem, de spe in spem alteram: & accipere merui universale sistema alicujus Monarchici Corporis de quo scitis, sed media ulterius non vidi, quibus propositum meum inciperem: proinde credidi tanquam cæcus innitens baculo divinæ voluntatis & credidi contra spem, de spe priori in spem alteram. Et Deus movit corda vestra contra voluntatem vestram naturalem, ut essetis Socii & parati ad hanc vitam, & sic usque huc sicut ipsi scitis, in fide, spe & resignatione cordis ambulavi, & pleraq; praeter humanam expectationem in confessionem hujus Sæculi Sapientiæ acciderunt & prosperata sunt, ut optimæ menioriâ tenetis, itaque quia media viâ ordinaria in aliqua humana providentiâ non existunt, quid mirum est, si ii, qui foris sunt, sinistre dispositionem nostram judicent & insipien-

tiam æstiment, aut quid turbamini, si  
subinde errore decipiamur, viam enim  
à nemine stratam quis, sine errore &  
peccato maximè politico accedet,  
quæ tam ardua & spinosa est? Hoc i-  
deo dico, ut sicut ego vestras liben-  
ter infirmitates sustineo, ita vos erro-  
res meos & defectus ad extra, quos  
Deus in mei humiliationem & proba-  
tionem uberiore inque eruditionem  
subinde in meis dispositionibus per-  
mittit, aut imposterum permittet, in  
scientiâ accipiatis; ex animo suppor-  
tantes, donec ego vobiscum & vos  
mecum crescamus in virum perfe-  
ctum & mensuram plenitudinis Chri-  
sti: neq; imposterum murmurare con-  
tra me vobis expedit in contrariis e-  
ventibus, sed magis æquō animo pro-  
spera & adversa accipere: neq; nimis  
sapere vos decet supra id, quod ad  
vos non spectat: Confido enim per  
gratiā Iesu Xti, me vobis non fore  
ignominiam, nisi in Cruce Domini no-  
stri; neq; vos seducam, aut in tentatio-  
nes nocivas coniiciam, sicut quidam  
avaritiæ cultores arbitrantur vos tur-  
bare violentes: Scitis enim quomodo  
hactenus vobis condescenderim, è con-  
tra me & omnia mea evacuando im-

penderim & superimpenderim & ad-  
huc impendam quamdiu guttulam  
Sangvinis in corde meo & capilium  
in capite superstitem habuero. In sim-  
plicitate mea sicut hactenus ambula-  
bo & secundum scientiam: proinde  
finite me agere. Consilia vestra audi-  
am, sed mihi dispositio & judican-  
dum reservare erit, quod in quovis  
negotio agendum vel omittendum.  
Non expedit vobis in contemptum ab-  
bire, aut judicare, quando tempestas  
adversorum ingruit; Socii laborum  
Socii & præmiorum, Socii in prospe-  
ris, Socii in adversis. Charitas nun-  
quam evacuatur, omnia credit, omnia  
sperat, omnia sustinet. An jam satu-  
rati estis, an jam regnatis, an jam Sa-  
pientes facti estis, an jam super abun-  
datis, an jam Judices estis implentes  
etiam mensuram cum hoc mundo?  
Hæc scribo vobis, ut bonam confiden-  
tiā, quām olim habuistis, conservan-  
tes de animis vestris excidere non si-  
natis, & in vocatione vestra, in qua vo-  
cati estis, firmiter stantes, permanea-  
tis, adversa qualiacunq; illa sint, vos  
perturbare non sinatis; quia sic opor-  
tet fieri in incrementum nostrum; pro-  
inde libertatem animi maximè ad ex-

tra conservare; certam facite voca-  
tionem vestram coronantes eam con-  
tabus Sanctis in hoc vitæ proposito.  
Et hæc est Epistola, quam vobis ex inti-  
mis medullis Charitatis quâ erga vos  
omnes & institutum nostrum in verita-  
te totus incendor scribere volui, ut  
diligatis me, & diligatis & invicem  
in sinceritate & sanctitate & dilectione  
vestræ non sit finis, usq; dum con-  
veniamus in Patriâ. Interim bonam  
spem habeatis ausu alacri & indefessô  
Studio laborantes, (unusquisq; prout  
accepit à Domino) usq; dum cursum  
nostrum consummemus. Orate pro  
me, sicut ego vos semper in orationi-  
bus meis habeo. Estote salutati in  
osculo dilectionis Jesu Christi. Gratia  
Domini nostri Jesu Xti cum omnibus  
vobis Amen. Bartholomæus Peccator.

### § F I N A L I S.

*Mementote mei, & miseremini vestri  
homuncionis infimi o Fratres mei  
intimi! Mementote quofo mei, ut hæc  
faciatis: tanquam parturiens & ago-  
nizans, o Filioli mei, hæc lachrymor  
& scribo. Sobrii estote, & in habitu  
Sandio humiles converfamini in hoc  
mundo. Omne tempus in Gloriam Dei*

& salutem animarum collocate, sicut  
præscripsi vobis: viam verarum & so-  
lidarum Christianarum virtutum a ju-  
ventute ingredientes, semper in melius  
ambulate: Cōmunitatem bonorum,  
tanquam Testamentum vitæ æternæ  
ambabus ulnis sine decisione & frau-  
de osculo dilectionis amplectentes sem-  
per tenete, ut sitis nihil habentes & o-  
mnia possidentes, & benè utentes hōc  
mundo, sic transeatis per bona tempora-  
lia, ne amittatis æterna. Et qui æ-  
conomi sunt fideliter administrent, &  
in omni charitatis sollicitudine omni-  
um necessitatē semper prævenientes  
taliter Fratribus alteris dispensent,  
qualiter sibi dispensari vellent, Fami-  
lias vestras tam Clericorum, quam  
Laicorum ita instituere satagite, ut  
utroq; proportionato passu in timore  
Domini omni tempore progrederiatur.  
Vocationem vestram ad extra dignam  
facite vitæ æternæ, congregantes vobis  
coronam ex lucro animarum, sicut  
præscripsi vobis: Sed non obliviscimini  
recollectionis internæ, cuius virtute  
per quotidianam meditationem, aut  
saltem lectionem Spiritualem & jacula  
S. Spiritus, id, quod per labores aut  
strepitum huius Sæculi deperditum est


iterum restauretur. Scientiam habete  
& discretionem, tanquam omnium vir-  
tutum Matrem & Magistram Sanctam  
in omnibus vestris actionibus vobis sem-  
per præponite & nil operamini maxi-  
me ad extra, nisi quod illius Sancta Cy-  
nousa post maturam præmeditatio-  
nem & aliorum auditio consilio operan-  
dum vel omittendum suaserit. Societa-  
tem & Fraternam conversationem in  
vinculo amoris ad invicem retinete, &  
a commercio mulierum, tanquam a fa-  
cie colubri accedentes fugite & deniq;  
ut haec ita propagetur & in sempiter-  
num conservetur ad Matricem hujus  
statq, quam ordinavi attendite & ex  
eâ per generationem quādam conti-  
nuam Filios intemeratos ad eandem  
hanc vitam & vocationem vobis educa-  
te. Media instituendi eam Dei miseri-  
cordia et Gratia Principum ad manum  
vobis dabunt, si instanter eam depre-  
cantes, discretione et dexteritate a-  
gendi uti satagetis, Mementote mei o  
Fratres medullitq amantissimi, Me-  
mentote o Filioli mei existentes et fu-  
turi, ut haec semper faciatis, et nun-  
quam dilabi disciplinam ac jugum  
permittatis. Et si ad temporem post  
tempora inclinare videritis, reducite


*ad carbones ignis Spiritus S. Custodi-144  
te Institutum; dirigite Fratres in omni  
humilitate et charitate, ut Filii lucis  
sit, mementote mei quæso, ne in utiliter  
institutum limitantes disciplina ener-  
vetis, ut fieri solet. Vos o! Superiores  
Custodes agri, vigilis domus Dei, Vir-  
gæ regnantes, circuite vineam Domi-  
ni, & videte quæso, ut totius hujus in-  
stituti circumferentia sine inscissione  
incolumis subsistat; debilia roborate,  
ut quæ successu temporis de discipli-  
na dilabi contingit, mature restaura-  
te. Silloquor hodie omnes existentes et  
futuros tanquam Filios meos charis-  
simos, si quæ Societas spiritus, si quæ  
viscera miserationis & si quod vincu-  
lum dilectionis, & si quæ vis lacryma-  
rum, implete gaudium meum, ut idem  
etiam sapiatis, eandem charitatem ha-  
bentes, unanimes id ipsum sentientes,  
nihil per contentionem, neque per ina-  
nem Gloriam, sed in humilitate supe-  
riores sibi invicem arbitrantes, non  
quæ sua sunt singuli querentes, unus  
alterius onera portate, fragilitati  
mutuae invicem condescendite, suppor-  
tate invicem; & deniq; Fratres, unus  
alteri obediat in omne bonum, secun-  
dum Deum Patrem & D.g.C. Obser-*

vate sedulo obedientiam directionis  
& ejus subordinationem & sic subja-  
cete invicem sicut membra in corpo-  
re. Dirigite vos invicem, et dirigunt unus-  
quisq; se finat secundum præscriptam  
subordinationem. Nam quendam mo-  
dum catena in multis membris per  
connexionem & quemadmodum cor-  
pus humanum sub uno capite secun-  
dum subordinationem membrorum in-  
teriorum et superiorum in sua Compa-  
ge beatum consistit; ita vos si hic ab in-  
vicem per vitalitatem Spiritualem  
vegetati & connexi permaneritis, e-  
ritis corpus & Status, & Templum  
I. Christi, Gloria mundi, honor Ec-  
clesiae, ædificatio populi, confractio  
Filii perditionis, & odor agri pleni.  
Complementum Statuum, planta pe-  
dum totius Universi. Spiritualis Uni-  
versalis Corporis quod est Ecclesia con-  
flata ex omnibus statib; ultim a pro-  
tes. Gratia D: N. J. C. & Benedictio  
Patris, & abundantia Spiritus Sancti  
vobiscum sit & vobiscum ambulet in  
sempiternum; ut vos omnes cum poste-  
ritate videam, deosculer & amplexu  
Cœlesti comprehendam in æternâ  
Beatitudine. Amen.



Bibl. Jag.





STĘGARNIA x  
ANTYKWARIAT



D № 9643

(4)

stdr0007888

Biblioteka Jagiellońska

